



Kareba Belo anu nitulihi Lukas

Pumpamula nu teha

Buku Kareba Belo anu nitulihi Lukas, nuteha karata Yesus najadi Madika Tupumpakahalama anu nijanji Pue Alatala ka tu Israel ante ka pura-pura tumata ri dunia.

Tuputulihii buku ei, etumo Lukas hadua doktoro anu numbapuroa Paulus riara mpulumakona nalau numpahampeka Kareba Belo.

Riarana numbatulihii buku ei, Lukas numpareha mpakabelo pulolita bu panggawia Yesus loko ri tumata anu natuwu nuhinggani/nggani ante Yesus. Lukas mbui nutulihi buku Huro-huro (Kisah Para Rasul) anu nuteha birumba katuwu nu tuputintuni Yesus kaliuna Ia niore ri huruga.

Riara nu buku ei, ninjanita ane Yesus nikaponu Nyoha Gaha nu Alatala. Ante kuaha nu Nyoha gaha etumo Yesus mumbapatulele Kareba Belo loko ri Alatala ka tumata anu napakah ante mumbapawia tumata anu nahuha bu numbakabelohi tumata anu naburo. Pade patuju Yesus mbui nitulihi ri Lukas 19 ayat 10 etumo, mangelo bu mumpakahalama tumata anu taapa numparahaya Pue. Riara nu buku ei natantumo ane Yesus narata mumpakahalama pura-pura tumata ri dunia ei, hodi hawo tu Yahudi.

Buku Kareba Belo ei mbui nuteha birumba pumputowe Pue Yesus ka tumata anu hodi niangga ante ka tumata-tumata napakahii.

Ihi nu buku Lukas

Putipuuna 1:1-4

Karata Yesus ri dunia mumpakahalama manuhia 1:5—4:13

Pukarajaa Yesus ri Galilea 4:14—9:50

Pukarajaa Yesus tempo pulumakoNa nalau ri Yerusalem 9:51—19:27

Pukarajaa Yesus bu kamateNa ri Yerusalem 19:28—23:56a

Yesus natuwu mpanjili bu natiroe ri huruga 23:56b—24:53

Putipuuna

1 ¹Teofilus anu nibilaku.

Nadeamo tumata anu numpahimbuku nutulihi birumba hunju nu

kajadia anu najadi ri totongota. ²Anu nitulihira ee nahimbai ewa anu nipahampeka nu tumata anu nangole ante matana mboto nuapa anu najadi loko ripamulana, pade hira majadi tupumpatulele Kareba Belo. Bu kita nangepe kareba ee loko ante hira. ³Jadi naopu niparehaku mpakabelo pura-pura kajadia ee mpamula loko ri putipuuna, nirata nu pikiriku nabelopa ane yaku mbui mumbatulih hongu buku ka komi ante hunjuna anu nakono. ⁴Buku ei nitulihiku, ala ranjanimi pangajari anu nipatuduhi ka komi ei, mpuu-mpuu nakono.

Pumpuanaka Yohanis Tupubaptis nipupanjanika

⁵Tempo madika Herodes numparenta ri tana Yudea, naria hadua imam anu nuhangaka Sakaria; ia ei tumata loko ri puhiromu nu imam anu nuhangaka Abia. Rongona nuhangaka Elisabet, muli nu imam Bohe Harun. ⁶Katuwura njamboko mpuu-mpuu numpakadombo rara nu Alatala pade natundu ri pura-pura parenta bu atura nu Alatala. ⁷Hira hodi nuana, habana Elisabet nagampa bu hira mbui natuamo.

⁸Ri hongu tempo, hira anu loko ri puhiromu nu imam anu nuhangaka Abia numbarata lelena, jadi Sakaria numbabe pukarajaana riara Bola Pue Alatala. ⁹Habana ewa kabiaha nu imam-imam, nibabera nomoro ala mumpakatantu hema anu mihua riara Bola Pue Alatala mumbatunju dupa. Nomoro ee nambela ante Sakaria. Jadi wetu naratapa tempona, iamo anu nihua riara Bola Pue Alatala mumbatunju dupa. ¹⁰Tempo Sakaria nutunju dupa riara Bola Pue Alatala, tumata dea nuhambaya rihawalikuna. ¹¹Tempo ee mbui malaeka nu Alatala narata ka Sakaria. Malaeka ee nionggo ri hambira panggana nu meja putunju dupa. ¹²Nangole malaeka ee, natikaja bu naekamo Sakaria. ¹³Nanguli malaeka ee ka ia, "Nee maeka Sakaria, nitarima nu Alatalamo puhambayamu. Elisabet rongomu kana muanaka hadua ngana langgai, pade ngana ee kana mupupuhangaka Yohanis. ¹⁴Komi kana mpuu-mpuu madombo bu madea tumata ntanina kana madombo mbui tempo ngana ee rapuanaka. ¹⁵Ngana ee kana majadi tumata bohe riara pangole nu Alatala. Ia hodi manginu angguru, bara panginu anu nepakalangu. Mpamula loko nikatianaka nu tinana, ia naponu ante Nyoha Gaha nu Alatala. ¹⁶Pade riara nu pangajarina, madea tu Israel rakenina mpanjili ka Pue Alatala anu niparahaya nu tutuara nggaulu. ¹⁷Ia kana marata muriulupa loko Pue ala mumpahadia dala ka Pue. Ante kuaha anu niwoi nu Nyoha Gaha nu Alatala, nipakulena mumbabe pukarajaana nahimbai ewa nabi Elia. Ia kana mumpupuhinggabelo ana-ana ante tuamara, pade



Meja putunju dupa (1:11)

tumata anu hodi natundu ka Alatala rakenina mpanjili ri dala anu nakono. Pura-pura anu nibabena etu ala mumpakahadia rara nu tudea ala hira mumbatarima Pue."

¹⁸Nangepe panguli nu malaeka ee, nikutanamo Sakaria, "Birumba kunjani ane etu kana madupa? Yaku natuamo, bu rongoku mbui natu ntotomo."

¹⁹Nihabo malaeka ee, "Yaku ei Gabriel anu numbatulungi Alatala, bu Iamo anu nangowu yaku mumpahampeka kareba belo ei ka komi.

²⁰Anu niuliku ei, mpuu-mpuu kana madupa ri tempo anu nipakatantu nu Alatala! Tapi, habana hodi niparahayamu tehaku ei, iko hodi mahowa mujarita. Iko kana mabobo hampe nuapa anu nitehaku ei mpuu-mpuu madupa."

²¹Ri tempo ee, nadea tumata numpupea Sakaria rihawalikuna. Naheramo hira, nanggia Sakaria nahae gaga riara Bola Pue Alatala.

²²Tempo ia nihuwu, ia hodi nahowa nujarita ka hira, hawo palena anu nuego. Nangole ee, ninjani nu tumatamo naria anu niolena riara Bola Pue Alatala ee.

²³Naopupa pukarajaana riara Bola Pue Alatala ee, nanjilimo ia ri bolana. ²⁴Hodi hanggia kahaena naopu ee, natianamo Elisabet. Lima mbula kahaena Elisabet hodi nihuwu loko riara bolana, jadi nanguli

Elisabet, ²⁵“Eimo kabelo Pue ka yaku. Ia numpakalipo eaku loko ri kagampaku.”

Pumpuanaka Yesus nipupanjani ka Maria

²⁶Ri wula kaonona Elisabet natiana, Pue Alatala nangowu malaeka Gabriel nalau ri ngata Nasaret ri Galilea. ²⁷Malaeka Gabriel ee, niuwu Pue Alatala nalau ka hadua randaa anu nuhangaka Maria. Randaa ee, nihambulu nu hadua langgaimo anu nuhangaka Yusuf, muli nu Madika Daud. ²⁸Malaeka ee narata ka Maria bu nanguli, “Tabe. Komi anu niganehi Pue. Pue nuhinggani ante komi.”

²⁹Nangepe panguli nu malaeka ee, natikajamo Maria bu nikutana riarantaina, nuapa batua nu pitabe etu. ³⁰Malaeka ee nanguli, “Nee maeka Maria, komi nipitolohi Pue Alatala, ala mumbarata puganehi. ³¹Kakonona komi kana matiana pade muanaka hadua ngana langgai bu ngana etu kana rahangaka Yesus. ³²KatuwuNa kana majadi tumata bohe, pade Ia niuli Ana Pue Alatala anu nilabi kuahaNa loko ri pura-pura anu nakuaha. Pue Alatala mumpajadika Ia madika anu mumparenta ewa madika Daud pueNa. ³³Ia majadi Madika anu mumparenta tu Israel ri kahae-haena pade pumparentaNa hodi ria kaopuna.”

³⁴Nanguli Maria ka malaeka ee, “Birumba etu madupa ante yaku, habana yaku ei da naranda?”

³⁵Malaeka ee nanguli, “Nyoha Gaha manau ka komi, pade kuaha Pue Alatala marata ka komi. Etumo habana ngana anu rapuanaka etu, niulika Ana Pue Alatala anu nakuaha. ³⁶Tora, hampihuwumu Elisabet natianaka ngana langgai ono mbulamo, naupa ia natuamo bu niuli ntumata ia nagampa. ³⁷Habana ri ngayo Pue Alatala, hodi naria anu hodi namala rababeNa.”

³⁸Pade nanguli Maria, “Ane wetu, kuturuhi parenta Pue, ala dota Pue madupamo ka yaku ewa anu niulimu etu.” Naopupa ee, malaeka numpalaihi Maria.

Maria ante Elisabet

³⁹Taapa nahae naopu ee, nalaumo Maria ri hongu ngata bohe ri kabuntina ri tana Yudea. ⁴⁰Ia nalau ri bola Sakaria. Tempo nihua, ia numbatabe Elisabet. ⁴¹Wetu Elisabet nangepe pitabe Maria, nuegomu ngana riarantaina. Pade Elisabet naponu ante Nyoha Gaha nu Alatala, ⁴²Pade nujaritamo ia ante huara namangga niulina, “Maria, komimo banggele anu mpuu-mpuu niganehi Alatala nilabipa loko ri banggele

ntanina, pade niganehimo ngana riarantaimu etu. ⁴³Hema mbui yaku ei, hampe tina nu Pue anu niparahayaku narata numbatotorou yaku?

⁴⁴Wetu niepeku pitabemu, nuegomu ngana riarantaiku habana ia nadombo. ⁴⁵Nahana mpuu komi, habana niparahayami nuapa anu niuli Pue ka komi etu natantumo kana madupa.”

Dade puukuru Maria

⁴⁶Nanguli Maria,

“Ante raraku, yaku mpuu-mpuu mumbatuia Pue.

⁴⁷Nadombo mpuu raraku,
habana Alatalamo anu numpakahalama yaku.

⁴⁸Naupa yaku batuaNa anu niputio mata, kana nitoraNa yaku.
Mpamula loko ri eo ei, pura-pura manuhia nanguli yakumo
banggele anu niganehi Alatala.

⁴⁹Habana Alatala anu mpuu-mpuu nakuaha
numbabe anu nabelo ka yaku.

Tuiamo Alatala habana Ia nagaha.

⁵⁰Alatala mpuu-mpuu numpupuole kabeloNa ka tumata anu
natundu ka Ia, hampe rimulina.

⁵¹Ante paleNa anu nakuaha,
nibabeNa tanda-tanda anu numpakahera,
pade nipakagaroNa tumata anu nahombo rarana.

⁵²Madika-madika anu nakuaha nipupanauNa panggara,
bu tumata anu niputio mata nioreNa katuwura.

⁵³Alatala numbawoi mpingaya anu nabelo ka tumata anu
napakah hampe ia nabaha,
pade tumata nahugi nipupalaiNa ante pale boa.

⁵⁴Ia numbatulungi tu Israel, batuaNa,
habana Ia nantora kabeloNa,

⁵⁵ewa anu nijanjiNa ka tutuata nggaulu,
ka Abraham bu mulina
hampe ri kahae-haena.”

⁵⁶Nitahere tolumbula kahaena Maria niari ante Elisabet, pade ia nanjili ri bolana mboto.

Pumpuanaka Yohanis Tupubaptis

⁵⁷Naratamo tempona Elisabet muana, ia numpuanaka hadua ngana langgai. ⁵⁸Tempo tumata anu nu hongu doyata ante ia bu hampihuwuna nangepe kabelo nu Alatala ka Elisabet, hira pura-pura

nadombo nuhinggani-nggani ante Elisabet.⁵⁹ Naganapa walu eo umuru nu ngana ee, naratamo hira mumbahuna ngana ee, pade rapupuhangara Sakaria ewa hanga nu tuamana.⁶⁰ Tapi nanguli tinana, "Neemo! Ia kana rapupuhanga Yohanis."

⁶¹ Nanguli hira ka Elisabet, "Tapi hodi ria nau hadua hampihuwumu anu nuhangaka Yohanis."⁶² Pade nipupuegora palera mikutana ka Sakaria, nuapa hanga anu kana rawoika anana.

⁶³ Sakaria nirapi hongu watu raputulihai pade nitulihina, "Hangana Yohanis." Nangole ee, nahera puramo hira.⁶⁴ Ritempona ee mbui Sakaria haliu nahowa nujarita bu numbatuia Alatala.⁶⁵ Nangole kajadia ee, naeka pura tumata anu namonju rihee, pade kareba ee natulelemo ri pura-pura ngata anu ri buntina ri tana Yudea.⁶⁶ Pura-pura tumata anu nangepe nuapa anu najadi ee, nikutanamo riarrantaina, "Majadi nuapa ngana ei ri eo purina?" Hira nanguli ewa ee, habana niolera kuaha nu Alatala naria ante ngana ee.

Sakaria numpahampeka kareba loko ri Alatala

⁶⁷ Sakaria tuama nu ngana ee naponu ante Nyoha Gaha nu Alatala, hampe ia namala numpahampeka kareba loko ri Alatala. Nanguli Ia,

⁶⁸ "Maimo kita mumbatuia Pue,

Alatala nu tu Israel!

Habana Ia naratamo mumbatulungi tumata anu nipitolohiNa bu mumbapawia kita.

⁶⁹ NiwoiNa ka kita hadua Tupumpakahalama anu nakuaha, etumo muli Daud, batua Alatala.

⁷⁰ Loko ri nabi-nabi anu nipitolohiNa nggaulu, Alatala numbawoi tupumpakahalama ee ka kita ewa anu nijanjiNa loko ri nggaulu anu nipahampeka loko ri nabi-nabi anu nipitolohiNa.

⁷¹ Tupumpakahalama ee kana mumbapawia kita loko ri balita ante loko ri pale nu tumata anu numbatuwuluma kita.

⁷² Alatala kana mumbabe anu etu ala mumpupuole pumputoweNa ka tutuata nggaulu ewa janjiNa anu naroho ee.

⁷³ Janji ee mpuu-mpuu naroho, habana Ia nujanji ante sumpa ka Abraham tutuata nggaulu.

⁷⁴ Alatala nujanji ala mumbapawia kita loko ri balita, ala kita pura hodi maeka miPue ka Ia,

⁷⁵ ante rara anu nagaha bu nanoa ri ngayona hampe kaopu nu katuwuta."

⁷⁶ Pade nanguli Sakaria ka anana, "Iko, anaku, iko kana rauli nabi nu Alatala anu nilabipa kuahaNa loko ri pura-pura anu nakuaha.

Habana iko niowu mumpariuluhi Pue ala mumpakahadia dala ka Ia.

⁷⁷ Iko kana mumbapupanjanika tudeaNa birumba ala dohara mamala raampuni, ala hira rapakahalama.

⁷⁸ Alatala mpuu-mpuu nabelo bu numputowe kita, etumo habana Ia narata loko ri huruga ala mumpakahalama kita.

KarataNa ewa eo anu nibonda,

⁷⁹ ala mumbaremehi pura-pura tumata anu natuwu ri kalalondona bu naeka ante kamate.

Pade mbui mumbapanini kita riara kabelo nu katuwu."

⁸⁰ Nantambaimo kabuhe Yohanis, bu nantambai mbuimo pumparayahana. Pade niarimo ia ri karawa bai, hampe narata tempona ia mpamula mumpatulele Lolita nu Alatala ka tu Israel.

Pumpuanaka Yesus

2 ¹Ri tempo Kaisar^a Agustus numparenta ri Roma, ia numpupihuwa hongu parenta ala mangowu pura-pura tumata anu niari riara ngata mpuparentana malau mumbatulihai hangara. ²Eimo putulihai hanga mpamulana ri tempo Kirenius najadi Gubernur ri Siria. ³Iweepa nalau puramo tumata nutulihai hangara ri ngata ntutuara mboto.

⁴ Wetu mbui Yusuf loko ri ngata Nasaret ri Galilea, ia nalau ri ngata Betlehem ri Yudea, piari nu madika Daud, habana ia muli nu madika Daud. ⁵Yusuf nalau mbui nuhinggani ante Maria, banggele anu nihambulunamo bu natianamo ala ratulihai hangara. ⁶Wetu hira narata ri ngata Betlehem, naratamo tempona Maria muana. ⁷Pade ia nuanaka hadua ngana langgai, ana ulumbuana. Ngana langgai ee nibungguhina ante kae, bu nidulena ri tampa pumbanai nu binata, habana rihee, tamo naria bola anu naloga rapaturura.

Tupuewu ante Malaeka

⁸ Nggawengina ee, naria tupuewu anu numbagajai bimba-bimbara ri karawa anu namonju rihee. ⁹Hampigoli, nionggomo hadua malaeka Pue numbakamonjuhi hira bu kareme loko ri Pue numbatuwa hira

^a 2:1 Kaisar: Madika anu nabohe ntoto panggana anu numparenta ri Roma.

pade naekamo hira. ¹⁰Tapi malaeka ee nanguli, “Nee maeka, habana yaku narata nanggeni kareba belo ka komi, kareba anu numpakahana pura-pura tumata. ¹¹Eo ei ri ngata Daud, nipuanakamo ka komi Madika Tupumpakahalama, etumo Kristus, Pue. ¹²Eimo tandana, komi muhirata ka hadua ngana danalero anu nibungguhi ante kae, nidule riara tampa pumbanai nu binata.” ¹³Hampigoli, napanto mbuimo Malaeka ntanina numpakabohe hanga Pue Alatala, nanguli hira,

¹⁴“Rapakabohe Pue Alatala riara huruga.

Pade manuhia ri dunia anu numpakahana rara Pue,
hira kana mumbarata katuwu anu nabelo!”

¹⁵Naopupa nanguli iwee, malaeka-malaeka ee nanjilimo ri huruga pade tupuewu ee nuteha himbai hira, nanguli hira, “Maimo kita malau ri Betlehem, mangole nuapa anu najadi ewa anu niuli Pue Alatala ka kita.”

¹⁶Pade nanggaliwomo hira nalau ri Betlehem muhirata ka Maria ante Yusuf bu ngana danalero ee anu nidule ri tampa pumbanai nu binata.

¹⁷Wetu hira nangole ngana danalero ee, niteharomo teha nu ngana danalero ee, ewa anu nipahampeka malaeka ka hira. ¹⁸Pade pura-pura tumata nahera nangepe teha nu tupuewu ee. ¹⁹Iweepa Maria nibolina pura riarantaina bu nipariarantainaka nuapa anu najadi ee. ²⁰Tupuewu ee nanjili ri karawa pade hira numpakabohe ante numbatuia hanga Pue Alatala, habana anu niepera ante niolera, najadi ewa anu niuli malaeka ka hira.

Yesus nipupuhanga pade nikeni ri Bola Pue Alatala

²¹Naganapa walu eo umuru nu ngana ee, nibaberamo ada puhuna. Pade nipupuhangara ngana ee Yesus, hanga anu niwoi nu Malaeka ka Ia tempona Ia taapa nikatianaka nu tinana.

²²Naganapa patampulu eo naopu Maria nuana, naratamo tempona Maria ante Yusuf nalau ri bola Pue Alatala ri ngata Yerusalem ala mubabe ada pumpakahaga naopu nuana, numbatintuni atura Agama anu nitulih i nabi Musa. Ngana ee nikeni mbui nalau ri ngata Yerusalem ala rawoi ka Alatala. ²³Ada etu nibabera numbatintuni nuapa anu nitulih riara buku atura agama iwei, “Pura-pura ngana langgai ulumbua kana rakeni ka Alatala.” ²⁴Hira mbui nanggeni binata anu rahambaleka Pue Alatala numbatintuni atura agama, etumo hapaha tonji wuko bu namala mbui rumbaa tonji banggebodo.

²⁵Tempo ee ri ngata Yerusalem naria hadua langgai nuhangaka Simeon. Ia tumata anu nabelo rarana, bu natundu ante parenta nu Alatala, bu numpupea tempona Alatala mumpakahalama tu Israel. Nyoha Gaha nu Alatala naria nuhingga ante ia. ²⁶Nyoha Gaha etu numpupanjanika ia, taapa ia mamate ane taapa mangole Madika Tupumpakahalama anu nijanji nu Alatala. ²⁷Simeon nipakeni Nyoha Gaha nu Alatala nihua ri Bola Pue Alatala. Tempo ee mbui Yusuf bu Maria nanggeni Yesus ala rababeka ada anu niparenta riara nu atura Pue anu nitulih Musa. ²⁸Niala Simeon ngana ee, nihulengguna pade ia numpakabohe hanga Pue Alatala, niulina,

²⁹“Pue, tempo ei nadupamo pujanjiMi ante yaku.

Mamalamo batuaMi ei, mamate mahana,

³⁰Habana matakumbotomo nangole

Tupumpakahalama loko riKomi.

³¹Iamo Madika Tupumpakahalama anu niwoiMi
ka pura-pura manuhia.

³²Iamo reme anu numbawanta riarantai nu tumata
anu hodi tu Yahudi,
pade reme etu mbui mumbabe hira ala mumbatuia
tudeaMi Israel.”

³³Naheramo tina tuamaNa nangepe Simeon numbateha nuapa anu majadi ante anara ee. ³⁴Pade Simeon nirapi puganehi loko ri Pue Alatala ka hira bu nanguli ka Maria tina nu ngana ee, “Kakonona ngana ei nipitolohi Pue Alatala ala madea tu Israel rahuku, tapi madea mbui tu Israel ntanina rapakahalamaNa. Anamu ei mbui majadi tanda loko ri Pue Alatala tapi madea tumata mumbaewa Ia. ³⁵Pade muliu ante Ia pikiri-pikiri anu naria riarantai nu tudea mpuu-mpuu ninjani. Pade, iko Maria, marata tempona kahuha mumpakadua raramu ewa nitohu nu tono anu natada.”

³⁶Naria mbui hadua nabi banggele anu natuamo hangana Hana ana Fanuel muli Asyer. Nagana pitumpae ia nurongo, ³⁷namatemo rongona. Tempo ia natimbalamo, ia naharo nalau ri Bola Pue Alatala. Eo wengi ia nePue ka Alatala, nuhambaya ante napuaha. Tempo ee, Hana nu umuru walumpulu bu patampaemo. ³⁸Ritempona Simeon nuteha, naratamo Hana bu numpakabohe hanga Alatala pade nitehanamo ngana ee ka pura-pura tumata anu nupea tempona Alatala numbatipawia Yerusalem loko ri balira.

³⁹Naopupa pura-pura anu nibabe Yusuf bu Maria numbatintuni atura Pue nanjilimo hira ntaliana ri ngata piarira. Etumo ngata Nazaret

ri Galilea ⁴⁰Ngana ee nantambai kaboheNa, nantambai karohoNa, nantambai kapandeNa pade Ia mpuu-mpuu niputowe nu Alatala.

Yesus ri Bola Pue Alatala tempo umuruNa hampulu rumpae

⁴¹Mpae-mpae tina tuama Yesus nalau ri ngata Yerusalem numbatintuni puhuha eo bohe tu Yahudi, anu nihangaka puhuha Paskah. ⁴²Kahampulu rumpaena umuru Yesus, nalaumo hira ri Yerusalem ewa kabiaha nu tu Yahudi. ⁴³Naopupa puhuha ee, nanjilimo tina tuamaNa. Yesus nitiboli ri ngata Yerusalem, tapi hodi ninjani tina tuamana. ⁴⁴Niharumakara Ia nulumako bu nuhinggani-nggani ante roa hampulumakora. Haeo ntuamo kakawao pulumakora, pade nielora Yesus ritotongo nu hampihuwura bu wegara. ⁴⁵Tapi hodi niratara Ia, jadipa nanjili mpanjili hira nalau ri ngata Yerusalem pade numpakelo Ia njuu. ⁴⁶Nagana katolu eona pade niratara Ia ri Bola Pue Alatala. Ia nikatoko rihee nangepe tupande ri atura Musa nuteha bu nipikutana-tanaNa hira. ⁴⁷Pura-pura hira rihee anu nangepe Ia nahera, habana natau mpoo Ia nihabo guru-guru agama Yahudi ee. ⁴⁸Tina tuamana nahera mbui nangole Ia rihee. Nanguli tinana ka Ia, “Lobe, nanggia Iko numbabe kami iwei? Yaku ante tuamaMu naheha mpoo nangelo Iko!”

⁴⁹Nihabo Ia, “Nanggia komi nangelo Yaku? Hodi ninjanimi Yaku kana maria ri Bola TuamaKu?” ⁵⁰Tapi hodi ninjani tina tuamaNa nuapa batua nu pihabo Yesus.

⁵¹Naopu ee, nanjilimo Yesus nuhinggani-nggani ante tina tuamaNa nalau ri ngata Nazaret, bu natundu ante tutuNa. Pura-pura anu najadi etu, niboli tinaNa riarantaina.

⁵²Kahae-haena nantambaimo kabohe Yesus bu nantambaimo kapandeNa, bu nantambai niputowe Pue Alatala bu manuhia.

Yohanis Tupubaptis

3 ¹Ri pae kahampulu alimana pumparenta nu Kaisar Tiberius, Pontius Pilatus najadi Gubernur ri Yudea, bu Herodes najadi madika ri Galilea. Filipus, hampihuwu Herodes najadi madika ri Iturea ante Trakhonitis, bu Lisanias najadi madika ri Abilene. ²Ri tempo ee i Hanas bu i Kayafas najadi imam Bohe. Tempo ee mbui Pue Alatala numpahampe lolitaNa ka Yohanis ana Sakaria anu niari ri karawa bai. ³Jadi, nalaumo Yohanis ri pura-pura ngata anu napara Binangga Yordan, numpatulele Lolita loko ri Alatala ka pura-pura tumata iwei, “Kajeamo komi loko ridoha-dohami pade woimo koromi rabaptis najadi tanda doha-dohami niampuni Alatala.” ⁴Napa anu nibabe Yohanis

etu numpakadupa ewa nuapa anu nitulih i riara nu buku nabi Yesaya nggaulu iwei:

“Naria tumata nungare-ngare ri karawa bai,

‘Pakahadiamo dala ka Pue,
pakanoa dala raoheNa.

⁵ Pulobuna kana rapakawoe,
bulu bu buntina kana rapakarano.

Dala nuleko-leko kana rapakanoa
pade lowu-lowu kana raiwu.

⁶ Pura-pura tumata kana mangole
Alatala mumpakahalama manuhia.”

⁷Nadea tumata narata nekibaptis ante Yohanis. Niulina ka hira, “Komi muli nu ule wuri, nee raharumakami ane hawo rabaptis, komi tamo rapambela pehuku nu Alatala eo purina. ⁸Tapi ane komi mpoo-mpoo majea, pupuolemo pukainggumi anu nabelo. Nee rapikirimi: Kita ei muli i Abraham, jadi pehuku nu Alatala hodi rapambela ka kita. Kuuli ka komi: Ane Alatala madota, nau watu-watu ei mamala rapajadiNa muli i Abraham. ⁹Pehuku nu Alatala nahimbaika wahe anu nahadiamo raputowo kai hampe rikalena ane hodi mabelo puwuana. Kai anu hodi nabelo puwuana ee ratowo pade ratidaka ri mata nu apu.”

¹⁰Pade nikutanamo tudea, “Ane wetu, nuapa anu mahipato ka babe?”

¹¹Nihabo Yohanis, “Tumata anu runtonga pakeana, kana rawoina hantonga ka tumata anu hodi ntoto naria pakeana. Tumata anu naria pumbanaina, kana rawoina hanu ka tumata anu hodi naria pumbanaina.”

¹²Naria mbui hanggia dua tupuhungara bahitee narata nekibaptis ante Yohanis bu nikutana, “Guru, nuapa anu mahipato ka babe?”

¹³Nihabo Yohanis, “Nee mirapi milabi loko rikadea nu bahitee anu nipakatantu nu pamarentami.”

¹⁴Naria mbui huradadu-huradadu anu nikutana ante Yohanis, “Birumba ante kami? Napa anu mahipato ka babe?”

Nihabo Yohanis ka hira, “Neemo meagohi, bu neemo mumberai tumata ante dawa pade komi mangala doina. Neemo raelomi milabi loko rigajimi. Katuwumi kana magana ante gajimi etu.”

¹⁵Tempona ee mbui tudea nikutana-tana riarantaina, bara Yohanis eimo Madika Tupumpakahalama nijanji nu Alatala anu nippupeara.

¹⁶Tapi ninjani Yohanis pumpikirira. Jadi niulina ka hira pura-pura, “Yaku numbabaptis komi ante ue, tapi nariapa tumata anu marata anu nilabipa kuahaNa loko ante yaku. Nau mumbakakahi lui nu hapatuNa

yaku hodi mahipato. Iamo anu mumbabaptis komi ante Nyoha Gaha bu apu ¹⁷Ia nahimbaika tumata anu nuwaro pae. Nahadiamo Ia ante puwaro ripaleNa, mumbawaro pura-pura paeNa hampe magaha. Pae anu nuihi raboliNa riara gampiri, pade warana rapalabuNa ri mata nu apu anu hodi maporo-poro.”

¹⁸Iweemo Yohanis numpatuduhi tumata dea, bu numpingaya pumpatuduhi ntanina mbui anu nipahampena ri tempona ia numbapatulele Kareba Belo. ¹⁹Ri hongu tempo Yohanis nangontika Madika Herodes anu numparenta ri ngata Galilea, habana numpingaya anu nadaa nibabena. Niontina ka Herodes habana nangala i Herodias pade nipurongona. I Herodias ei erana mboto rongo nu tuakana. ²⁰Tapi Madika Herodes hodi najea, hawo nitambaina kadaana pade nihiuarakana Yohanis riara nu tarunggu.

Yesus nibaptis

²¹Naopupa tumata dea ee nibaptis, Yesus mbui nibaptis. Tempo Ia nuhambaya natebukamo langi ²²bu Nyoha Gaha nu Alatala ewa tonji banggebodo nanau ka Ia. Pade naria huara loko ri huruga nanguli, “Ikomo AnaKu anu niputoweKu, Iko numpakadombo raraKu.”

Tutura muli nu tutua Yesus

²³Ri tempo Yesus numpamula pukarajaaNa nitahere umuruNa tolumpulu mpae. Numbatintuni pumbarata nu tumata, Ia ana Yusuf, Yusuf ana i Eli.

²⁴Eli ana i Matat, Matat ana i Lewi, Lewi ana i Malkhi, Malkhi ana i Yanai, Yanai ana Yusuf, ²⁵Yusuf ana i Matica, Matica ana i Amos, Amos ana i Nahum, Nahum ana i Hesli, Hesli ana i Nagai, ²⁶Nagai ana i Maat, Maat ana i Matica, Matica ana i Simei, Simei ana i Yosekh, Yosekh ana i Yoda, ²⁷Yoda ana i Yohanan, Yohanan ana i Resa, Resa ana i Zerubabel, Zerubabel ana i Sealtiel, Sealtiel ana i Neri, ²⁸Neri ana i Malkhi, Malkhi ana i Adi, Adi ana i Kosam, Kosam ana Elmadam, Elmadam ana i Er, ²⁹Er ana i Yesua, Yesua ana i Eliezer, Eliezer ana i Yorim, Yorim ana i Matat, Matat ana i Lewi, ³⁰Lewi ana i Simeon, Simeon ana i Yehuda, Yehuda ana Yusuf, Yusuf ana i Yonam, Yonam ana i Elyakim, ³¹Elyakim ana i Melea, Melea ana i Mina, Mina ana i Matata, Matata ana i Natan, Natan ana Daud, ³²Daud ana i Isai, Isai ana i Obed, Obed ana i Boas, Boas ana i Salmon, Salmon ana i Nahason, ³³Nahason ana i Aminadab, Aminadab ana i Admin, Admin ana i Arni, Arni ana i Hezron, Hezron ana i Peres, Peres ana i Yehuda, ³⁴Yehuda ana i Yakub, Yakub ana i

Ishak, Ishak ana i Abraham, Abraham ana i Terah, Terah ana i Nahor, ³⁵Nahor ana i Serug, Serug ana i Peleg, Peleg ana i Eber, Eber ana i Salmon, ³⁶Salmon ana i Kenan, Kenan ana i Arpakhsad, Arpakhsad ana i Sem, Sem ana i Nuh, Nuh ana i Lamekh, ³⁷Lamekh ana i Metusalah, Metusalah ana i Henokh, Henokh ana i Yared, Yared ana i Mahalael, Mahalael ana i Kenan, ³⁸Kenan ana i Enos, Enos ana i Set, Set ana i Adam, Adam ana i Alatala.

Yesus nipehori Madika nu Heta

4 ¹Tempo Yesus numpalaihi biningga Yordan, Ia naponu ante Nyoha Gaha. Ia nikeni nu Nyoha Gaha nalau ri karawa bai. ²Rihee Yesus nipehori Madika nu Heta patampulu eo kahaena. Tempo Yesus rihee Ia hodi numbanai nuapa-nuapa, naliupa patampulu eo naoro mpuumo taiNa. ³Nanguli Madika nu Heta ka Ia, “Ane Komi mpuu-mpuu Ana Pue Alatala, owumo watu ei majadi pumbanai.” ⁴Nihabo Yesus, “Naria nitulihhi riara nu Buku Gaha, hodi hawo pumbanai anu mumpakatuwu manuhia.”

⁵Naopu ee Madika nu Heta nanggeni Yesus nalau rikalangana, hawo hampida mata nipupuolena ka Ia pura-pura pumparenta ri dunia.

⁶Nanguli Madika nu Heta ka Ia, “Pura-pura pumparenta ante karamba nu dunia etu, kuwoika Komi habana pura-pura etu niwoika yaku, pade yaku mumbawoika kahema anu kupodota. ⁷Ane Komi matundu ante Yaku, pura-pura etu kuwoika Komi.” ⁸Tapi nihabo Yesus, “Naria nitulihhi riara nu Buku Gaha, ‘Matundumo iko ka Pue Alatalamu. Pade hawo ka Ia iko miPue.’”

⁹Naopu ee Madika nu Heta nanggeni Yesus ri Yerusalem, riwumbu nu Bola Pue Alatala. Nanguli ia ka Yesus, “Ane Komi mpuu-mpuu Ana i Alatala, puttingganawumo loko ri hei. ¹⁰Habana naria nitulihhi riara nu Buku Gaha, ‘Alatala kana mangowu malaekaNa mumbahaliku Komi mpakabelo, ¹¹pade mumbatande Komi ante palena ala kadaMi hodi mambela watu.’” ¹²Nihabo Yesus, “Naria nitulihhi riara nu Buku Gaha, ‘Neemo iko mumpehori Pue Alatalamu.’”

¹³Naopupa Madika nu Heta numpemehori Yesus ante numpingaya dala, nalaimo ia pade numpupea loga belo.

Yesus nanjili ri Galilea

¹⁴Naopu ee, Yesus naponu ante Nyoha Gaha, pade nanjilimo Ia ri Galilea. Kareba Yesus natulelemo ri pura-pura tumata ri ngata ee. ¹⁵Ia numpaguru ri bola-bola mpiPue, pade pura-pura tumata numbatua Ia.

Yesus hodi nitarima ri ngataNa mboto

16 Nalaumo Yesus ri Nazaret tampa Ia nipakabohe. Ri Eo Mpinonto ewa kabiahana, Ia nalau ri bola mpiPue. Ia nionggo madota numbahha Buku Gaha tu Yahudi. 17 Niwoika Ia buku anu nitulihii Nabi Yesaya. NibukaNa buku ee pade nirataNa anu nitulihii ewa ei,

18 “Nyoha Gaha nu Alatala naria

ante Yaku,
habana Iamo numpitolozi
Yaku mumpahampeka
Kareba Belo ka tumata anu
napakahii katuwuna.
Ia nangowu Yaku manguli ka
tumata anu nitawani hira
kana rapawia,
bu nanguli ka tumata anu
naburo hira kana mamala
meole mpanjili.

Ia nangowu Yaku mumbapawia tumata anu nipubatua,
19 pade Yaku numbapatulele naratamo tempona

Pue Alatala mumpupuole pumputoweNa ka manuhia.”

20 Naopu nibahaNa buku ee, nibiluluNa pade nipupanjiliNa ka tupujagai rihee, pade nikatokomo Ia. Pade pura-pura tumata riara nu bola mpiPue ee nangole Ia. 21 Yesus mpamula numpaguru hira iwei, niuliNa, “Anu nibahaKu riara nu Buku Gaha wuwei, nadupamo ri tempo komi nangepena.” 22 Pura-pura tumata rihee, numpakakono anu niuliNa, pade naheramo hira nangepe Ia. Habana nabelo mpuu anu niuliNa. Nanguli hira, “Hodi Ia ei ana Yusuf?” 23 Nanguli Yesus ka hira, “Natantu niulimi purapahi ei ka Yaku, ‘Doktoro, pakulihii koroMu mboto^b.’ Pura-pura kuaha anu niepeka anu nibabeMi ri Kapernaum, babemo etu ri hei ngataMi mboto.” 24 Pade nanguli Yesus, “Tora, kakonona hodi naria nabi anu nionggotaka hangana ri ngatana mboto. 25 Anu niuliKu ei nakono. Ri tempo nabi Elia nggaulu, nadea mpuu banggele natimbala ri Israel. Tolumpae hantanga kahaena hodi nauda, najadi kaorontai anu hodi naria kahimbaina ri ngata ee. 26 Naupa iwee Pue Alatala hodi nangowu Elia nalau ka hadua banggele anu



Buku Gaha nggaulu (4:19)

^b 4:23 Doktoro, pakulihii koroMu mboto: Batua nu purapahi ei iamo pupuolemo ka kami ane Komi nakuaha.

natimbala ri Israel, tapi niowuNa Elia nalau ka hadua banggele anu natimbala ri Sarfat ri ngata Sidon, anu hodi tu Israel. 27 Iwee mbui ri tempo nabi Elisa, nadea tu Israel anu nadua bohe, tapi nau hadua loko ri hira hodi naria anu nipakabelohi, hawo Naaman haduana tu Siria ee anu nipakabelohina.” 28 Nangepe ee narau mpuu pura-pura tumata ri bola mpiPue ee. 29 Nionggo hira pade nipupalaira Yesus loko ri ngata ee, pade nikenira ribingge nu bulu ri Nazaret ngatara mboto. Patujura rapakanawura Yesus rihalu. 30 Tapi Yesus nulumako ritotongo nu tumata dea, pade nalaumo Ia.

Yesus riara bola mpiPue ri Kapernaum

31 Naopu ee nalaumo Yesus ri Kapernaum, hongu ngata ri Galilea, pade numpaguru rihee ri Eo Mpinonto. 32 Nukumaa hira nangepe pumpaguruNa, habana nuapa anu niuliNa naponu ante kuaha.

33 Riara nu bola mpiPue ee, naria hadua tumata anu nipiuhua nu heta, pade nungare ante huara namangga, Nanguli ia, 34 “He Yesus turi Nazaret! Napa urusaMu ante kami? Komi narata numpakahuhu kami? Ninjaniku hema Komi: Tumata Nagaha loko ri Alatala” 35 Tapi Yesus numbataburaroji heta ee, niuliNa, “Kalinomo! Pihuwumo loko ri tumata etu.” Pade heta ee numbadunggahaka tumata ee ritotongo nu tumata dea, bu nihuwumo ia, pade hodi nipakaduana tumata ee. 36 Pura-pura tumata rihee nukumaa, pade hira nuteha hadua ante ntanina, niulira, “Nabelo mpuu teha nu tumata ei, habana ante kuahaNa nipupalaiNa heta, bu nalau mpuumo!” 37 Natulelemo kareba Yesus ri pura-pura ngata ee.

Yesus numpakabelo matua banggele Petrus bu tumata ntanina

38 Naopu ee, Yesus numpalaihi bola mpiPue ee, pade nalau ri bola Simon. Matua banggele Simon nadua ntomo bu nakokora, pade tumata anu rihee mirapi ala Yesus mumbatulungi ia. 39 Nionggomo Yesus ri hinjori nu banggele ee, pade nipupalaiNa dua kokora ee. Nabelopa dua kokora ee, matua Simon halau nimbangu pade numpahadia pumbanai ka Yesus ante tumata anu naria rihee. 40 Nalerupa, pura-pura tumata nanggeni hampihuwura anu nadua ante numpingaya dua malau ka Yesus. Yesus numbadika PaleNa rikoro pura-pura tumata anu nadua ee ante numpakabelohi hira. 41 Nihuwumo heta-heta ee loko ri tumata dea pade nungare-ngare, “Komimo Ana Pue Alatala!” Tapi Yesus numbatukarau hira, pade nitagiNa neemo mujarita, habana ninjaniramo Ia Madika Tupumpakahalama.

Yesus numpaguru ringata-ngata ntanina

⁴² Meile mpadondona, Yesus numpalaihi ngata ee, pade nalau ri tampa anu nalino. Tumata dea nangelo Ia, wetu niratara, nitagiramo Ia ala nee mumpalaihi hira. ⁴³ Pade niuliNa ka hira, “Kareba belo Pumparenta nu Alatala kana Kupatuleleka mbui ringata-ngata ntanina, etumo habana Alatala nangowu Yaku narata ri dunia.” ⁴⁴ Pade Ia numbapatulele kareba belo ri bola-bola mpiPue ri ngata Yudea.

Yesus numpitolohi AnaguruNa anu pamulana

5 ¹Ri hongu tempo, nionggomu Yesus ri wiwi nu rano Genesaret^c. Pade tumata dea numbiaho madota mangepe pangajari loko ri Alatala. ²NioleNa rongu hakaya ri wiwi nu rano. Tupangelo bau nanau puramo numbatopohi jalara. ³Nihawimo Yesus riara nu hongu hakaya, hakaya Simon, pade Ia mirapi Simon ala mumbawohe hakayana makawao loko ri wiwi nu rano. Nikatokomo Yesus bu numpaguru tumata dea loko ri wonggo nuhakaya. ⁴Naopupa numpaguru, Yesus nanguli ka Simon, “Wohemo hakayamu malau rikandalana, tendemo jalamu, ala komi mumbarata bau.” ⁵Nihabo Simon, “Guru, humambengimo kami nukarajaa nangelo bau, hodi naria nuapa-nuapa anu nirataka, tapi habana Komi nangowu, kana kutendemo jalaku.” ⁶Naopu nitendera jala, nadea mpuu bau nihokora hampe jalara mpamula maheka. ⁷Naopu ee nironderamo roa-roara ala mumbatulungi hira. Pade naratamo hira numbaihi rongu hakayara ee ante bau, hampe kukoipa malodo. ⁸Wetu Simon Petrus nangole ee, nutumbukotumo ia ri ngayo Yesus bu nanguli, “Pue, palaimo loko ante yaku, habana yaku ei tumata nadoha.” ⁹Simon ante pura-pura tumata anu nuhinggani ante ia, nahera nangole kadea nu bau anu nihokora. ¹⁰Wetu mbui ante roa-roa hampukarajaa Simon, etumo Yakobus ante Yohanis, ana-ana i Sebedeus. Yesus nanguli ka Simon.

“Neemo maeka! Mpamula ei, iko Kupakajadi tupujala manuhia.” ¹¹Naopupa hira numbataja hakayara nalau rikabaina, nipalaihira puramo nuapa anu naria ante hira, pade numbatintuni Yesus.

Yesus numpakabelohi hadua tumata anu nadua bohe

¹²Ri tempo Yesus naria ri hongu ngata, naria hadua langgai anu nadua bohe. Wetu niolena Yesus, nutunggamo ia hampe

^c 5:1 Genesaret: Rano Genesaret niuli mbui rano Galilea.

ri tana pade nanguli, “Pue, ane Komi madota, Pue mamala mumpakabelohi yaku.” ¹³Yesus numbatui tumata ee bu nanguli, “Yaku Madota, mabelomo iko.” Ri tempo ee mbui, haliu nabelo dua nu tumata ee. ¹⁴Pade Yesus numbatagi tumata ee, ala neemo muteha ka tumata ntanina ane ia nabelomo, nanguli Yesus, “Koimo ka imam, ala raolena ane iko nabelomo, pade woimo binata anu rahambaleka Pue Alatala, ewa anu niparenta riara nu atura Pue anu nitulihhi Musa. Etu majadi tanda ka pura-pura tumata ane iko nabelomo.” ¹⁵Naupa iwee nantambai kadeana tumata numpatulele kareba Yesus, pade nadea tumata narata mangepe Ia, bu rapakabelohi loko riduara. ¹⁶Naopu ee, nalaumo Yesus nuhambaya ri tampa kalinona.

Yesus numpakabelohi tumata napunggu

¹⁷Ri hongu eo tempo Yesus numpaguru, naria bara hanggia dua tu Farisi ante tupande ri atura Musa nikatoko rihee. Hira narata loko ri Yerusalem, bu ngata-ngata ri Galilea ante Yudea. Kuaha Pue naria ante Yesus, hampe Ia namala numpakabelohi tumata nadua. ¹⁸Pade naratamo bara hanggia dua tumata numbakowa tumata napunggu ri wonggo nu ompa. Nipahimbukura nangelo dala ala mamala manggeni tumata ee mihua riara nu bola, pade radikara ri ngayo Yesus. ¹⁹Tapi hira hodi namala nanggeni mpihua tumata ee, habana nadea mpuu tumata rihee. Jadi nindakemo hira ri wonggo ata nu bola ee, nibonggahira atana pade nipupanaura tumata napunggu ee ante ompana ri olo nu tumata dea, ri ngayo Yesus. ²⁰Tempo Yesus nangole pumparayahara, nanguli Ia, “Hampihuwu, dohamu niampunimo.” ²¹Tapi tupande ri atura Musa ante tu Farisi ee numpikiri riarantaina, “Hema tumata anu numbalalai Alatala ei? Hema anu mamala mumbaampuni doha ane hodi Alatala mboto?” ²²Tapi ninjani Yesus pumpikirira, pade nanguli Ia ka hira, “Nanggia komi numpikiri ewa etu riarantaimi? ²³Umbapa anu nagampa rauli, ‘Niampunimo dohamu,’ atau manguli, ‘Pimbangumo bu pulumakomo.’ ²⁴Tapi ala ranjanimi, ri dunia ei Yaku, Ana Manuhia mumbapupuole ka komi ane Yaku nakuaha mumbaampuni doha.” Pade Nanguli Yesus ka tumata napunggu ee, “Pimbangumo, onggotakamo ompamu, bu panjilimo.” ²⁵Tumata ee haliu nimbangu ri ngayora, nionggotakana ompana, nanjilimo ia pade numbatuia Alatala. ²⁶Pura-pura tumata rihee nukumaa nangole, pade nituanakara Alatala. Hira mbui naeka pade nanguli, “Eo ei kami nangole kajadia anu numpakahera.”



Tumata napunggu nipupanau ri ngayo Yesus (5:19)

Lewi tupuhungara bahitee numbatintuni Yesus

²⁷Ri tempo Yesus nihuwu, ia nangole hadua tupuhungara bahitee anu nuhangaka Lewi, ia nikatoko ri tampa pukarajaana. Nanguli Yesus ka ia, “Tintunimo Yaku.” ²⁸Pade nionggomo Lewi nipalaihina puramo nuapa anu naria ante ia, pade numbatintuni Yesus.

²⁹Naopu ee Lewi nubabe puhuha bohe ka Yesus ri bolana. Nadea tupuhungara bahitee ante tumata ntanina numbanai nuhinggani ante hira. ³⁰Tu Farisi bu tupande ri atura Musa, nanggambunta ka anaguru Yesus, nanguli ia ka hira, “Nanggia komi pura numbanai bu nanginu nuhinggani ka tupuhungara bahitee ante tumata anu nadoha?” ³¹Nihabo Yesus ka hira, “Hodi tumata naseha anu paraluu rapakulihi, tapi tumata nadua. ³²Wetu mbui ante Yaku. Yaku narata hodi mumbaronde tumata anu numbaangga korona nakono, tapi Yaku narata mumbaronde tumata anu numbaangga korona nadoha ala hira majea.”


Anaguru Yesus hodi napuaha ri tempona Yesus nuhinggani ante hira

³³Ri tempo ee naria bara hanggia dua tumata nanguli ka Yesus, “Anaguru Yohanis naharo napuaha ante nuhambaya. Wetu mbui tu

Farisi. Tapi nanggia anaguruMu hodi napuaha? Hira numbanai ante nanginu njuu.” ³⁴Nihabo Yesus ka hira, “Natantumo hodi naria turata riara nu puhuha puboti raowu mapuaha, ri tempo boti langgai danaria ante hira. Wetu mbui Yaku, ane Yaku da nuhinggani ante anaguruKu, hira hodi mapuaha. ³⁵Tapi, marata tempona boti langgai ee raala loko ante hira, tempo eemo hira mapuaha.” ³⁶Yesus mbui numbateha hongu purapahi ka hira, “Hodi naria tumata anu numbabitehi pakea bouna, ala mumbarata kae bou pade radika ripakea natua. Ane ewa etu, pakea anu nabou kana mabite, pade putampala anu nabou ee hodi mahuka ripakea anu nahaemo.” ³⁷Wetu mbui, angguru anu nabou hodi radika ri tampa pumboli anu natua. Ane ewa etu angguru anu nabou ee mumpakagero pumboli anu natuamo. Kaopuna angguru ee mabubu, bu pumboli ee magero.^d ³⁸Angguru bou kana radika ripumboli anu nabou mbui. ³⁹Tumata anu nariamo nanginu angguru anu natua, tamo madota manginu angguru anu nabou, natantumo ia manguli, “Narahapa angguru anu natua.”

Anaguru Yesus numpupuhi gandum ri Eo Mpinonto

6 ¹Ri hongu Eo Mpinonto, Yesus ante anaguruNa nuliu ri hongu tinalu anu nituda gandum. Ri tempo ee anaguruNa numpupuhi gandum ee, nitiera pade ni naira. ²Naria bara hanggia dua tu Farisi rihee, nanguli, “Nanggia komi nubabe nuapa anu nitagi ri Eo Mpinonto ewa parenta nu Alatala anu nitulih i Musa?” ³Nihabo Yesus, “Ninjanimimo teha nu Daud, ri tempona ia ante tumata-tumata anu numbatintuni ia naoro taina? ⁴Daud nihua riara Bola Pue Alatala, nangala roti anu rawoika Alatala. Ninaina pade niwoina mbui ka tumata-tumata anu numbatintuni ia. Kakonona riara nu atura Pue anu nitulih i Musa, hawo imam anu mamala mumbanai roti ee.” ⁵Pade nanguli mbui Yesus, “Ana Manuhia nakuaha mumbapakatantu nuapa anu mamala rababe ri Eo Mpinonto.”



Gandum (6:5)

^d **5:37** Batua nu rongu purapahi anu niuli Yesus ei (riyat 36 ante 37) iamo: Pumpatuduhi Pue Yesus anu nabou hodi mamala ragalo ante ada nu tu Yahudi anu nahaemo.

Yesus numpakabelo tumata anu namate hambira palena

6 Ri Eo Mpinonto ntanina, Yesus nalau numpaguru ri bola mpiPue. Rihee naria tumata anu namate hambira palena. 7 Rihee naria mbui tupande ri atura Musa ante tu Farisi anu nangelo kahala Yesus. Niolera mpakabelo nee-nee Yesus mumpakabelo tumadua ri Eo Mpinonto, ala mamala rapangadura. 8 Tapi ninjani Yesus pumpikirira, jadi niuliNa ka tumata anu namate hambira palena ee, “Kamaimo! Pimbangu Pionggomo ritotongo ntumata dea.” Nalaumo tumata ee nionggo rihee. 9 Nanguli Yesus ka hira, “Kupikutana ka komi pura: Mumbatintuni parenta Alatala anu nitulihii Musa, umba anu mamala rababe ri Eo Mpinonto, mubabe anu nabelo atau mubabe anu nadaa, mumpakahalama nyoha ntumata, atau mumbapatehi?” 10 NioleNa pura tumata rihee pade nanguli Ia ka tumadua ee, “Ulu wimemo palemu” Nibabenamo ewa ee, pade nabelomo palena. 11 Nangole ee, narau mpuu tupande ri atura Musa ante tu Farisi ee, pade nujaritamo hira, nuapa anu rababera ka Yesus.

Yesus numpitolohi hampulurudua anaguruNa

12 Ri tempo ee nalaumo Yesus muhambaya ri kabuntina. Rihee humambengi Ia nuhambaya ka Alatala. 13 Kamaile mpadondona, nirondeNamo tudea anu numbatintuni Ia, pade nipitolohiNamo hampulurudua tumata loko ante hira, pade nihangaNa huro Pue. Hira anu nipitolohiNa ee iamo: 14 Simon anu nihangaNa mbui Petrus, Andreas toi Simon, Yakobus ante Yohanis, Filipus ante Bartolomeus, 15 Matius ante Tomas, Yakobus ana Alfeus, Simon turi Selot^e, 16 Yudas ana Yakobus, ante Yudas Iskariot anu mumbapubalu Yesus.

Yesus numpangajari ante numpakabelo tumata dea

17 Naopu ee nutuamo Yesus loko ri kabuntina nuhinggani ante hampulurudua anaguruNa pade nitaa bu nionggom Ia ri tampa anu nalimba. Rihee, nadeamo tumata numbatintuni Ia bu nadea tumata ntanina anu narata loko ri ngata Yudea, Yerusalem, ante ngata-ngata Tirus, Sidon anu ri wiwi ntahi. 18 Hira narata madota mangepe Yesus mumpaguru, ante mirapi rapakabelohi loko riduara. Wetu mbui tumata anu nipihua nu heta nipakabelohi Yesus. 19 Pura-pura tumata dea

^e 6:15 Simon: Hadua anggota partai nasionalis anu nuhanga “Selot” anu numbaewa pumparenta nu Roma.

numpahimbuku mumbatui Yesus, habana naria kuaha anu nabohe nihuwu loko rikoroNa mboto anu mamala mumpakabelohi hira pura-pura.

Kahana ante kahuha

- 20 Yesus nangole anaguruNa pade nanguli Ia ka hira,
“Nahanamo komi anu napakahi eo ei, habana komimo anu majadi tudea riara Pumparenta nu Alatala.
- 21 Nahanamo komi anu naoro eo ei, habana komi kana rapakabohu.
Nahanamo komi anu nutumangi eo ei, habana komi kana rapakadombo.
- 22 Nahanamo komi ane komi rapuwululumata ntumata, hodi nitarima, nihalai, bu nibaliaka,
habana komi numbatintuni Yaku Ana Manuhia.
- 23 Wetu mbui nibabe nggaulu ka nabi-nabi nu Alatala loko ritutuara nggaulu.
Ane ewa ee madupa ka komi, komi kana madombo habana komi kana mumbarata katuwu anu mabelo riara huruga.
- 24 Tapi nahilakamo komi anu nahugi eo ei habana niratami puramo nuapa anu numpakadombo komi, komi tamo madombo.
- 25 Nahilakamo komi anu nabohu eo ei, habana komi kana maoro!
Nahilakamo komi anu nariki eo ei, habana komi kana mahuha rara ante mutumangi.
- 26 Nahilakamo komi, ane komi nituanaka pura-pura tumata, habana nabi-nabi tupudawa mbui nituia nu tutuara nggaulu.”

Putowemo balimu

27 “Tapi komi anu mangepe Yaku, Kuuli ka komi, putowemo balimu, pade babe mpakabelo tumata anu numbapuwululumata komi. 28 Ganehi tumata anu numbatunda komi, pade puhambayaka tumata anu nadaa ante komi. 29 Ane rapana maria tumata mumbahapa kulimpimu, nee rapihawa. Woika mbui hambirapa. Ane maria tumata mangala jubamu, woika mbui pakeamu. 30 Ane maria tumata mirapi bara nuapa ante komi, woikamo. Pade ane anumu raala ntumata, neemo rapirapi mpanjili. 31 Napa anu rapodotami rababe ntumata ntanina ka komi, babemo ewa etu mbui ka hira. 32 Ane komi hawo numbaputowe tumata anu numbaputowe komi dodo, neemo manjarumaka Alatala mumbaganehi komi ante kabelomu etu. Habana tumata anu nadoha mbui numbaputowe tumata anu numbaputowe hira. 33 Ane komi hawo

nubabe kabelo ante tumata anu nabelo ka komi, neemo manjarumaka Alatala mumbaganehi komi. Iapa tumata anu nadaa numbabe ewa ee mbui. ³⁴Pade ane komi mumbawoika bara nuapa ralumbe hawo ka tumata anu mamala mumbapupanjilina, neemo manjarumaka Alatala mumbaganehi komi ante kabelomu etu. Tumata nadoha mbui numbatintunida doina ka tumata anu nadoha, pade niperapina mpanjili. ³⁵Kabelona neemo ewa etu! Tapi putowe tumata anu numbatintunida komi ante babemo anu nabelo ka hira. Pade woikamo tumata mumbalumbe bara nuapa ante komi bu neemo manjarumaka panjilina. Ane wetu pukainggumu, mabohe mpuu kabelo rawoika komi, pade majadi ana-ana loko ri Alatala anu nakuaha, habana Ia mbui nubabe anu nabelo ka tumata anu nadaa, bu tumata anu hodi ninjanina nuhukuru. ³⁶Komi mbui kana miputowe nahimbai ewa piputowe nu Alatala Tuamami.”

Nee rapakahalami tumata ntanina

³⁷“Nee rapakahalami tumata ntanina, ala komi hodi rapakahala nu Alatala. Nee mumbahuku tumata ntanina, ala komi hodi rahuku. Ampunimo tumata ntanina ala komi raampuni nu Alatala. ³⁸Woimo ka tumata ntanina, ala Alatala mbui mumbawoi ka komi. Pumbawoi nu Alatala mpuu-mpuu nabelo, kadeana nahimbai ewa puhuka naponu niaho bu nigoya ala mamala raihi mpanjili hampe nehuliwi. Habana puhuka anu nipakemi ka tumata ntanina etu mbui rapuhuka ka komi.”

³⁹Yesus nuteha hongu purapahi ka tumata anu numbatintuni Ia, niuliNa, “Hodi mahipato tumata naburo mumbapanini tumata naburo. Anu natantumo hira rudua hawo manawu mpahanggani riara lowu. ⁴⁰Hodi naria anaguru anu nilabi kapandena loko ante guruna. Tapi anaguru anu natamamo kana majadi mahimbai ewa guruna. ⁴¹Nanggia komi namala nangole doha nu roami anu nakodi ewa karupu rimatana, tapi dohami mboto nabohe ewa baloti rimatamu, hodi nioleme? ⁴²Birumba komi mamala manguli ka roa, ‘hee, hampihuwu, mai kulalihi karupu rimatamu,’ iyapa baloti rimatamu mboto hodi nioleme? Komi hawo nabelo ringudu! Lalihi ntani baloti riara matamu, pade mamala komi mangole bu mumbalalihi karupu ri mata nu hampihuwu.”

Ihi nu rara niole loko ripukainggu

⁴³Hodi naria kai anu nabelo, nuwua anu nadaa. Hodu mbui naria kai anu nadaa, nabelo wuana. ⁴⁴Pura-pura kai, ninjani loko riwuana.

Natantumo loho nggarui hodi nuwua wua nu ara bu walaa nggarui hodi nuwua ka angguru. ⁴⁵Wetu mbui manuhia anu nabelo rarana, natantumo pukaingguna ante putehana nabelo mbui. Habana anu niboli riarrantaina anu nabelo pura. Wetu mbui ante tumata anu nadaa rarana, natantumo pukaingguna ante putehana numbatintuni nuapa anu naria riarrantaina, habana nuapa anu niboli riarrantaina anu nadaa pura. Habana nuapa anu niuli ntumata nihuwu loko riarrantaina.

Tumata anu nipahana ante tumata anu hodi nipahana

⁴⁶Nangulimo Yesus, “Nanggia komi numbaronde Yaku, ‘Pue, Pue,’ tapi hodi numbabe ewa nuapa anu niuliKu ka komi. ⁴⁷Kupahimbaika ewa hema tumata anu narata ante Yaku, nangepe lolitaKu pade nibabena? ⁴⁸Ia nahimbaika ewa tumata anu numpupiongo bola, nikaena pakandala tana pade ia nubabe watu pandasi. Ri tempo lono pade ue nanggabuntu numbarumpa bola, bola ee hodi nugoya habana nippiongo ri wonggo nu watu pandasi anu naroho. ⁴⁹Tapi ane tumata hawo nangepe lolitaKu pade hodi nibabena, ia nipahimbaika ewa tumata anu nubabe bolana hawo ri wonggo nu tana dodo, hodi numpake watu pandasi. Ri tempo lono pade ue nanggabuntu numbarumpa bola, bola ee halau naombo pade mpuu-mpuu nagero.”

Yesus numpakabelohi batua nu kapala huradadu ri Kapernaum

7 ¹Naopupa Yesus numpahampe tehaNa ka tumata dea, nalaumo Ia ri ngata Kapernaum. ²Rihee naria hadua kapala nu huradadu tu Roma ante hadua batuana anu nipayowena. Batuana ee nadua ntomo pade maparamo mamate. ³Tempo kapala huradadu ee nangepe Yesus narata ri ngata ee, niowunamo bara hanggia dua tutua-tutua tu Yahudi malau bu mirapi tulungi ala Yesus mumpakabelohi batuana ee. ⁴Wetu tutua-tutua tu Yahudi ee nahirata ka Yesus, hira mpuu-mpuu nirapi tulungi ala Yesus mumbatulungi kapala huradadu ee, nanguli hira, “Pue, tumata ei mahipato ratulungi, ⁵habana ia nabelo mpuu ka kita tu Yahudi, pade numbawoi doi ka kami ala rapubabe bola mpiPue.”

⁶Iweepa, nalaumo Yesus nuhinggani-nggani ante hira. Wetu Yesus namonju ri bola kapala nu huradadu ee, kapala huradadu ee nangowu roa-roana mumpahampeka patetehina ka Yesus bu nanguli, “Pue tamo Komi mahuha-huha marata ri bolaku, yaku ei hodi mahipato mantarima Komi ri bolaku ⁷Etumo habana yaku hodi mahipato malau muhirata ka Komi. Tapi, ulimo bara hambela bahamu ka yaku natantumo batuaku etu mabelomo, ⁸habana yaku ei tumata anu

niparenta mbui, pade naria mbui huradadu ri tambe mparentaku, nuapa-nuapa anu kuuli, nibabera pura. Ane kuuli ka hadua ‘Koimo!’ Nalau mpuumo ia. Ane kuuli ka hadua, ‘Kamaimo!’ Narata mpuumo ia. Pade ane kuowu mbui hadua batua, ‘Babe ei!’ Matantumo kana rababena.”⁹ Naheramo Yesus nangepe ee pade ningalimo Ia ka tumata dea anu numbatintuni Ia pade nanguli, “Nabohe mpuu pumparahaya nu tumata ei, taapa naria nirataku pumparahaya ewa ei naupa ri olo nu tu Israel.”¹⁰ Wetu hira nanjili ri bola nu kapala huradadu ee, niratara batua ee nabelomo loko riduana.

Yesus numpakatuwu mpanjili hadua kabilaha ri Nain

¹¹ Taapa nahae loko ri ee, nalaumo Yesus ri hongu ngata anu nuhangaka Nain. AnaguruNa nalau mbui nuhinggani-nggani ante Ia, pade nadea mbui tumata numbatintuni Ia. ¹² Tempo Yesus namonjumo ribubaa nu ngata ee, Ia nuhimputomu ante tumata anu nanggeni mboa nihuwu loko riara ngata. Anu namate ee, hadua ngana kabilaha, ana njadua nu hadua banggele anu natimbalamo. Nadea tumata ri ngata ee numbatintuni tina nu ngana ee. ¹³ Wetu Yesus nangole banggele ee, naahimo raraNa pade nanguli ka banggele ee, “Neemo mutumangi.”¹⁴ Yesus numbakamonjuhi pukowa mboa ee, pade nituiNa. Tupukowa mboa ee nitaa, pade nanguli Yesus, “He kabilaha, Pimbangumo!”¹⁵ Kabilaha ee haliu nimbangu, nikatoko bu nujarita. Pade niwoi Yesusmo ngana ee ka tinana. ¹⁶ Pura-pura tumata anu naria rihee, nahera nukumaa pade numbatuia hanga Pue, nanguli hira, “Naratamo nabi bohe ri totongota! Alatala naratamo mumpakahalama tudeaNa!”¹⁷ Natulelemo kareba Yesus ri pura-pura ngata Yudea bu ngata anu namonju rihee.

Yesus ante Yohanis Tupubaptis

¹⁸ Naopupa Yohanis nangepe pura-pura kareba Yesus anu niuli nu anaguruna ee, ¹⁹ nirondenamo rudua anaguruna, pade niowuna nalau ka Yesus mikutana ewa ei, “Komi etumo Madika Tupumpakahalama anu marata ewa janji nu Alatala, bara damariapa ntanina anu kapupeahi?”²⁰ Nalaumo rudua anaguru Yohanis ee ka Yesus bu nanguli, “Yohanis Tupubaptis nangowu kami mikutana ka Komi: Komi etumo madika tupumpakahalama anu marata ewa janji nu Alatala, bara damariapa tumata ntanina anu kapupeahi?”²¹ Tempo ee, nadea tumata nipakabelohi Yesus loko riduara bu pantidomakara, pade Yesus mbui numpupihuwu heta loko ri tumata anu niphuhulampuna. Nadea

mbui tumata naburo niole mpanjili. ²² Jadi Yesus nihabo pumpikutana anaguru Yohanis ee, niuliNa, “Panjilimo, uli ka Yohanis nuapa anu nioleme bu nuapa anu niepemi: tumata naburo niole, tumata napunggu nulumako, tumata nadua bohe nabelo, tumata nabongo neepe, tumata namate natuwu mpanjili, bu kareba belo loko ri Alatala nipatuleleka ka tumata-tumata anu mpuu-mpuu napakahi.”^f ²³ Nahana mpuu tumata anu mpuu-mpuu numparahaya bu hodi numbatuwa Yaku”²⁴ Nanjilipa anaguru Yohanis ee, numpamulamo Yesus nutehaka tumata dea teha nu Yohanis, niuliNa, “Komi malau mangole nuapa ri karawa bai? Mangole kawoko anu nitawuhi nu puiri? Hod! ²⁵ Jadi nuapa tono anu malau raolemi? Tumata anu numpake pakea gaya? Hodi mbui, habana tumata anu nupakea gaya ante tumata anu nabelo katuwuna, hawo niari ri bola bohe piari nu madika. ²⁶ Jadi, komi mihuwu malau mangole nuapa? Malau mangole nabi? Nakono, Kuuli ka komi, Yohanis etu nilabipa loko rinabi. ²⁷ Habana Yohanis etumo anu niteha riara nu Buku Gaha ei. Pade nutehamo Alatala ka AnaNa:

‘Eimo huroKu,
Yaku nangowu ia numbariuluhi Komi,
ia kana mumpakahadia dalaMu.’

²⁸ Yaku naguli ka komi, “Loko ri pura-pura tumata anu nipaunaka ri dunia ei, hodi ria nau hadua tumata anu nabohepa loko ri Yohanis. Tapi, tumata anu nakodi ntoto riara Pumparenta nu Alatala, ia etumo anu nabohepa loko ri Yohanis.”²⁹ Pura-pura tumata ante tupuhungara bahitee anu nangepe lolita Yesus, numbatangaku kakono nu Alatala, habana hira nirapi korora rabaptis Yohanis. ³⁰ Tapi tu Farisi ante tupande ri atura Musa, numbatuwa dota nu Alatala ka hira, habana hira hodi nadota nibaptis Yohanis.

³¹ Nanguli Yesus, “Kupahimbaika ewa nuapa tumata-tumata anu natuwu ri tempo ei? Ewa nuapa hira? ³² Hira nirapahika ewa ngana-nangana anu nikatoko ri putomu pade numpungare ante roara, nanguli hira,

‘Kami numbatawuhi huli ka komi, tapi komi hodi nutaro.
Kami nuwaino tapi komi hodi nutumangi.’

³³ Anu niuliKu ei iwei batuana: Yohanis Tupubaptis narata, ia naharo napuaha bu hodi nanginu angguru, tapi komi nanguli,

^f7:22 Ri tempo nggaulu nitulih i nabi Yesayamo nuapa anu kana rababe nu Madika Tupumpakahalama. Etumo anu niphahampeka Yesus riara nu ayat ei pade Ia mbotomo anu kana mumpakadupa. Ole ri buku Yesaya 35:5-6; 61:1.

'Ia nihulampu nu heta!' ³⁴Yaku Ana Manuhia narata, numbanai bu nanginu ewa tumata biaha, tapi komi nanguli mbui, 'Ole! Tumata ee nadoko, tupanginu. Ia wega nu tupuhungara bahitee, ante wega nu tumata nadoha!' ³⁵Naupa iwee, kanoto nu Alatala natirole riara nggatuwu nu tumata anu numbatintuni dota nu Alatala."

Yesus ri bola Simon

³⁶Naria hadua tu Farisi, nuhangaka Simon, ia numbagaga Yesus ala marata mumbanai ri bolana. Yesus narata ri bola nu tu Farisi ee, pade nikatoko bu numbanai. ³⁷Ri ngata ee naria mbui hadua banggele anu natuwu riara nu doha. Tempo ia nangepe Yesus numbanai ri bola Simon, naratamo ia nanggeni hongu botolo anu nibabe loko ri watu pualam anu nahuli. Botolo ee nuihi lana nawongi. ³⁸Naratamo banggele ee niongan ri puri Yesus namonju ri kadaNa. Ia nutumangi pade numpakahii kada Yesus ante ue matana, bu nipawihina ante wuluana. Pade niekina kada Yesus bu nidikana lana anu nawongi ee. ³⁹Tempo Simon tu Farisi nangole nuapa anu nibabe nu banggele ee, nutehamo ia riarantaina, "Ane tumata ei mpuu-mpuu nabi, natantumo ranjaniNa hema banggele anu numbatui Ia, Pade ranjaniNa mbui banggele ee natuwu riara nu doha!" ⁴⁰Etumo habana Yesus nanguli ka tu Farisi ee, "Simon, maria anu Kuuli ka iko" Nihabo Simon, "Iyo Guru, ulimo." ⁴¹Nanguli Yesus, "Naria hadua tumata anu numpupuinda doina ka rudua tumata, hadua limatu doi pera, pade hadua limampulu doi pera.^g ⁴²Rudua tumata ei tamo nipakulera numbayari indara. Pade pue nu doi ee nanguli, 'Tamo bayari indami.' Jadi, loko rirudua tumata ei, hemapa anu nilabi pumputowena ante pue nu doi ee?" ⁴³Nanguli Simon, "Tumata anu nadeapa indana ee." Nihabo Yesus, "Nakono pihabomu etu." ⁴⁴Neilimo Yesus ka banggele ee, pade nanguli ka Simon, "Niolemumo nuapa anu nibabe nu banggele ei? Yaku nihua riara bolamu, hodi niwoimu ka ue, ala raputopohi kadaKu. Tapi banggele ei, numbatopohi kadaKu ante ue matana, pade nipawihina ante wuluana. ⁴⁵Iko, hodi numbaeki^h Yaku tempo Yaku narata. Tapi banggele ei hodi nitaa-taa numbaeki kadaKu mpamulana Yaku narata wuwei. ⁴⁶Iko, hodi numbabokahi balenggaKu ante lana wongi ewa kabiahata ka turata, tapi banggele ei numbadika lana wongi rikadaKu.

^g7:41doi pera: Riara baha Yunani, doi dinar. Hongu dinar nahimbai ante hewa nu hadua tupukarajaa haeo.

^h7:45 numbaeki: Riara ada nu tu Yahudi ane hira mumbatarima turata, hira kana numbaeki kulimpi nu turata ee.

⁴⁷Jadi, loko rikabohe nu pumputowena ee, ninjanitamo dohana anu nadea ee niampuni nu Alatalamo. Tapi ane tumata hawo kukoi dohana niampuni, habana ia numpikiri dohana hawo kukoi, kukoi mbui pumputowena." ⁴⁸Pade nangulimo Yesus ka banggele ee, "Dohamu niampunimo." ⁴⁹Tumata anu nikatoko numbanai hinggani ante Ia, nutehamo himbai hira, "Hema tumata ei, hampe Ia numpakule numbaampuni doha?" ⁵⁰Tapi, nanguli Yesus ka banggele ee, "Komi nipakahalamamo habana komi numparahaya Yaku. Panjilimo riara kabelo nu katuwu."

Banggele-banggele anu numbatulungi Yesus

8 ¹Taapa nahae naopu ee, nalaumo Yesus ringata-ngata bohe, pade ngata-ngata ntanina mbui nikalauNa mumbapatulele Kareba Belo Pumparenta nu Alatala. Hampulurudua anaguruNa numbatintuni Ia mbui. ²Naria mbui bara hanggia dua banggele anu numbapuroa hira. Banggele-banggele ee anu nipakabelo Yesusmo loko riduara, pade heta-heta nipupalaiNa loko rikorora. Naria hadua banggele anu nuhangaka Maria anu niuli mbui Magdalena. Ia nipawia Yesusmo loko ripapitu heta anu nihua rikorona. ³Naria mbui Yohana rongo i Khuza (Khuza ee tupuboli doi nu madika Herodes.) Pade naria mbui Susana bu nadeapa banggele ntanina. Banggele-banggele ee numpake doira mboto numbatulungi Yesus ante anaguruNa.

Purapahi nu tupuhawu

⁴Hodi naopu-opu tumata loko rimpingaya-ngaya ngata narata ka Yesus. Nadeapa hira nahiromu, niteha Yesusmo purapahi ka hira iwei, ⁵"Naria hadua tupuhawu lau nuhawu. Tempona ia nuhawu, naria hanu nanawu ri wiwi dala pade nilonggohi nu tumata bu niteo nu tonji hampe naopu. ⁶Naria mbui hanu anu nanawu ri tana nawatutowu. Ia natuwu, tapi hodi nahae nalelemo, habana tana ee nabai. ⁷Naria mbui hanu nanawu riara nu walaa nggarui, pade puuhawu ee natuwu nuhingga-nggani ante walaa nggarui, tapi kaopuna namate habana niupihi nu walaa nggarui. ⁸Pade naria mbui hanu anu nanawu ri tana anu naboya. Puuhawu ee nabelo mpuu katuwuna hampe nuwua hatu nggani kadeana." Naopu nanguli iwee, Yesus nuteha ante huara namangga, niuliNa, "Hema naria talingana, miepemo ia!"

⁹Naopu ee, nikutanamo anaguruNa ka Ia, nuapa batua nu purapahi ee. ¹⁰Nihabo Yesus ka anaguruNa, "Alatala numbaiko kapande ka komi pura-pura ala mumbanjani pangajari-pangajari Pumparenta nu

Alatala, anu natiwunihi. Tapi tumata-tumata ntanina nipayatuhu ante purapahi, ala batuana natiwunihi ka hiraⁱ. ¹¹Iwei batua nu purapahi etu: Puhawu etu nirapahika Lolita nu Alatala. ¹²Puhawu anu nanawu ri wiwi dala, nirapahika tumata anu nangepe Lolita nu Alatala, tapi narata Madika nu Heta, nialana pura Lolita Alatala ee loko riarantaira ala hira hodi mumparahaya bu hodi rapakahalamo loko ridoha. ¹³Puhawu anu nanawu ri tana nawatu, batuana tumata anu nangepe Lolita nu Alatala bu nitarimara ante hana nu rara, tapi hodi naro ho pumparahayara, nahimbai ewa tuda-tuda anu hodi nukale. Tempona hira ni pehori, nalipomo pumparahayara. ¹⁴Puhawu anu nanawu riara nu walaa nggarui, batuana tumata anu nangepe Lolita nu Alatala bu nipayatuhayara. Tapi hira da nakini rarara numpikirika katuwura ri dunia ei, hira madota matuwu mahugi ante mumpihana riara dunia. Pura-pura etu numbabalanggu katuwura, hampe hira tamo nuwua ante hodi nuguna. ¹⁵Puhawu anu nanawu ri tana naboya, etumo tumata anu nangepe Lolita nu Alatala pade nibolina ante rara anu nabelo bu nanoa. Hira bate-batena numbatintuni Lolita nu Alatala, hampe katuwura mpuu-mpuu nuguna.”

Purapahi puindo riara nu gumba

¹⁶Hodi naria tumata anu numpatuwu puindo pade nidikana riara nu gumba, bara rabolina ri tambe nu ranja. Tapi natantumo puindo ee radikana ri tampa anu nalanga ala tumata anu mihua riara bola mangole wanta nu puindo ee. ¹⁷Habana hodi naria anu nawuni anu hodi matiole, pade nuapa-nuapa anu hodi ninjani, kana ranjani pura. ¹⁸Jadi, boli mpakabelo riarantaimi pangajariKu anu niepemi. Habana hema anu mantarima pangajariKu ei, Alatala mumbatambai kapande ka ia, ala ia mantambaipa pumpahana. Tapi tumata anu hodi mumbatarima pangajariKu ei, kapande anu naria kokoi ante ia, kana raala mpanjili.

Tina Yesus ante hampihuwu-hampihuwuNa

¹⁹Ri hongu tempo, tina ante hampihuwu-hampihuwu Yesus narata madota muhimputomu ante Ia, tapi hodi namala habana nadea gaga tumata rihee. ²⁰Naria hadua tumata narata bu nanguli ka Yesus, “Guru, tinaMi ante hampihuwu-hampihuwuMi nupea rihawalikuna,

ⁱ 8:10 Nioleramo tapi hodi ninjanira nuapa batuana anu niolera. Nieperamo tapi hodi ninjanira nuapa kakonona anu niepera.

madota muhirata ka Komi.” ²¹Tapi nihabo Yesus ka hira, “Hema anu mangepe Lolita nu Alatala bu mumbatintuni nuapa anu niuliNa, hira etumo tinaKu ante hampihuwu-hampihuwuKu.”

Yesus numpupinonto pui ri bohe

²²Ri hongu eo, Yesus ante anaguruNa nihawi hakaya. Nanguli Yesus ka hira, “Kamaimo kita malau rihambote nu rano.” Pade nanggaliwomo hira. ²³Ritempona hira da nuhakaya, Yesus naturu. Hampigoli, naria pui ri bohe rirano ee. Ue mpamula nihua riara nuhakaya, pade hira riara bahaya. ²⁴Anaguru Yesus nalau ante Ia bu numbalike Ia, nanguli hira, “Guru, Guru, mamatemo kita!”

Yesus nimbangu pade numbatamporohi pui ante balumba ee. Pui ante balumba ee nitaa bu rano ee najadi naroo. ²⁵Pade Yesus nanguli ka anaguruNa, “Riumbada pumparahayamu?”

Pade naeka bu naheramo hira. Pade nujaritamo hadua ka roa ntanina, “Hema kakonona tumata ei, hampe pui ante balumba numbaturuhi parentaNa?”

Yesus numpakabelo tu Gerasa anu nipihua nu heta

²⁶Pade nihoremo Yesus ante anaguruNa ri tana tu Gerasa anu rihambote nu rano Galilea. ²⁷Naopupa ee Yesus nanau ri tana kabaina, naratamo hadua langgai loko ri ngata ee numbatotorou Yesus. Tumata ee nipihua nu heta-heta bu nahaemo ia hodi nupakea bu hodi niari riara bola, tapi ia niari ri tampa pudayo. ²⁸Tempo ia nangole Yesus, ia nungare pade nutumbukotu ri ngayo Yesus bu nujarita ante huara namangga, nanguli ia, “Yesus Ana nu Alatala anu nakuaha, nuapa urusaMu ante yaku? Yaku mirapi tulungi ante Komi ala Komi neemo mumpakadua yaku.” ²⁹Ia nanguli ewa ee, habana Yesus numbaowu heta ee nihuwu loko ia. (Tumata ee naharo niumbunjai nu heta. Jadi ala mumbajagai ia, ia nirante ante nibalanggu tapi nipuduhina pura, pade ia nikeni nu heta ri tampa kalinona).

³⁰Pade Yesus nikutana ka tumata ee, niuliNa, “Hema hangamu?”

Nihabo ia, niulina, “Legion.” (“Legion”, batuana “nadea” habana nadea heta anu nihua ka tumata ee). ³¹Pade heta-heta ee mpuu-mpuu nirapi tulungi ka Yesus, ala neemo numparenta hira mihua riara tampa pehuku anu hodi ria kaopuna.

³²Narapa ri tampa ee nadea mpuu wawu anu nanunggi ripipi nu bulu, pade heta-heta ee mirapi tulungi ante Yesus ala hira rawoi mihua riara nu wawu-wawu ee. Pade Yesus numbaturuhi pumperapi

nu heta-heta ee. ³³Pade nihuwumo heta-heta ee loko ri tumata ee bu nihuamo riwawu-wawu ee. Pade wawu dea ee nukumendo bu nutingganawu riara nu rano pade nalodomo.

³⁴Naopupa tupujagai wawu ee nangole nuapa anu najadi, hira nukumendo pade numbapatulele kareba ee ri ngata bohe ante ngatangata ntanina anu namonju rihee. ³⁵Pade nihuwumo tumata mangole nuapa anu najadi. Hira narata ante Yesus, bu rihee hira numbarata tumata anu nawiamo loko riheta-heta ee nikatoko namonju rikada Yesus. Ia nupakeamo bu pumpikirina nanotomo. Pade naekamo hira. ³⁶Tumata anu nangole mboto pura-pura nuapa anu najadi ee, hira nutehaka mbui ante tumata anu dako narata rihee birumba Yesus numpakabelo tumata anu nipihsua nu heta. ³⁷Pade pura-pura tupiari ri ngata Geresa ante tupiari ri ngata anu namonju Geresa mirapi ante Yesus ala Ia mumpalaihi hira, habana hira mpuu-mpuu naeka. Jadi nihawimo Yesus riara hakaya pade nanjilimo.

³⁸Hodipa Yesus nanggaliwo, tumata anu nipalaihi nu heta-heta ee mirapi ala ia mamala mumbatintuni Yesus. Tapi Yesus nangowu ia manjili, niuliNa, ³⁹“Panjilimo ri bolamu ante patulelekamo nuapa anu nibabe Alatala ka komi.” Pade nalaumo tumata ee numbapatuleleka rihumawee ngata ee, nuapa anu naopumo nibabe Yesus ka ia.

**Yesus numpakatuwu ana Yairus bu numpakabelo
hadua banggele anu nadua kabubuhinuraa**

⁴⁰Tempo Yesus nanjili lako rihambote nu rano, tumata dea numbatomunaka Ia ante hana nu rara, habana hira pura-pura numbaapea Ia. ⁴¹Pade naratamo hadua kapala ri bola mpiPue anu nuhangaka Yairus. Ia nutumbukotu ri ngayo Yesus bu mirapi tulungi ala Yesus marata ri bolana. ⁴²Yairus numbabe ewa ee, habana ana banggelena ee nadua pade mapara mamate. Ngana ee ana njadua, umuruna nitahere hampulu rumpaemo.

Tempo Yesus nulumako malau ri bola Yairus, Ia niipi-upi nu tumata dea hampe Ia hodi namala nuego. ⁴³Ri olo nu tumata dea ee naria hadua banggele anu hampulu rumpaemo nadua kabubuhinuraa, bu hodi ria hadua anu namala numpakabelohi duana. ⁴⁴Banggele ee numbakamonjuhi Yesus loko ri puri, pade numbatui doe nu jubaNa. Tempo ee mbui haliu nabelomo duana ee. ⁴⁵Pade nikutanamo Yesus, niuliNa, “Hema anu numbatui Yaku?”

Pura-pura tumata nihapuaka. Pade nangulimo Petrus, “Guru, tumata dea numbatikuhi Komi ante numbiaho ri hei.” ⁴⁶Tapi nanguli



Juba nu tu Yahudi (8:45)

Yesus, “Naria hadua tumata anu numbatui Yaku. NinjaniKu, habana nirasiKu naria kuaha anu nihuwu loko ri koroKu.” ⁴⁷Tempo banggele ee nangole pukainggauna ninjani, ia narata ante nukalete nutumbukotu ri ngayo Yesus. Ri olo tumata dea, banggele ee numpahampeka nuapa habana ia numbatui juba Yesus, pade birumba tempo ee duana haliu nabelo. ⁴⁸Pade Yesus nanguli ka banggele ee, “AnaKu, komi nabelomo habana komi numparahaya Yaku. Panjilimo riara kabelo nu katuwu.”

⁴⁹Ri tempo Yesus da nujarita, naratamo hadua tumata loko ri bola Yairus. Tumata ee nanguli ka Yairus, “Anamu namatemo, tamo komi mumpakahuhu Guru.”

⁵⁰Tempo Yesus nangepe ee, nangulimo Ia ka Yairus, “Nee maeka. Parahayamo bu anamu kana mabelo.”

⁵¹Karatana ri bola Yairus, Yesus hodi numbawoi nau hadua tumata ntanina mihua riara kamara nu ngana ee ante Ia; hawo Petrus, Yohanis, Yakobus ante tina tuama nu ngana ee. ⁵²Pura-pura tumata anu narata rihee numbatangihhi ngana ee. Tapi Yesus nanguli, “Nee mutumangi. Ngana ee hodi namate, Ia hawo naturu!”

⁵³Hira numparikintai Yesus, habana ninjanira ngana ee namatemo.

⁵⁴Yesus numbakanggenihi pale nu ngana ee pade nanguli, “Tei, Pimbangumo.” ⁵⁵Pade natuwu mpanjilimo ngana ee, tempo ee mbui nionggomia ia. Naopu ee, Yesus nangowu hira mumbawoika pumbanai

ka ngana ee. ⁵⁶Nahera ntoto tutua nu ngana ee. Tapi Yesus numbatagi hira ala nee mumbapatuleleka nuapa anu najadi ee ka tumata ntanina.

Yesus nangowu hampulurudua anaguruNa

9 ¹Yesus numbaronde hampulurudua anaguruNa, pade niwoiNa karoho ante kuaha ka hira mumbapupalai pura-pura heta ante mumpakabelohi tumata nadua. ²NiowuNa hira mumbapatulele kareba Pumparenta nu Alatala pade mumpakabelohi tumata nadua. ³Nanguli Yesus ka hira, “Nee manggeni nuapa-nuapa riara mpulumakomi, nee manggeni pato, bara batutu, bara baku, bara doi, bara runtonga pakea. ⁴Riumba komi ratarima tumata ri hongu bola, piarimo ri hetu hampe komi malai loko ri ngata etu malau ri ngata ntanina. ⁵Riumba komi hodi ratarima nu tumata, palaihimo ngata etu, pade hapulaimo howu loko rikadami, etu majadi tanda ka hira ane Alatala kana mumbahuku hira.” ⁶Naopu ee nalaumo anaguru Yesus, loko ri hongu ngata, nalau ringata-ngata ntanina mumbapatulele Kareba Belo ante mumbapakabelohi tumata nadua riumba-umba.

Madika Herodes naingu rarana

⁷Ri tempo ee, Madika Herodes numparenta ri tana Galilea. Ia nangepe pura-pura anu nibabe Yesus. Ia naingu rarana habana naria tumata anu nanguli, “Yesus iamo Yohanis Tupubaptis anu natuwu mpanjili.” ⁸Naria mbui anu nanguli, “Yesus ee nabi Elia nggaulu anu niumba mpanjilimo.” Tumata ntanina mbui nanguli, “Ia hadua loko ri nabi-nabi nggaulu anu natuwu mpanjili.” ⁹Herodes nanguli, “Niowukumo tumata numbatempo balengga Yohanis. Tapi hema kakonona Ia ei? Nadeamo teha nu Tumata ei niepeku.” Etumo hampe Herodes numpahimbuku muhirata ka Yesus.

Yesus numbapanai alima njobu tumata

¹⁰Naopupa anaguru Yesus numpatulele Kareba Belo ante numpakabelohi tumata nadua, nanjilimo hira pade nitehara puramo ka Yesus nuapa-nuapa anu nibabera ri heme. Pade Yesus numbapakeni hira lau numpatani ri hongu tampa anu nalino namonju ri ngata bohe Betsaida. ¹¹Tapi ninjani nu tumata dea patuju Yesus, pade hira numbatintuni Ia. Yesus numbatarima hira, pade nipatuduhuNa ka hira Pumparenta nu Alatala. Bu nipakabeloNa mbui tumata-tumata anu nadua.

¹²Ritempona eo mpamula maholomo, hampulurudua anaguru Yesus narata ka Ia bu nanguli, “Guru, tampa ei rikelena gaga, agina owumo

tumata dea ei malau ala hira mangelo pumbanai bu paturu ringata-ngata ante ritinalu-tinalu anu namonju loko ri hei.” ¹³Tapi nanguli Yesus, “Komimo anu mumbapanai hira.” Nihabo anaguruNa, “Anu naria ante kami ei hawo alima ongu roti ante rumbaa bau. Batuana kami kana malau mangoli pumbanai ka hira.” ¹⁴Kadea nu tumata rihee, nitahere alima njobu langgai, taapa natureke banggele ante ngana-ngana. Nanguli Yesus ka anaguruNa, “Owumo tumata-tumata ei mikatoko mutobu-tobu, hantobu bara alimampulu kadeana.”

¹⁵Anaguru Yesus numbabe nuapa anu niuli Yesus ka hira, niowuramo tumata dea ee nikatoko mutobu-tobu. ¹⁶Naopu ee niala Yesusmo alima roti ante rumbaa bau ee nitingoaNa langi, pade nuhukuru ka Alatala. Pade nitubi-tubiNa bu niwoiNa ka anaguruNa, ala rabagi-bagi ka tudea. ¹⁷Pura-pura tumata dea ee numbanai hampe nabohu. Naopu hira numbanai, nilimpuru nu anaguruNa labi nu pumbanai ee, hampulu rongu karanji pa kadeana.

Petrus nangaku Yesusmo Madika Tupumpakahalama

¹⁸Ri hongu eo tempo Yesus da nuhambaya haduaNa, naratamo anaguruNa ka Ia. Nikutanamo Yesus ka hira, “Panguli nu tumata dea, Yaku ei hema?” ¹⁹Nihabo anaguruNa, “Naria anu nanguli, Yohanis Tupubaptis. Naria mbui nanguli nabi Elia. Naria mbui tumata nanguli Komi ei nabi nggaulu anu natuwu mpanjili.” ²⁰Yesus nikutana mpanjili ka hira, “Tapi ane pumbaratami, hema kakonona Yaku ei?” Nihabo Petrus, “Komi etumo Madika Tupumpakahalama anu nijanji nu Alatala.” ²¹Tapi Yesus numbatagi hira ala nuapa anu niulira ee, neemo ntani rauli ka hema-hema.

Yesus nuteha kamateNa

²²Yesus nuteha mbuipa “Yaku, Ana Manuhia, kana mumbatanggu madea pantidomaka bu rapuara tutua-tutua tu Yahudi, kapala nu imam-imam bu tupande ri atura Musa. Yaku mbui kana rapatehi pade katolu eona rapatuwu mpanjili.” ²³Pade nanguli Yesus ka hira pura-pura anu naria rihee, “Ane komi madota mumbatintuni Yaku, komi kana mumbakalingahi dotami mboto, mumbahimbu salib^j eo-eo, bu numbatintuni Yaku njuu. ²⁴Ane komi madota mumpakahalama katuwumi ri dunia ei ante mumbaturuhi dotami mboto, komi hodi mumbarata katuwu anu hodi ria kaopuna. Tapi ane komi malali

^j 9:23 mumbahimbu salib: Batuana ia kana mumbahimbu pantidomakana.

nyohami habana komi numbatintuni Yaku, komi kana mumbarata katuwu anu hodi ria kaopuna. ²⁵Hodi ria gunana raratami pura-pura anu naria ri dunia ei, tapi komi hodi mumbarata katuwu anu mabelo hampe ri kahae-haena. ²⁶Ane komi maea mumbapangaku Yaku ante pangajariKu, Yaku Ana Manuhia kana maea mbui mumbapangaku komi tempo Yaku marata ante kuahaKu, ante kuaha TuamaKu bu ante kuaha malaeka-malaeka anu nagaha. ²⁷Yaku manguli ka komi, kakonona ri olo tumata anu naria ri hei maria anu hodipa mamate ane hodipa mangole Pumparenta nu Alatala.”

Yesus ni tuianaka

²⁸Nitahere haminggu naopu pumpaguru Yesus ee, Ia numbakeni Petrus, Yohanis, ante Yakobus nintende ri hongu bulu ala muhambaya. ²⁹Tempo Yesus nuhambaya, lenjeNa nabali pade pakeaNa najadi naputi bu nenggila. ³⁰Pade hampigoli napantomo rudua tumata nujarita ante Yesus, etumo nabi Musa ante nabi Elia. ³¹Hira rudua narata ante reme loko ri huruga. Hira nuteha kamate Yesus anu tamo mahae rapakadupa ri ngata Yerusalem. ³²Tempo Yesus nuhambaya, Petrus ante roa-roana naturu. Wetu hira nimbangu, niolera Yesus ni remehi reme loko ri huruga anu nareme ntoto, pade rudua nabi ee nionganjo namonju ante Yesus. ³³Tempo i nabi Elia ante i nabi Musa numbapalaihi Yesus, Petrus nanguli, “Guru, nabelo mpuu ane kita ri hei. Kami kana mumpupiongo tulongu bumbaru, hongu ka Komi, hongu ka Musa, pade hongu ka Elia.” Tapi Petrus hodi numbanjani nuapa anu niulina. ³⁴Ri tempo Petrus da nujarita, nanaumo kulimu, numbawunihi hira, hampe naekamo hira. ³⁵Pade loko rikulimu ee niepemo huara anu nanguli iwei, “Eimo AnaKu anu nipitolohiKu. Epemo Ia!” ³⁶Tempo huara ee naopumo nuteha, niolera naboli Yesus haduaNa rihee. Tempo ee anaguru Yesus nipariarantairaka nuapa anu najadi ee bu hodi nuteha ka hema-hema nuapa anu niolera ee.

Yesus numpakabelo ngana anu nipuhulampu nu heta

³⁷Rikamailena, tempo hira nanau loko ribuluna ee, narratamo tumata dea muhirata ka Yesus. ³⁸Hadua loko ri tumata dea ee nungare niulina, “Guru, kupirapi ala Komi mangole anaku, habana ia ana njaduaku! ³⁹Deka-deka ia nipuhulampu nu heta, pade hampigoli ia nungare bu korona natorompate hampe nguduna nubura. Heta ee njuu-njuu numbaduahi ia pade tamo nadota numbapalaihi ngana ee. ⁴⁰Nipirapikumo ante anaguruMi mumbapupalai heta ee, tapi hodi

namala.” ⁴¹Nangepe ee, nanguli Yesus ka hira, “Natantu mpuu komi anu natuwu ri tempo ei! Komi mpuu-mpuu hodi numparahaya bu nalipo! Hanggiapa kahaena Yaku muhinggani-nggani ante komi pade muhabara ka komi? Keni wime anamu.” ⁴²Ri tempo ngana ee nulumako numbakamonjuhi Yesus, ngana ee nadungga mbuimo bu natorompate habana ia nipuhulampu nu heta. Tapi Yesus numbapupalai heta loko rikoro nu ngana ee, bu nabelomo ngana ee loko riduana. Pade ngana ee niwoika Yesus mpanjili ka tuamana ⁴³Pura-pura tumata rihee nahera nangole kabuhe nu kuaha Alatala.

Yesus nuteha mpanjili kamateNa

Ritempona tumata da nahera nangole pura-pura nuapa anu nibabeNa, Yesus nanguli ka anaguruNa, ⁴⁴“Pariarantaika belo-belo bu nee rakalingahi jaritaKu ei: Yaku, Ana Manuhia, kana rawoika riara kakuaha nu manuhia anu nadaa.” ⁴⁵Tapi anaguru Yesus hodi numbanjani nuapa batuana anu niuliNa, habana batuana natiwunihi ka hira, bu hira mbui naeka nikutana ka Yesus nuapa batuana pujarita ee.

Hema anu nabohepa katuwuna ri olo nu anaguru Yesus

⁴⁶Pade numpamulamo anaguru Yesus nuhinggarau himbai hira, bara hema loko ri hira anu nabohepa katuwuna ⁴⁷Yesus numbanjani pumpikirira, etumo habana Yesus nangala hadua ngana kodi bu nipupiongo riginjoiNa. ⁴⁸Pade Yesus nutehaka anaguruNa, “I hema numbatarima ngana ei riara hangaKu, ia mbui numbatarima Yaku; bu i hema anu numbatarima Yaku, ia numbatarima mbui Alatala anu nangowu Yaku. Habana tumata anu nianggami nakodi katuwuna, iamo anu nabohepa katuwuna riara pangole nu Alatala!”

Hadua tumata anu hodi anaguru Yesus numbapupalai heta

⁴⁹Naopu ee Yohanis nanguli, “Guru, nioleka tumata numbapupalai heta riara nuhangaMu, tapi kami numbatagi ia, habana ia hodi tumata tuputintuni kita.” ⁵⁰Tapi nanguli Yesus ka Yohanis ante anaguruNa anu ntanina, “Nee komi mumbatagi ia, habana tumata anu hodi nangewa komi, ia etumo roami.”

Hongu ngata ri Samaria hodi nadota numbatarima Yesus

⁵¹Wetu maparamo tempona Yesus raonggotaka malau ri huruga, nipakatantuNamo pulumakoNa malau ri Yerusalem. ⁵²Pade Ia nangowu bara hanggia dua tumata numpariuluhi Ia. Hira anu

niowuNa ee nalau, pade nihua ri hongu ngata ri Samaria ala numpakahadia pura-pura anu niparaluu Yesus. ⁵³Tapi tumata-tumata ri ngata ee hodi nadota nantarima Yesus, habana ninjanira patuju Yesus malau ri Yerusalem. ⁵⁴Ri tempo anaguru Yesus, etumo i Yakobus ante Yohanis numbanjani tumata ri ngata ee hodi numbatarima Yesus, nangulimo hira, “Pue, ane rapudotaMi, kami mirapi apu manau loko ri langi mumbapapuhi tumata ri ngata ee.” ⁵⁵Yesus ningali pade nangontika hira. ⁵⁶Naopu ee, hira nalau ri ngata ntanina.

Tumata anu madota mumbatintuni Yesus

⁵⁷Tempo Yesus ante anaguruNa numbapapolahi pulumakora, nanguli hadua tumata ka Yesus, “Yaku madota mumbatuntuni Komi, riumba-umba Komi malau!” ⁵⁸Yesus nihabo ka tumata ee, “Ahulaku naria bolona, bu tonji naria dumuna, tapi Yaku, Ana Manuhia hodi ria tampa maturu.” ⁵⁹Pade Yesus nanguli ka tumata ntanina, “Tintunimo Yaku.”

Tapi nihabo tumata ee, “Pue, wointanimo yaku manjili ala mumbatana tuamaku.” ⁶⁰Yesus nihabo ka tumata ee, “Palambakamo tumata namate mumbatana tumatena mboto. Tapi komi, koimo riumba-umba patulelekamo kareba Pumparenta nu Alatala^k. ” ⁶¹Pade tumata ntanina mbui nanguli ka Yesus, “Pue, yaku mbui madota mumbatintuni Komi, tapi woi ntani yaku malau mumpalakana ka tumata anu naria ri bolaku.” ⁶²Tapi Yesus nanguli ka tumata ee, “Tumata anu mpamula numpajeko tapi ningali ri puri, ia hodi nuguna riara Pumparenta nu Alatala.”

Yesus nangowu pitumpulu anaguruNa

10 ¹Naopu ee, Pue Yesus numpitolohi pitumpulu anaguruNa anu ntanina, pade niowuNa hira rudua-rudua muriulu malau ringata-ngata bohe anu rakanataNa. ²Ia nanguli ka hira, “Tumata dea nahimbai ewa pae anu natahamo. Nadea pae anu natahamo bu nahadiamo rahombe, tapi tupuhombe hodi nadea. Jadi, pirapimo ante pue nu lida ala Ia mangowu tupuhombe, ala mumbahombe paeNa.”^m

^k 9:60 Tumata anu hodi numparahaya Yesus, nahimbai ewa tumata namate. Woikamo himbai hira mumbatana tumate ee.

^l 9:62 Tumata anu madota mumbatintuni Yesus tapi mengali ri puri, mumbatora njuu nuapa anu nibolinamo, ia hodi nuguna riara Pumparenta nu Alatala.

^m 10:2 Batua nu purapahi ei iamo: Pae anu natahamo bu nahadiamo rahombe, nahimbai ewa tumata dea anu nahadiamo mumbatarima Pue Yesus, tapi taapa nagana tumata anu mangeni Kareba Belo ka hira. Jadi, muhambayaa ka Alatala ala Ia mumbatambai tumata anu mangeni Kareba belo, ala madea tumata anu numparahaya Yesus.

³Koimo komi! Tapi tora, habana Yaku mangowu komi malau ewa ana nu bimba anu nalau ritotongo nu ahulaku. ⁴Neemo komi manggeni doi, bara tempolu, bara hapatu. Nee mahae gaga muteha ka tumata anu nipuhintomumi riara mpulumakomi.

⁵Ane komi mihua riara bola, uli ntani, ‘Tabe! Kabelo nu katuwu loko ri Alatala marata ka komi ri bola ei!’ ⁶Ane maria tumata ri bola ee anu maponu rarana mumbatarima komi, Alatala kana mumbaganehi katuwura nahimbai ewa pitabemi ka hira. Tapi ane hira hodi maponu rarara mumbatarima komi, Alatala mbui hodi mumbaganehi katuwura. ⁷Ane komi ratarima ri hongu bola, piarimo ri hetu. Neemo mulinja-linja, panginumo bu pumbanaimo nuapa anu rawoi nu pue bola. Habana tupukarajaa mahipato mumbatarima gajina.

⁸Ane komi mihua ri hongu ngata pade tumata rihee mumbatarima komi, naimo nai anu rawoina ka komi. ⁹Pakabelohi tumata-tumata nadua ri ngata etu, pade uli ka hira pura-pura anu ri ngata ee, ‘Naratamo tempona Pumparenta nu Alatala marata ri dunia ei.’ ¹⁰Tapi, ane komi marata ri hongu ngata, pade hodi ratarima nu tumata rihee, pihuwumo ri dala jama pade ulimo ka hira pura, ¹¹‘Maupa howu nu ngata ei anu nahintaka rikadaka, kahapulai ringayomi, majadi tanda Alatala kana mumbahuku komi. Tapi pakabelomo habana maratamo tempona Pumparenta nu Alatala marata ritotongomi.’ ¹²Kuuli ka komi, ri eo putangara ri kaopu nu dunia, pehuku anu rawoi ka ngata etu milabipa kantomona loko ri pehuku nu Alatala ka ngata Sodom.’

Ngata-ngata anu hodi numparahaya kana rahuku

¹³Nahilakamo komi anu niari ri ngata Korasim ante Betsaida, habana nadeamo tanda kuaha anu Nibabeku ringatami, tapi komi hodi ntoto najea. Ane loko ri nggaulu tanda kuaha ei rababe ri ngata Tirus ante Sidon tantu nahaemo kajeara bu kanjoho nu rarara maupa hira hodi tu Yahudi. ¹⁴Jadi, ri eo putangara ri kaopu nu dunia, pehuku nu Alatala milabipa ka komi pade ka tumata anu ri Tirus ante Sidon. ¹⁵Komi mbui anu niari ri Kapernaum, nee raharumakami komi raore ri huruga. Hodi ntoto, komi hawo ranawuhaka ri tampa pehuku anu hodi ria kaopuna. ¹⁶Pade nanguli Yesus ka tumata anu numpahintuni Ia, “Hema anu mangepe tehami, ia mbui mangepe Yaku. Hema anu mumbapuara komi, ia mbui mumbapuara Yaku. Habana tumata anu mumbapuara Yaku, ia mumbapuara mbui Alatala anu nangowu Yaku.”

Panjili nu pitumpulu anaguru

¹⁷Pade nanjilimo pitumpulu anaguruNa ee ante hana nu rara bu nanguli, “Pue, nau heta-heta natundu ante kami, pade kami numbaliwu heta-heta ee riara nu hangaMi.” ¹⁸Nanguli Yesus ka hira, “NioleKumo Madika nu heta nanawu loko ri langi ewa kila! ¹⁹Kakonona niwoiKumo kuaha ka komi ala mumbalonggohi ule bu kanggaula, bu kuaha ala mumbadagi pura-pura karoho nu balita. Hodi ria anu mumpakahilaka komi. ²⁰Naupa iwetu, neemo madombo rarami habana heta-heta natundu ante parentami. Agina madombo rarami habana hangami nitulihimo riara buku nu Alatala ri huruga.”

Yesus nuhambaya

²¹Ritempona ee mbui, nadombo rara Yesus habana Nyoha Gaha nu Alatala naria ante Ia. Nanguli Yesus, “O TuamaKu, Pue nu langi bu tana! Yaku nuhukuru habana nuapa anu natiwunihi nipupanjanMi ka tumata anu hodi natau. Tapi niwunihiMi ka tumata anu numbanjani bu tumata anu napande. Habana etumo anu numpakadombo raraMi, TuamaKu. ²²Pura-pura niwoi nu TuamaKumo ka Yaku. Hodi ria hadua tumata anu numbanjani Yaku Ana i Alatala, hawo TuamaKu. Hodi mbui naria tumata anu numbanjani TuamaKu, hawo Yaku AnaNa, bu tumata-tumata anu Kupodota Kupupanjani hema TuamaKu.” ²³Naopu ee neilimo Yesus ka anaguruNa bu nuteha ka hira ala hodi raepe nu tumata ntanina, “Nahana mpuu komi, habana niolemimo nuapa-nuapa anu nibabeKu. ²⁴Pariarantaikamo! Nadea nabi bu madika madota mangole ewa nuapa anu niolemi, tapi hodi namala, bu madota mangepe ewa nuapa anu niepemi, tapi hodi mbui namala.”

Tu Samaria anu nabelo rarana

²⁵Ritempona Yesus numpaguru, nionggomo hadua tupande ri atura Musa numpehori Yesus. Nanguli ia, “Guru, nuapa anu kubabe ala yaku mumbarata katuwu anu hodi ria kaopuna?” ²⁶Nihabo i Yesus, “Nuapa anu nitulih i riara atura Pue anu nitulih i Musa bu nuapa anu nibahamu ritu?”

²⁷Nihabo tumata ee,

“Putowemo Pue Alatalamu

ante kaponu nu raramu,
ante kanoto nu pikirimu,
ante kaponu nu rohomu,

ante kaponu nu kapandemu,
bu putowemo tumata ntanina ewa iko numbaputowe
koromu mboto.”

²⁸Nanguli Yesus ka ia, “Nakono pihabomu etu, babemo ewa etu, mahalamamo katuwumu.” ²⁹Tapi ia numbatundukono, nihabo tumata ee, “Hema tumata ntanina anu kana kuputowe?” ³⁰Nihabo Yesus, “Naria hadua tumata anu nutua loko ri Yerusalem malau ri Yeriko. Riara mpulumakona, ia nuhirata ante tupiagohi, niagohi pura nuapa anu nikenina, ante kagana nggorona, niboba hampe hantanga mate. Naopu ee, nipalaihimo ia rihoho dala. ³¹Tempo ee, naria hadua imam anu nuliu ri dala ee. Wetu niolena tumata ee, nilelimo ia rihambote nu dala. ³²Naria mbui hadua turi Lewi anu nuliu ri dala ee. Wetu niolena tumata ee, nilelimo ia rihambote nu dala. ³³Pade naratamo hadua tu Samaria anu nuliu mbui ri dala ee. Wetu niolena tumata ee, naahimo rarana nangole. ³⁴Nikamonjuhina tumata ee, nipakagahana pura baka-bakana ante angguru, nipakulihina ante lana pade nibungguhina. Naopu ee nihawirakana ri wonggo nu keledai bu nikenina rihou pihai, pade niuruhina rihee. ³⁵Kameilena nialana rongu doi pera, niwoina ka pue bola ee, nanguli ia, ‘Uruhi tumata ei, ane makura loko riei, kutambai damo wetu yaku manjili mpanjili ri hei.’ ”

³⁶Yesus numpakaopu tehaNa ante hongu pumpikutana ka tumata ee niuliNa, “Loko rituntolu tumata ei, hema anu numbaputowe tumata anu niagohi wuwei?”



Tu Samaria anu nabelo rarana (10:34)

³⁷Tupande ri atura Musa ee nanguli, “Tumata anu naahi rarana anu numbatulungi ia.”

Nanguli Yesus, “Koimo, babemo ewa etu.”

Yesus numbatotorou Maria ante Marta

³⁸Naopu ee Yesus ante anaguruNa numpapolahi pulumakora, pade narata ri hongu ngata. Ri ngata ee, naria hadua banggele anu nuhangaka Marta numbatomunaka Yesus ri bolana. ³⁹Naria hadua hampihuwu banggele Marta anu nuhangaka Maria. Maria ei narata pade nikatoko namonju rikada Yesus bu nangepe pangajariNa. ⁴⁰Tapi Marta hawo naheha ka turatana. Etumo habana ia nalau ka Yesus bu nanguli, “Pue, hodi nangginahi Komi nangole yaku? Maria hawo nipalambana yaku nukarajaa mboto. Owumo ia mumbatulungi yaku.” ⁴¹Nihabo Yesus ka ia, “Marta, Marta, iko nakini gaga raramu, bu ningaya anu nipikirimu. ⁴²Kakonona naria hongu anu pokona, etumo mangepe Lolita nu Alatala. Maria numpilihi belona, anu hodi mamala raala nu tumata loko ante ia.”

Yesus numpatuduhi anaguruNa nuhambaya

11 ¹Ri hongu eo, nalaumo Yesus nuhambaya ri hongu tampa. ²Naopu Ia nuhambaya, hadua anaguruNa narata bu nanguli ka Ia, “Pue, patuduhi kami muhambaya, ewa Yohanis numpatuduhi anaguruna nuhambaya.”

²Nanguli Yesus ka hira, “Ane komi muhambaya, ulimo iwei:

Tuama ka, kami mumbatuia hangaMi anu nagaha.

Pakadupamo pumparentaMi ri dunia ei.

³Woika kami pumbanai anu nagana eo-eo.

⁴Ampunimo kami loko ridohaka, ewa kami mbui numbaampuni tumata anu nahala ka kami.

Neemo rapalamba kami rapehori.”

⁵Nangulipa Yesus ka anaguruNa, “Rapana maria hadua loko rikomi anu malau ri bola nu roami ritongo wengi bu manguli, ‘Roa, woika yaku ntani tulongu rotimi pade ku hambei damo, ⁶habana naria hadua roaku anu riara mpulumako. Ia nihai ri bolaku pade hodi ria nuapa-nuapa anu mamala kuwoi ka ia.’ ⁷Tapi ane rapana roami ee nihabo loko riara bolana iwei, ‘Nee mibago! Wombo nitunggokumo, yaku ntaliana naturu puramo. Tamo madota yaku mimbangu mumbawoi nuapa anu niperapimu.’ ⁸Jadi birumbamo? Kuuli ka komi, naupa ia wegamu, pamulana ia hodi madota mimbangu ala mumbawoi ka iko

nuapa-nuapa anu niparaluu. Tapi habana iko hodi naea nirapi njuu ka ia, kaopuna ia kana mimbangu bu mumbawoi nuapa anu niparalumu etu. ⁹Jadi, kuuli ka komi: Pirapimo ante Alatala, natantumo komi kana rawoika. Elomo pade komi kana mumbarata, tanedomo wombo, pade wombo kana raungge ka komi. ¹⁰Habana hema anu mirapi, kana rawoika. Hema anu mumpaelo kana mumbarata. Hema-hema anu mumbatanedo wombo kana raungge ka ia. ¹¹Ri olomi ei, hema tuamatuama ane anami mirapi bau, bu komi mumbawoi ule? ¹²Bara mirapi ntolu, bu komi mumbawoi kanggaula? Natantumo hodi ria. ¹³Naupa komi tumata nadaa, ranjanimi mbui mumbawoi anu nabelo ka anami. Neepa Tuamami anu ri huruga, natantu Ia kana mumbawoi Nyoha Gaha ka tumata anu mirapi ante ia.”

Yesus ante Beelsebul

¹⁴Ri hongu eo Yesus numpupalai heta loko ri tumata anu nipakabobo nu heta. Tempo heta ee nihuwu, tumata nabobo nahowamo nujarita. Nangole ee naheramo tumata dea. ¹⁵Tapi naria mbui hanu tumata nanguli, “Ia numpupalai heta ante kuaha loko ri Beelsebulⁿ, Madika nu Heta.” ¹⁶Naria mbui tumata anu numpehori Yesus. Hira nirapi ala Yesus mumpupuole tanda kuaha loko ri huruga, ala ranjanira ane Ia narata loko ri Alatala. ¹⁷Tapi ninjani Yesus nuapa anu nipikirira. Jadi niuliNa ka hira, “Ane maria hadua madika, bu tudea riara mpuparentana hodi muhinggabelo, natantumo pumparentana kana magero. Wetu mbui ane tumata ri hongu bola hodi muhinggabelo, anu matantumo puhintuwura kana magero mbui. ¹⁸Wetu mbui riara mpuparenta nu heta. Komi nanguli Yaku numpupalai heta ante kuaha loko ri Beelsebul, Madika nu Heta. Tapi ane Madika nu Heta numbaewa himbai heta natantumo pumparenta nu heta ee kana magero. ¹⁹Ane wetu, ante kuaha nuapa anagurumu numbapupalai heta? Natantumo ante kuaha loko ri Alatala. Jadi loko ri nuapa anu nibabe anagurumi ee, natantumo pumbaratami etu nahala. ²⁰Tapi ane Yaku numpupalai heta ante kuaha i Alatala, kakonona pumparenta nu Alatala naratamo ri olomi. ²¹Ane maria tumata anu naroho, pade nagana parewa piewana, mumbajagai bolana mboto, natantumo pura-pura ihi nu bolana kana mahalama. ²²Tapi ane tumata anu nilabipa karohona marata mumbaewa ia

ⁿ 11:15 Beelsebul: Etumo pangga ka Madika nu heta. Madika nu heta, kapala loko ri pura-pura heta.

pade radagina, natantumo tumata anu narohopa korona ee kana mumbaagohi pura-pura parewa piewa anu niharumaka nu pue bola ee, pade ihi nu bolana rawoina ka tumata ntanina.^o ²³Tumata anu hodi nuhambira ante Yaku, kakonona ia nangewa Yaku, bu tumata anu hodi numbatulungi Yaku, kakonona ia numbagerohi pukarajaaKu!"

Teha Heta anu nihua mpanjili

²⁴Pade nanguli Yesus, "Ane heta nihuwu bu numpalaihi hadua manuhia, ia nuliliwe welo wime ri tampa kabaina nangelo piarinia. Pade ane hodi raratanan, nanguli ia, 'Agina yaku manjili ri bolaku, ka tumata anu nipalaihiku.' ²⁵Karatana ante tumata anu nipalaihina nurulu, niratana tumata ee ewa bola anu naopu nipegahamo bu nipahiayu, tapi da naboa. ²⁶Iweepa, nalaumo ia pade nirondena papitu heta ntanina anu nilabipa kadaana loko ante ia, pade hira nihua bu niari rikoro nu tumata ee, kaopuna katuwu nu tumata ee nilabipa kadaana loko ripamulana."

Kahana anu mpuu-mpuu

²⁷Ritempona Yesus nanguli iwee, naria hadua banggele loko ri olo nu tumata dea nanguli ka Yesus ante huara namangga, "Nahana mpuu banggele anu numpuanaka bu numpahuhu Komi!" ²⁸Tapi nihabo Yesus, "Nilabipa kahana nu tumata anu nangepe pade nangoheaka Lolita nu Alatala."

Tumata nirapi Yesus mumbabe tanda anu nipukumaa

²⁹Tempona tumata dea nahiromu, Yesus numpapolahi tehaNa, niuliNa, "Nadaa mpuu tumata anu natuwu ri tempo ei. Hira mirapi ala Yaku mumpupuole tanda kuaha ala raparahayara Yaku. Tapi hodi ria tanda anu kana rapupuole ka hira. Hawo tanda anu najadimo ka nabi Yunus^p nggaulu anu rapupuole ka hira. ³⁰Ewa Yunus anu majadi tanda ka tumata anu ri ngata bohe Niniwe, wetu mbui Yaku, Ana Manuhia, kana majadi tanda anu rapukumaa ntumata anu natuwu ri tempo ei. ³¹Ri eo putangara ri kaopu nu dunia, madika banggele loko ndatena^q kana rapakatuwu mpanjili muhinggani-nggani ante tumata-tumata

^o 11:22 Riara nu purapahi ei, Madika nu Heta nirapahika ewa pue bola anu naroho. Tapi tumata anu nilabipa karohona, etumo Yesus.

^p 11:29 tanda anu najadimo ka nabi Yunus: Ole ri Yunus 1:17 ante Matius 12:40.

^q 11:31 madika banggele loko ndatena: Madika loko ri ndatena anu nuhangaka Seba. Ole ri 1 Raja-raja 10:1-13.

anu natuwu ri tempo ei, majadi habi bu mumbatuhala pukainggumi anu nadaa. Habana madika banggele ee narata loko ri ngata bohe anu nakawao ala mangepe pangajari nu madika Salomo anu mpuu-mpuu nanoto pumpikirina. Tempo ei naria ri olomi hadua anu katuwuna nilabipa loko ri madika Salomo, tapi komi hodi nangepe pujaritana. ³²Wetu mbui ri eo putangara ri kaopu nu dunia, tumata ri Niniwe rapakatuwu mpanjili muhinggani-nggani ante komi anu natuwu ri tempo ei. Bu hira kana mumbatuhala pukainggumi habana hira najeamo nangepe teha nu nabi Yunus, tapi ri tempo ei nariamo ri olomi anu katuwuna nilabipa loko rinabi Yunus, tapi komi hodi nadota najea."

Pangajari anu nakono nirapahika ewa kareme

³³"Hodi ria tumata anu numbatunju puindo pade raladuhina bu rawunihina. Natantumo puindo ee kana rabolina rikalangana ala tumata anu mihiu mamala mangole wantana. ³⁴Matamu etumo puindo nu koromu, habana ane matamu mabelo, marememe pura-pura koromu. Tapi ane matamu nawurau, malalondomo pura-pura koromu. ³⁵Etumo habana pariarantaikamo pakabelo ala anu naria ante komi etu kareme, hodi kalalondo. ³⁶Ane pura-pura koromi mareme bu hodi naria tampa anu nalalondo, katuwumi mareme mahimbai ante puindo numbawanta remena ka komi."

Yesus numbatuhala tu Farisi bu guru-guru agama

³⁷Naopupa Yesus numpaguru, naratamo hadua tu Farisi numbagaga Yesus mumbanai ri bolana. Jadi, nalaumo hira mumbanai rihee. ³⁸Tu Farisi ee nahera nangole Yesus hodi numbatintuni ada nu tu Farisi, mimbaho ntani pade mumbanai. ³⁹Nanguli Yesus ka ia, "Komi tu Farisi hawo numbatintuni ada nu agama anu niole nu tumata, tapi rarami nadaa bu riarantaimi madota mumbaagohi anu ntumata ntanina. Komi nahimbai ewa tumata anu nubikohi huraya ante tampa panginu hawo rihawalikuna, tapi riarana bate-batena naraki. ⁴⁰He, komi tudoyo! Alatala hodi hawo numpajadi koromi, tapi Ia mbui numpajadi anu riarantai. ⁴¹Napa anu naria ante komi, woimo ante kaponu nurarami ka tumata anu napakahi. Ane komi mumbabe ewa etu, komi mpuu-mpuu majadi tumata anu nagaha ri ngayo nu Alatala.

^r 11:36 Batua nu purapahi ei, kana rapariarantaita mpuu pumpatuduhi anu nakono anu nipayuleleNa ala mareme pikiri bu riarantaita, ala katuwuta bate-batena mabelo.

⁴²Mahilakamo komi tu Farisi! Habana komi mpuu-mpuu numbawoi ka Alatala hampulu bagia loko ri nuapa anu nikarajaami, nau rampa-rampa kodina ewa timbawane, kula, kuni bu rampa-rampa ntanina. Tapi parenta anu nangowu kita ala mpuu-mpuu mukainggu manoa bu mumputowe Alatala hodi nipangalami! Ntono etumo parenta pokona anu kana ratintuni pade nee mbui rakalingahi parenta ntanina. ⁴³Nahilakamo komi tu Farisi! Habana nipokonomi nikatoko rikadera ngayona ri bola mpiPue pade nipokonomi mbui rapuimbi nu tumata ri putomu. ⁴⁴Nahilakamo komi! Habana komi nahimbai ewa dayo anu hodi nidika tandana. Tumata anu nuliu ri wonggo nu dayo ee hodi ninjanira.”^s

⁴⁵Naria hadua tumata ntanina, tumata ei tupande ri atura Musa, ia nanguli ka Yesus, “Guru, nuapa anu niuliMi etu numbahalai kami mbui.” ⁴⁶Nanguli Yesus, “Mahilaka mbuimo komi tupande ri atura Musa, habana komi numbawoi ka tumata atura-atura anu nantomo gaga ratintuni, tapi komi mboto nau kukoi hodi nadota numbatulungi tumata numbatintuni atura etu. ⁴⁷Nahilakamo komi habana tutuami nggaulu numbapatehi nabi-nabi, pade tempo ei komi numpakabelo dayo nu nabi-nabi ee. ⁴⁸Jadi ane ewa ee, komi nahituju ante nuapa anu nibabe nu tutuami nggaulu, habana hira numbapatehi nabi-nabi ee, pade komi numbawala dayora. ⁴⁹Etumo habana Alatala anu mpuu-mpuu nanoto nanguli, ‘Yaku nangowu nabi-nabi ante huroKu malau ka hira; hanu rapatehira pade hanu raduahira.’ ⁵⁰Jadi, komi anu natuwu ri tempo ei kana rahuku Alatala habana tutuami nggaulu numpatehi pura-pura nabi i Alatala loko rimpamulana kajadi nu dunia, ⁵¹mpamula loko ripumpatehi Habel hampe pumpatehi Sakaria anu najadi ri olo nu meja tampa putunu binata^t ka Alatala ante Bola Pue Alatala. Parahayamo! Komi anu natuwu ri tempo ei mpuu-mpuu kana rahuku habana pukainggu nu tutuami. ⁵²Nahilakamo komi tupande ri atura Musa! Kakonona komi anu mahipato mumbapatuduhi tumata muhinjani ante Alatala. Tapi komi mboto hodi nadota muhinjani ante Alatala, pade komi mbui numbalawa tumata anu madota muhinjani ante Alatala.” ⁵³Naopu nanguli iwee, nalaumo Yesus. Mpamula loko rihee, nadua mpuu rara nu tupande ri atura Musa bu tu Farisi ante Ia.

^s 11:44 Tu Yahudi numbadika tanda ridayora ala hodi ralonggohi nu tumata, habana niparahayara ane tumata numbatui mboa bu mumbalonggohi dayo, hira tamo mahipato malau miPue muhingga-nggani ante tu Yahudi ntanina.

^t 11:51 meja tampa putunu binata: Tampa putunu binata ei nibabe loko ri watu anu nihunju ewa meja.

Nipahimbukura mangopa teha Yesus ala ratehaNa mpingaya-ngaya, ⁵⁴ala mangelo kahala nu tehaNa hampe Ia mamala rapangadura.

**Yesus nanguli ka anaguruNa nee mumbatintuni
pukainggu nu tu Farisi**

12 ¹Tempo ee, rinjobuna tumata nahiromu rihee nuhimpii hampe hira nembilonggohi kada, hira narata mangole Yesus. Pade Yesus mpamula numpaguru ka anaguruNa, “Pakabelo ante ragi nu tu Farisi. Batuana, nee hampe komi mumpahiala pukainggura hawo nabelo rilenje tapi rarara nadaa! ²Tapi, pura-pura anu natiwunihi riarantaira anu nadaa kana ranjani nu tumata, habana pura-pura anu niwunihi tempo ei kana mapanto raole eo purina, bu nuapa-nuapa anu hodi ranjani, kana ranjani. ³Jadi nuapa anu ratehami ri kalalondona, kana raepe nu tumata rikaremena. Pade anu nipanggaliwayokami ka tumata riara nu kamara, rapatuleka tudea rihawalikuna!”

Matundumo ka Alatala

⁴“Wega-wegaku, pariarantaikamo! Nee maeka ka tumata anu hawo mamala mumbapatehi koromi, habana maupu ee tamo maria anu mamala rababena ka komi. ⁵Jadi kuuli ka komi, hema anu mahipato rapukaekami. Aginamo komi maeka ante Alatala, habana Ia nakuaha mumbapatehi koromi bu nakuaha mbui mumbatende komi riara pehuku anu hodi ria kaopuna! Pariarantaikamo LolitaKu ei! Hawo Alatala anu mahipato rapukaekami. ⁶Lima mbaa tonji rone nipubalu, olina rumpeka doi kodi. Naupa iwetu hodi naria nau hambaa nikalingahi nu Alatala, ⁷nilabipa komi, naupa wulua ribalenggami nirekeNa bu ninjaniNa pura. Jadi nee maeka, habana nilabipa pumputowe nu Alatala ka komi pade tonji rone.”

Kita kana mumpangaku Yesus ri ngayo nu tudea

⁸“Pariarantaikamo! Hema anu mumpangaku korona ri ngayo ntudea, ane ia tuputintuni Yaku, Yaku mbui mumpangaku ia ri ngayo nu malaeka-malaeka ri huruga. ⁹Tapi, hema anu mumbahapu Yaku ri ngayo nu manuhia, Yaku mbui mumbahapu ia ri ngayo nu malaeka-malaeka nu Alatala. ¹⁰Hema anu nuteha Yaku Ana Manuhia teha anu hodi nabelo, da mamala raampuni. Tapi hema anu mumbahalai Nyoha Gaha nu Alatala, ia hodi mamala raampuni. ¹¹Ane komi rakeni ri bola mpiPue bu ri ngayo nu pamarenta ala ratangara habana komi numbatintuni Yaku, nee maeka mumpikirika nuapa anu raulimi ka

hira bu birumba pihabomi. ¹²Habana ri tempo ee mbui Nyoha Gaha nu Alatala mboto anu mumpatuduhi ka komi nuapa anu mahipato raulimi.”

Purapahi tumata nahugi anu nadoyo

¹³Naria hadua loko ritudea ee nanguli ka Yesus, “Guru, uli ka tuaka langgaiku ala ia mumbabagi hohora ntuamaka anu najadi bagiaku.” ¹⁴Nihabo Yesus, “Hampihuwu, hema anu nangonggotaka Yaku najadi tupubagi hohora nu tuamamu?” ¹⁵Pade nanguli Yesus ka tudea ee, “Pakabelo-belo, nee komi hawo madota mangelo kahugi nu dunia, habana katuwu nu manuhia hodi niole loko rikahugina ante kadea nu pumbolina.”


¹⁶Pade Yesus numpaguru hira ante hongu purapahi ei, “Naria hadua tumata anu nahugi. Nadea mpuu pumbaratana loko rituda-tudana ee. ¹⁷Nikutanamo ia riarrantaina: Napa anu kubabe, habana tamo ria tampa anu kupumboli nuapa-nuapa anu nirataku ei. ¹⁸Pade nangulimo ia ka korona mboto, ‘Ei anu kubabe: agina kugerohi tampaku anu nakodi ei pade kubabe bohena, ala mamala kupumboli paeku ante anu ntanina mbui. ¹⁹Naopu ee tamo yaku mukarajaa, habana nadea mpuu paeku ante pumboliku ntanina, bara hanggia mpae pade maupu. Jadi, yaku mamala mundodo ntani, mumbanai, manginu bu mumpihana.’ ²⁰Tapi Alatala nanguli ka ia, ‘Heh, tudoyo, Nggawengina ei iko mamate. Pura-pura anu nipakahadiamu etu, hemamo puena?’ ” ²¹Kaopu nu purapahi ei, Yesus nanguli, “Iwetumo kajadina ane tumata hawo numpahimbuku mumbapahiromu kahugina ka korona mboto, tapi katuwuna napakahi ri ngayo nu Alatala.”

Nee makini rara mumpikirika katuwumi ri dunia

²²Pade nanguli Yesus ka anaguruNa iwei, “Etumo habana Kuuli ka komi, nee makini rarami mumpikirika katuwumi ri dunia ei bara nuapa anu kana ranaimi, bu nuapa anu kana rapakemi. ²³Habana katuwumu nupokopa pade pumbanai, bu koromu nupokopa pade pakea. ²⁴Ole tonji kulaa. Hira hodi nutuda pae, hira hodi numbotu, bu hodi mbui ria gampirira rapumboli pae. Tapi naupa iwee, Alatala numbawoi pumbanai mbui ka hira! Neepa komi anu nilabipa pumputoweNa pade tonji! ²⁵Hodi ria gunana makini rarami, habana loko ri kakini nurarami etu hodi ria nau hadua loko rikomi anu numpakule mumbatambai umuruna naupa kukoi. ²⁶Ane hodi rapakulemi mumbabe kodina ewa etu, nanggia nakini raramu

numpikirika anu ntanina? ²⁷Olemo bunga-bunga anu natuwu ri karawa; bunga-bunga ee hodi nukarajaa, bu hodi nudau pakeana mboto. Tapi Kuuli ka komi, maupa madika Salomo anu mpuu-mpuu nahugi, hodi ria pakeana anu nagaya ewa kagaya nu bunga-bunga ee! ²⁸Jadi ane Alatala numpakagaya bunga-bunga ri karawa anu hawo natuwu eo ei pade meile rapalabu riapu, nilabipa pumputowe Alatala ka komi! Tapi komi nakura pumparahayami! ²⁹Jadi, neemo makini rarami ante maingu mumpikirika nuapa anu ranai bu rainumi. ³⁰Etu puramo anu nielo nu tumata-tumata ri dunia anu hodi nuhinjani ante Alatala. Tapi Alatala Tuamami numbanjani nuapa-nuapa anu niparaluumi. ³¹Jadi pahimbukumo ala Alatala mumparenta riara nggatuwumu, pade pura-pura anu ntanina etu kana rawoiNa ka komi.”

³²Yesus numpapolahi tehaNa iwei, “Nau komi anaguruKu hawo kukoi dodo, nee maeka! Habana loko ri kabelo nu rara Alatala Tuamami, numpitolohi komi ala mumbarata kabelo nu katuwu riara pumparenta nu Alatala. ³³Jadi, pubalu puramo nuapa anu naria ante komi, doina woimo ka tumata anu napakahi. Babemo batutu nu doi anu hodi mamala magero, batuana, kahugimi etu hodi ria kaopuna ri huruga habana hodi mamala rapangonggo nu tumata bu hodi mamala ratotohi nu ane. ³⁴Habana riumba naria kahugimu, ri hetu mbuimo rara ante pikirimu.”



Batutu nu doi (12:34)

Kita kana muhadia mumpupea karata Yesus mpanjili ri dunia

³⁵⁻³⁶Naopu ee, Yesus mumpahampeka hongu purapahi iwei, “Komi kana muhadia tempona Yaku marata. Nahimbai ewa batua-batua anu numpupea karata nu madikara loko ri puhuha puboti. Batua ee bate-batena nahadia pade puindora hodi naporo. Ane marata madikara mumbatanedo wombo, mahaliha raungge ka ia. ³⁷Nauntu mpuu batua ee ane manjili madikara bu raratana hira da nupea. Parahayamo, madika ee mumpalali bu raowuna batua ee mikatoko ala mumbanai pade ia mboto anu muhondu pumbanai ka hira. ³⁸Nauntu mpuu batua-batua ee ane rarata nu madikara, hira da nupea, naupa ia marata tongo wengi, bara bubayana. ³⁹Pariarantaikamo purapahi ei:

ane ranjani nu pue bola terti hanggia tupangonggo marata, natantumo rajagaina bolana bu hodi rapalambana tupangonggo mihua riara bola.

⁴⁰ Wetu mbui ante komi. Komi kana mainga mumpupea karataKu, habana hodi ninjanimi meopia tempona Yaku, Ana Manuhia marata.”

Purapahi batua nabelo anu numbatintuni dota nu madikana

⁴¹ Petrus nikutana, “Pue, purapahi ei hawo ka kami, atau ka tumata ntanina mbui?” ⁴² Nihabo Yesus, “Hema batua anu nanoto bu numbatintuni dota nu madikana, ia etumo anu raonggotaka majadi tupanggeni pura-pura batua riara bolana. Iamo anu mumbauruhi pumbanai ka batua-batua ntanina eo-eo. ⁴³ Nauntu mpuu batua ee ane tempo madikana manjili nikarajaana napa anu niparahaya nu madikana ka ia. ⁴⁴ Parahayamo, madika ee kana mangonggotaka ia majadi tupumpahiayu pura-pura anuna. ⁴⁵ Tapi, mahilakamo batua ee ane hawo mumpikiri riarantaina iwei, ‘Da mahaepa madikaku pade manjili,’ bu ia hawo mumbaboba batua-batua ntanina, hawo mumbanai, manginu, bu malangu. ⁴⁶ Tempona batua ee mumbabe iwee, hampigoli madikana manjili ri eo bu rijaa anu hodi ranjanina. Batua ee rahuku bu ratidaka rihawalikuna nahimbaika ewa tumata anu hodi natundu ante parenta nu Alatala. ⁴⁷ Batua anu ninjanina dota nu madikana, tapi hodi mainga bu hodi nibabena napa dota nu madikana etu, ia kana rapakaje. ⁴⁸ Tapi ane batua anu hodi numbanjani dota nu madikana bu mumbabe kahala anu mahipato rahuku, ia hawo raboba kukoi da. Habana tumata anu niwoika nadea, nadea mbui ratuntu loko ante ia. Tumata anu niparahayaka nadea, nadea mbui anu raharumaka loko ante ia.”

Hodi puwinggabelo tapi puwinggarau

⁴⁹ Yesus nanguli, “Kakonona Yaku narata manggeni puwinggarau ka komi manuhia ri dunia. Puwinggarau ee kapanena ewa apu. ⁵⁰ Tapi damariapa kahuha anu mumbarumpa Yaku. Bu mahuha mpuu raraKu hampe etu madupa. ⁵¹ Niharumakami Yaku narata ri dunia manggeni puwinggabelo ri olo ntumata? Hod! KarataKu ei manggeni puwinggarau ri olo ntumata. ⁵² Mpamula loko ri tempo ei ane maria alima tumata ri hongu bola, anu tuntolu mangewa anu rudua. ⁵³ Jadi, tuamana mumbiewa ante anana langgai, pade anana langgai numbiewa ante tuamana, tinana numbiewa ante anana banggele, pade anana banggele numbiewa ante tinana, bu wetu mbui ante matua banggele ante maniana, hira numbiewa.”

Numbatahere tempo

⁵⁴ Nangulimo Yesus ka tudea, “Ane komi mangole gawu miumba rimpanauna, ranjanimi tamo mahae maudamo. Bu mpuu-mpuu mauda.

⁵⁵ Ane raolemi puiri neburu loko ri ndatena tantu ranjanimi kana mapane eo. Bu mpuu-mpuu mapane eo. ⁵⁶ Komi hawo nabelo ringudu! Komi namala numbatahere rawana, nanggia hodi ninjanimi napa anu nibabe nu Alatala ri tempo ei?”

Kita kana muhinggabelo ante balita

⁵⁷ “Nanggia hodi nipikirimi mbotomo pukainggu umbana anu nabelo? ⁵⁸ Ane komi rapangadu nu tumata lau ri ngayo nu tuputangara, agina komi muhinggabelo ante tupangadu ee tempona komi da ritotongo dala. Neemo hampe komi rakenina mpuu ri ngayo nu putangara pade tuputangara ee manggeni komi ka polisi ala rahuaraka riara nu tarunggu. ⁵⁹ Parahayamo, komi hodi rahuwurakana loko riara nu tarunggu ane taapa muhompo wayamu.”

Ane komi hodi majea, komi mahilaka

13 ¹ Tempo ee naria bara hanggia dua tumata nanggeni kareba ka Yesus. Hira nuteha, teha nu bara hanggia dua tu Galilea anu nipatehi Pilatus tempona hira nuhambale binata anu rawoika Alatala. ² Nangepe kareba ee nanguli Yesus, “Nee rapikirimi tu Galilea anu namate ewa ee, nadeapa dohara pade doha nu tu Galilea ntanina. ³ Tantu hodi! Kuuli ka komi, ane komi hodi majea mumbabe doha, komi pura kana rahuku. ⁴ Toramo hampuluwalu tumata anu namate namonju Siloam, tempona hira nirumpihi nu menara. Nee rapikirimi hira anu namate ee, nadeapa dohara pade doha nu tu Yerusalem ntanina. ⁵ Hod! ntoto nakono! Kuuli ka komi hangganipa, ane komi hodi majea mubabe doha, natantumo komi pura kana rahuku mbui.”

Purapahi kai ara anu hodi nuwua

⁶ Naopu ee Yesus nuteha purapahi ei, “Naria hadua pue nu tinalu angguru. Ri tinaluna ee natuwu hanggai kai ara. Ri hongu eo pue nu tinalu lau nangelo wua nu kai ara ee, tapi hodi ria nau hongu wua niratana. ⁷ Jadi, niulina ka tupukarajaa tinalu ee, ‘Olemo! Tolumpaemo kahaena yaku wime njuu nangelo wuana, tapi nau hongu hodi ria nirataku. Agina kutowomo kai ei. Hod! ria gunana natuwu ri hei.’ ⁸ Nihabo tupukarajaa tinalu ee, ‘Palambaka ntanimo kai ei matuwu



Kai ara (13:6-9)

hampaepa. Kutonggohi tana ripunana pade kudika pupu. ⁹Bara pae marata pade muwua. Tapi ane taapa mbui muwua, ratowotamo.’”

Ri Eo Mpinonto Yesus numpakabelohi banggele anu nabunggu

¹⁰Ri hongu eo, ri Eo Mpinonto Yesus numpaguru ri Bola mpiPue. ¹¹Rihee, naria hadua banggele anu hampuluwalu mpaemo nipakabunggu nu heta, pade tamo nanoro nionggo. ¹²Tempo Yesus nangole banggele ee, nirondeNa bu niuliNa, “Nina, nabelomo duamu.” ¹³Pade niontu Yesus paleNa rikoro nu banggele ee. Banggele ee halii nanoro piongan, pade numbatuia Alatala. ¹⁴Kapala ri Bola mpiPue ee narau nangole Yesus numpakabelohi tumata nabunggu ri Eo Mpinonto. Niulina ka tumata rihee, “Riara nu haminggu naria ono eo anu nipakatantu ka kita mukarajaa. Karatamo komi ri eo ntanina ala rapakabelo, tapi neemo ri Eo Mpinonto!” ¹⁵Nanguli Yesus, “Komi hawo nabelo ringudu! Ri Eo Mpinonto komi pura numbapawia japimi bara jarami bu rakenimi rapainu. ¹⁶Ri hei, naria hadua banggele muli i Abraham anu nipou madika nu heta hampuluwalu mpaemo kahaena. Jadi mahipato ane ia rapawia loko ri kuaha nu heta nau ri Eo Mpinonto.” ¹⁷Tempo Yesus

nanguli iwee, pura-pura baliNa naeya mpuu. Tapi tumata ntanina nadombo pura nangole panggawia belo anu nibabe Yesus.

Purapahi batu nu sawi ante ragi


¹⁸Pade nanguli Yesus, “Nirapahika ewa napa Pumparenta nu Alatala, pade ante napa etu Kupahimbaika? ¹⁹Pumparenta nu Alatala nirapahika ewa batu nu sawi, anu niala bu nihawu nu tumata ri tinaluna. Batu nu sawi ee natuwu najadi kai, pade tonji-tonji mamala nudumu rilolo-lolona.”^u

²⁰Pade nikutana Yesus hangganipa, “Kurapahika ewa napa pumparenta nu Alatala? ²¹Etu Kupahimbaika ewa ragi anu niala nu banggele, nigalo ante patampulu lite gando hampe ninggamba.”

Wombo mpihua riara nggatuwu anu hodi ria kaopuna

²²Riara mpulumakoNa malau ri Yerusalem, Yesus nuliu ri ngata bohe bu ngata ntanina pade numpaguru. ²³Naria tumata narata nikutana ante Ia, “Pue, hawo kukoi tumata anu rapakahalama?”

Nihabo Yesus, ²⁴⁻²⁵“Tumata anu rapakahalama namala nirapahika ewa tumata anu nihua ri wombom anu napii. Komi kana mumpahimbuku mihiwa ri wombom anu napii ee kambana wombo da natiungge. Habana tempo pue bola mimbangu pade mumbatunggo wombona, nadea tumata anu mumpahimbuku mihiwa tapi hodi nipakulera. Jadi ane komi da nionggo rihawalikuna numbatanedo



Sawi nu tu Yahudi (13:21)

^u 13:19 Sawi anu niuli ri hei, hodi nahimbai ewa sawi anu naria ante kita. Tapi, tuda-tuda anu natuwu hampe tolongan metere kalangana, pade tonji namala nudumu rilolona.

wombo pade manguli, ‘Pue, ungge ka kami wombo!’ Pue bola hawo nihabo iwei, ‘Hodi ninjaniku komi!’ ²⁶Pade komi manguli, ‘Pue, kami numbanai, nanginu nuhinggani-nggani ante komi, Pade komi mbui numpaguru ri ngataka!’ ²⁷Tapi Pue bola ee nihabo ka komi, ‘Hodi ninjaniku komi bu hodi ninjaniku loko riumba komi. Palaimo loko ri hei komi tumata nadaa!’ ²⁸Tempo komi nangole Abraham, Ishak, bu Yakub ante pura-pura nabi nadombo-dombo riara Pumparenta nu Alatala, komi kana mutumangi habana komi ratidaka rihawalikuna. ²⁹Tumata-tumata marata pura loko rimpandakena, mpanauna, tahina, ndatena, bu madombo-dombo riara Pumparenta nu Alatala. ³⁰Kakonona, tumata anu ri purina majadi muriulu, bu tumata anu muriulu majadi ri purina.’

Yesus numbatangihi ngata Yerusalem

³¹Tempo ee naria bara hanggia dua tu Farisi narata ka Yesus bu nanguli, “Neemo miari ri hei! Palaimo ri tampa ntanina, habana Herodes madota mumbapatehi Komi.” ³²Nihabo Yesus, “Koimo uli ka tumata anu hodi nuguna etu, ‘Eo ei bu meile Yaku mumbapupalai heta bu mumpakabelohi tumadua, tapi mihuapa pade Kupakaopu pukarajaaKu.’ ³³Naupa iwetu, kana Kupapolahi pulumakoKu eo ei, meile, bu mihuapa. Hodi nabelo ane nabi rapatehi rihawaliku nu Yerusalem. ³⁴He, Komi tu Yerusalem! Nipatehimi nabi-nabi, huro i Alatala nirompomi ante watu hampe namate! Nadea ngganimo Yaku madota mumbalimpuru komi pura, ewa tina nu manu anu numbarumutahi anana, tapi komi hodi nadota. ³⁵Kakonona, Alatala tamo muhinggani-nggani ante komi. Tapi kuuli ka komi, komi tamo mangole Yaku hampe marata tempona komi manguli, Niganehimo Ia anu narata riara nuhanga i Pue!”

Yesus numpakabelohi tumata nadua ri Eo Mpinonto

14 ¹Ri hongu Eo Mpinonto naratamo Yesus ri bola hadua kapala tu Farisi, hira numbanai rihee. Tumata rihee njuu-njuu nangole napa anu rababe Yesus. ²Hampigoli naratamo nionggo ri ngayo Yesus hadua tumata anu nadua, kadana ante palena nebangga. ³Nangole tumata ee, nikutanamo Yesus ka tupande ri atura Musa ante tu Farisi ee, “Numbatintuni atura nu agamata, mamala kita mumpakabelo tumata nadua ri Eo Mpinonto?” ⁴Tapi tupande ri atura Musa ante tu Farisi ee hawo nalino. Jadi nikanggenihi Yesus pale nu tumata nadua ee, nipakabelohiNa pade Yesus nangowu ia nanjili. ⁵Pade nanguli

Yesus ka hira, “Ane anamu, bara japimu, manawu riara nu wuwu, matantumo kana muala naupa ee ri Eo Mpinonto.” ⁶Tapi hodi naria nau hadua anu nabia numbahabo nuupa anu niuli Yesus ee.

Kita kana mumparintambe korota

⁷Yesus nangole naria turata-turata anu numpilihi pikatoko anu nabelo ri ngayona. Etumo habana Yesus numbagao pangajari ei ka hira, niuliNa, ⁸“Ane komi ragaga tumata malau ri puhuha puboti neemo komi mumpilihi mboto pikatoko anu nabelo ri ngayona, habana nee-nee hira mumbagaga tumata ntanina anu nilabipa nibilara loko ri komi. ⁹Ane wetu pue njuha ee marata ante komi bu manguli, ‘Mirapi ampu lee, pikatoko ei nariamo puena. Ane mamala komi mulinja ri purina.’ Pade ante ea numata komi mulinja ri purina. ¹⁰Jadi ane komi ragaga malau ri puhuha, aginamo komi mikatoko ri purina ala pue njuha marata bu manguli ka komi, ‘Ee maimo, mikatoko ri ngayona hei’ Ane wetu, komi kana raadai ri ngayo nu turata ntanina. ¹¹Tapi hema anu mumbaangga korona milabipa loko ri tumata ntanina, ia kana raparintambe nu Alatala. Pade Hema anu mumparintambe korona, katuwuna ri dunia kana rapakabohe nu Alatala.”

Hema anu kana ragaga

¹²Pade nanguli Yesus ka pue bola ee, “Ane komi mumbagaga tumata marata mumbanai ri bolami, bara eona bara nggawengina, nee ragagami roami, hampihuwumi, bu tumata nahugi anu naria ringatamu habana hira kana mumbagaga komi mbui. Bu napa anu nibabemi etu kana rabalahina. ¹³Ane komi mumbabe puhuha gagamo tumata anu napakah, tumata nakura hipana, tumata napunggu, bu tumata naburo. ¹⁴Ane ewa ee anu rababemi, Alatala kana mumbaganehi katuwumi, habana tumata ewa ee hodi rapakulera mumbabalahi kabelomi. Pukainggumi anu nabelo etu kana rabalahi nu Alatala tempona tumata anu nabelo rapakatuwu mpanjili.”

Purapahi puhuha anu nabohe

¹⁵Tempona hira da numbanai, nutehamo hadua turata anu nangepe pangajari Yesus wuwei, nanguli ia, “Mahana mpuu tumata anu numbanai nuhinggani-nggani ante Alatala ri tempona Ia marata ewa Madika.” ¹⁶Tapi Yesus nanguli ka tumata ee, “Ri hongu tempo naria hadua tumata mumbabe puhuha bohe bu madea mpuu tumata ragagana. ¹⁷Tempona puhuha rapamulamo, pue njuha nangowu

batuana nalau ka tumata anu nigaga bu nanguli, ‘Maimo kita mumbanai habana pura-pura nahadiamo.’¹⁸ Tapi pura-pura tumata anu nigagana ee nirapi ampu, nanguli anu hadua, ‘Yaku dako nangoli hamputu tana pade kana welo yaku mangolena. Hodi majadi yaku malau ri puhuha.’¹⁹ Tumata ntanina mbui nanguli, ‘Yaku dako nangoli alima paha japi, kana ku paguru mupajeko eo ei. Jadi mirapi ampu yaku, hodi mamala.’²⁰ Pade tumata ntanina mbui nanguli, ‘Yaku dako naopu nurongo, hodi mamala yaku malau ri puhuha.’²¹ Pade nanjilimo batua ee nitehana puramo napa-napa anu niuli nu tumata-tumata ee ka pue njuha. Nangepe ee, ia mpuu-mpuu nara, nanguli ia ka batuana, ‘Koimo ri dala jama ante dala kodi pakeni wime pura tumata anu napakahi, tumata nakura hipana, tumata naburo, bu tumata anu napunggu.’²² Jadi naopu nibabe nu batuana ee puramo napa anu niparenta ka ia, nanguli batua ee, ‘Nibabeku puramo napa anu niulimi, nadeamo tumata narata, tapi danaria tampa anu naloga.’

²³ Nanguli pue njuha ee ka batuana, ‘Koimo ri dala bohe ante ri dala kodi rihawaliku nu ngata bohe, pade pakenimo tumata marata wime ala maponu pura pikatoko ri bolaku.’²⁴ Toromo! Pura-pura tumata anu ni gagakumo pade hira hodi nadota narata, hodi naria mau hadua kuwoi mumbanai napa-napa ni pahadiaku ri puhuha ei.’”

Napa-napa kana rapawia ane majadi tuputintuni Yesus

²⁵ Naopu ee nadea tumata nulumako nuhinggani ante Yesus. Ia ningali pade nanguli ka hira, ²⁶ “Ane maria tumata marata ante Yaku, ia hodi mamala majadi tuputintuniKu ane ia milabipa pumputowena ante tuamana, tinana, rongona, ana-anana, hampihuwuna, bu numputowe korona mboto, pade numputowe Yaku.”²⁷ Tumata anu hodi nadota mumbahimbuaka salibna ante numbatintuni Yaku, ia hodi mamala majadi tuputintuniKu.

²⁸ Rapana, ane maria hadua tumata loko ri komi mubabe menara, napa ntani anu mpamula rababena? Matantumo ia mikatoko pade rarekena pura pakabelo hanggia kadea nu doi anu rapakena ala ranjanina bara magana doina atau hodi rapubabera menara ee hampe naopu. ²⁹ Ane maupumo doina bu hawo pandasina anu majadi, matantumo ia kana raparikintai nu pura-pura tumata.³⁰ Nanguli tumata ka ia, ‘Nipamulanamo mubabe menara tapi hodi nipakulena numpakaopu pukarajaana.’

³¹ Wetu mbui ane hadua madika ante huradaduna anu hawo hampulunjobu malau muhiewa ante madika ntanina anu

rumpulunjobu kadea nu huradaduna, nabelo ane ia mikatoko ntani bu mumpikiri bara rapakule nu huradaduna mangewa huradadu nu madika ntanina ee.³² Ane ranjanina hodi rapakule nu huradaduna mangewana, natantu tempo da makawao balina raowunamo hurona malau mirapi ante hira ala hira muhinggabelomo.”³³ Kaopuna nanguli Yesus ka hira, “Jadi, hodi naria nau hadua loko ri komi anu mamala majadi tuputintuniKu, ane ia hodi mumbapawia pura-pura anu naria ante ia.”

Gara anu namoli

³⁴ Gara etu nabelo bu nuguna, tapi ane gara ee namolimo birumba mamala rapaka paga mpanjili?³⁵ Tambo naria gunana; hodi mamala rapake mumpakaboya tana, hodi mbui mamala rapajadi pupu. Jadi nabelopa ratidakahimo. Hema naria talingana, miepemo ia.

Purapahi bimba anu nalipo

15 ¹ Ri hongu eo, tupuhungara bahitee ante tumata-tumata nadoha narata madota mangepe Yesus numpaguru. ² Nangole ee, pamulamo tu Farisi bu tupande ri atura Musa nanggambunta nanguli hira, “Eh! Nanggia Ia numbatarima bu numbanai nuhinggani ante tumata nadoha ee?”

³ Etumo habana Yesus nuteha hongu purapahi ka hira iwei, ⁴ “Ane loko ri olomi maria roami numpatuwu hatuongu bimba bu malipo hongu, nuapa anu rababena? Matantumo rapalahina bimbana anu hiompulu bu hahio ri karawa, pade malaumo ia mangelo hongu bimbana anu nalipo ee hampe raratanan.”⁵ Ane raratanamo bimbana ee, rahimbuakana pade manjilimo ia ante hana nu rarana.⁶ Iwetu narata ri bolana, nirondena roa-roana ante tumata anu nu hongu doyata ante ia, niulin, ‘Kamaimo kita madombo-dombo, habana bimbaku anu nalipo nirataku mpanjilimo.’⁷ Kuuli ka komi, wetu mbui ri huruga. Ane hadua tumata nadoha majea, kadombo nuihi huruga mpuu-mpuu nabohepa loko ri kadombo ka hiompulu bu hahio tumata belo anu hodi paraluu majea.”

Purapahi doi anu natonto

⁸ Yesus numpapola tehaNa ante hongu purapahi ka hira, Nanguli Ia, “Naria hadua banggele numboli doi hampulu pera, pade natonto doina hongu pera. Nuapa anu rababena? Matantumo ia mupatuwu puindo, pade rahewena rara bolana mangelo doina anu natonto ee



Bimba anu nalipo (15:7)

hampe rarata. ⁹Iwetu niratana doina ee, ia numbaronde roa-roana ante tumata anu nu hongu doyata ante ia bu nanguli, ‘Kamaimo kita madombo-dombo habana doiku anu nalipo nirataku mpanjilimo.’ ¹⁰Kuuli ka komi! Wetu mbui kadombo nu malaeka Alatala riara huruga ane hadua tumata anu nadoha, najea loko ri dohana.”

Purapahi ngana anu nalipo

¹¹Pade Yesus nuteha mpanjili hongu purapahi ei ka hira, “Naria hadua tutua langgai, anana rudua langgai pura. ¹²Nanguli ana kaopuna ka tuamana, ‘Papa, woi mamimo ka yaku bagiaku loko ri kahugimi etu.’ Nangepe ee, ni bagi nu tuamanamo kahugina ee ka rudua anana. ¹³Taapa nahae naopu ee, ngana kaopuna numbapubalu pura bagiana, pade nalaumo ia ri ngata anu nakawao. Ri heme ia numpakaopu doina ante natuwu numpihana. ¹⁴Tempo doina naopu puramo, najadimo kaliwha bohe ri ngata ee, hampe ia mpuu-mpuu napepa. ¹⁵Pade nalaumo ia nukarajaa ka hadua tumata ri ngata ee. Ia niowu malau ri tinalu ala mumbajagai wawu^v. ¹⁶Naoro mpuumo taina, hampe ia madota mumbanai nai nu wawu ee. Tapi hodi ria nau hadua anu mumbawoi pumbanai ka ia. ¹⁷Kaopuna nanotomo rarana ane katuwuna mpuu-mpuu napepa pade nutehamo ia riarrantina, ‘Tumata anu nukarajaa ri bola ntuamaku nilabi-labi pumbanaira, tapi yaku ri hei

^v 15:15 Numbajagai wawu pukarajaa anu hodi nireke ka tu Yahudi, habana wawu niangga binata anu naharumu riara nu atura Pue anu nitulih i Musa.

mamate nu orontaimo. ¹⁸Yaku kana manjili ante tuamaku pade kuuli ka ia: Papa, nadohamo yaku ri ngayo nu Alatala bu ka komi. ¹⁹Yaku mirapi ante komi tuamaku anggamo yaku ei tupukarajaa ri bolami, habana yaku tamo mahipato rauli anami’. ²⁰Naopu ee, pade nanjilimo ia malau ante tuamana. Tempona ia da nakawao, niole ntuamanamo ia. Naahimpumo rara tuamana nangole anana. Nukumendomo tuamana numbatotorou anana, pade nikapuina anana bu niekina. ²¹Nanguli ngana ee ka tuamana, ‘Papa, yaku nadohamo ka Alatala bu komi tuamaku. Yaku tamo mahipato rauli anami’. ²²Tapi, tuamana numbaronde batuana bu nanguli ia, ‘Koi ala mahinta pakea anu nagaya ntoto bu pahuaka ia, pahuaka mbui hinji ri koya mpalena bu hapatu ri kadana. ²³Maupu ee, alamo japi anu tono boyana bu hambalemo. Kita kana mumbanai bu madombo-dombo. ²⁴Habana anaku ei mamala raulita namatemo, tapi eipa ia natuwu mpanjilimo. Ia nalipo, tapi ia nirata mpanjilimo.’ Pade mpamulamo hira nuhuha bu nadombo-dombo.

²⁵Tempo ee ana ulumbuana da ri tinalu. Nanjilipa ia napara ri bolana, niepena huara nu huli ante huara ntumata nu dade bu nutaro. ²⁶Pade nirondena hadua batua anu nu karja ri bolana ee bu nipikutanana, ‘Nanggia naria puhuha ri bolaku?’ ²⁷Nihabo batua ee, ‘Toimu nanjilimo, jadi tuamamu nangowu hadua batuana nuhambale japi anu tono boyana, habana anana anu nalipo narata mpanjili ante nahalama. ²⁸Nangepe ee, narau mpuu rara nu ngana ulumbua ee hampe ia hodi nadota nihua riara bola, jadi nihuwumo tuamana numbakanondohi ngana ee ala ia madota mihua riara bola.’ ²⁹Nanguli ngana ulumbua ee ka tuamana, ‘Papa, mpaе-mpaenamo kahaena yaku nukarajaa ewa batua ka komi, pade yaku natundu njuu ka parentami, tapi napa anu niwoimi ka yaku? Hodi ria nau hongu tuwau niwoimi ka yaku, ala yaku muhuha bu mumpihana ante roaku. ³⁰Tapi, tempo narata anami anu hawo numpakaopu kahugimi, bu nuhinggani ante banggele anu nantari, komi haliu numbahambale japi anu naboya ka ia.’ ³¹Nihabo tuamana ka ia, ‘Anaku, iko batena ri hei nuhinggani njuu ante yaku, pura-pura kahugiku ei iko puena. ³²Kita kana muhuha bu madombo-dombo habana toimu namate, natuwu mpanjili. Ia nalipo tapi eipa ia nirata mpanjilimo.’”

Purapahi tupuuruhi doi anu natenggo rarana

16 ¹Yesus nuteha hongu purapahi ka anaguruNa, “Naria hadua tumata nahugi bu hadua tupuuruhi doina ante kahugina. Tumata nahugi ee nangepe teha loko ri tumata ntanina, ane tupuuruhi

doina ee hawo numpakaopu doina. ²Jadi, nirondena tupuuruhi doina ee pade niulina, ‘Niepekumo teha loko ri tumata, birumba inggumu numbauruhi doiku. Jadi, woika yaku buku-bukumu tampa putulihii doiku ante birumba iko numbatulihii pura-pura anuku. Pade iko tamo mamala majadi tupuuruhi doiku.’

³Nangepe ee, numpikirimo tupuuruhi doi ee riarantaina, ‘Nuapa mo anu kana kubabe? Tumata nahugi ee tamo nadota mumpupukarajaa yaku. Miwawo, hodi kupakule, mirapi-rapi, naeya mbui yaku.

⁴Ninjaniku, nuapa anu kana kubabe. Yaku kana matau mangala rara nu tumata, habana ane yaku tamo rapupukarajaa, maria tumata anu madota mumbatarima yaku ri bolana.’

⁵Pade nirondena hadua-hadua tumata anu nuinda ka tumata nahugi ee. Nikutanamo ia ka tumata mpamulana, ‘hanggia indamu?’

⁶Nihabo tumata ee, ‘Hatu gumba lana.’ Nanguli tupuuruhi doi ee ka ia, ‘Ei hora nu indamu, pikatoko bu tulihimo alimampulu gumba lana!’

⁷Pade nipikutanana ka tumata karuduana, ‘Hanggia indamu?’

Nihabo tumata ee, ‘Hanjobu karu gandum.’ Nangulipa tupuuruhi doi ee, ‘Ei hora nu indamu, tulihimo waluatu karu gandum.’

⁸Tempo tumata nahugi ee nangepe nuapa anu nibabe nu tupuuruhi doi anu natenggo rarana ee, nituiana tupuuruhi doi ee, habana natau akalana; ewa etumo tumata anu naria ri dunia ei, nilabipa kapandena numpahiayu urusana loko ri tumata anu numparahaya. ⁹Jadi epemo: pakemo kahugimu ri dunia ei ala mumbarata roa, ala tempona kahugimu etu tamo ria gunana, komi kana ratarima ripiari anu hodi ria kaopuna muhinggani ante Alatala ri huruga.

¹⁰Tumata anu mamala raparahaya riara urusa kodi, mamala mbui raparahaya riara urusa bohena. Tapi tumata anu hodi mamala raparahaya riara urusa kodina, hodi mbui mamala raparahaya riara urusa bohena! ¹¹Jadi, ane komi hodi mamala raparahaya ante kahugi anu naria ri dunia ei, natantumo hodi naria anu madota mumparahaya ka komi kahugi anu belona loko ri huruga. ¹²Pade ane komi hodi mamala mumbaaturu nuapa anu niparahaya nu tumata ntanina ka komi, natantumo hodi naria anu madota mumbawoi ka komi nuapa anu majadi bagiamu ri huruga.

¹³Hodi naria nau hadua batua anu mamala mukarajaa ka rudua madika, habana natantumo raputowe napa anu hadua pade rapuwulumatana anu ntanina. Ia kana matundupa ka hadua, tapi hodi matundu ka ntanina. Wetu mbui ante komi. Komi hodi mamala majadi batua nu Alatala, bu majadi batua nu doi mbui.”

¹⁴Tu Farisi anu nangepe pangajari Yesus, numbaparikintai nuapa anu niuli Yesus ee, habana tu Farisi ee tupumputowe doi. ¹⁵Tapi, nanguli Yesus ka hira, “Komi mumpahimbuku ala mabelo ri ngayo nu tumata ntanina, tapi ninjani nu Alatala pura-pura ihi riarantaimi. Napa anu niangga nu manuhia nabelo, etumo anu niangga nu Alatala nadaa. ¹⁶Atura-atura Pue anu nitulihii Musa, bu pumpatuduhi nabi-nabi da nipake ri tempo Yohanis Tupubaptis. Mpamula loko ri tempo ee, Kareba Belo Pumparenta nu Alatala nipatuleka tumata, pade hira nuhimpago madota mihua riara nu Pumparenta ee. ¹⁷Magampapa langi bu tana malanya, pade atura Pue anu nitulihii i Musa, naupa putulihii kodina ntoto hodi mamala malanya. ¹⁸Hema anu mumbapugaaka rongona pade murongo ante banggele ntanina, ia natuwu nubualo, bu langgai anu nurongo ante banggele anu nipugaaka nurongona, ia mbui natuwu nubualo.”

Tumata nahugi ante Lasarus

¹⁹Pade Yesus nuteha hongu pangajari ei, “Naria hadua tumata nahugi, nupakea gaya bu nahuli. Haeo-haeo ia nuhuha riara nu kahugina ee. ²⁰Naria mbui hadua tumata anu nuhangaka Lasarus. Katuwuna mpuu-mpuu napakah, pade korona naponu ante baka anu nehoa. Biahana ia nidiika ntumata ribubaa bola nu tumata nahugi ee. ²¹Haba kaorontaina, ia madota mumbanai rombo-rombo nu pumbanai anu nanawu loko ri meja tumata nahugi ee, tapi narata mbui da ahu numbadilahi bakana.

²²Pade namatemo Lasarus, ia nikeni nu malaeka ri tampa nabelo ri hinjori Abraham. Tumata nahugi ee namate mbui bu nitanamo.

²³Tapi, ia mpuu-mpuu nahuha ri tampa pehuku anu hodi ria kaopuna. Tempo nipilantohina loko ri kakawaona ia nangole Abraham ri heme bu Lasarus nikatoko ri hinjori Abraham. ²⁴Nungaremo tumata nahugi ee, niulina, ‘Tuamaku Abraham, putowemo yaku, owumo Lasarus mumbalome koya mpalena ri ue, pade rapatitina ridilaku, habana hantanga mate mpuu yaku ri mata nu apu ei!’

²⁵Tapi nihabo Abraham, ‘Anaku, toramo, tempo ri dunia nahana mpuu katuwumu, iko numbarata pura-pura anu nabelo, tapi Lasarus nahuha mpuu katuwuna bu hawo numbarata anu nadaa pura. Eipa, ia nahanamo pade iko kana mumbarata kahuha. ²⁶Pade mbui riolota ei naria halu anu mpuu-mpuu naluo bu nandala, ala tumata loko ri hei hodi mamala wetolo, bu tumata loko ri hetu hodi mbui mamala wime.’

²⁷Pade nangulimo tumata nahugi ee ka Abraham, ‘Ane wetu, mirapi tulungi mpuu yaku ka komi, owumo Lasarus malau ri bola ntuamaku, ²⁸habana danaria alima pa hampihuwuku. Owumo Lasarus mumbapupatora ka hira, ala ane hira mamatemo, hira hodi mihua ri tampa kahuha ei.’

²⁹Nihabo Abraham, ‘Hodi! Nariamo ante hira buku-buku Musa ante buku-buku nu nabi-nabi. Palambakamo hira mumbatintuni nuapa anu nitulih i riara nu buku ee.’

³⁰Nihabo tumata nahugi ee, ‘Tuamaku Abraham, Pura-pura etu taapa nagana. Tapi ane maria tumata anu namatemo bu matuwu mpanjili marata ka hira, natantumo hira kana majea loko ri doha-dohara.’

³¹Tapi, nihabo Abraham, ‘Ane hodi rapariarantairaka parenta anu nitulih i Musa bu parenta nabi-nabi ntanina, nau tumate anu matuwu mpanjili mbui anu marata ka hira, kana hodi raparahayara.’ ”

Nee mumbapakeni roa mumbabe doha

17 ¹Nanguli Yesus ka anaguruNa, “Natantumo kana naria pehori hampe tumata mumbabe doha. Tapi, nahilakamo tumata anu numpakakeni tumata ntanina mumbabe doha. ²Agina tumata ewa ee raloe nu watu bohe ritabolona bu ratidaka ri tahi. Nabelopa ewa ee pade ia mumbapanawu hadua loko ri tumata anu hodi naro ho pumparahayana ei ala mumbabe doha. ³Etumo habana komi kana mainga! Ane hampihuwumu anu hongu pumparahaya ante komi mumbabe doha, ontikamo ia. Bu ane ia nanjohomo rarana, ampunimo ia. ⁴Ane riarana haeo pitu nggani ia mumbabe kahala ka komi, pade ihanunganina ia mumbabe kahala bu njuu-njuu marata ka komi mirapi ampu, ampunimo ia.”

Pumparahaya anu naro ho

⁵Pade nanguli huro-huro ee, “Pue, pakarohu pumparahayaka.”

⁶Nihabo Yesus, “Ane rapana pumparahayami naupa hawo ewa batu nu sawi kabohen, mamala komi manguli ka kai bohe ei, ‘Kabukamo iko bu pulinjamo ri tahi, bu matantumo kai ei mumbaturuhi dotami.’ ”

Pukarajaa nu hadua batua

⁷Pade Yesus numpapolahi pangajariNa, “Ane rapana hadua loko ri komi ei maria batuami. Pade batuami ee malau mupajeko bara muewu bimba ri karawa. Tempo batua ee manjili, nuapa anu niulimi

ka ia, ‘Kamaimo mahaliha mumbanai?’ ⁸Tantumo hodi! Tapi komi kana manguli ka ia, ‘Pakahadia ka yaku pumbanaiku. Pahua pakea pukarajaamu anu riara bola, bu kapai yaku hampe maupu mumbanai, pade iko mamala mumbanai.’ ⁹Natantumo komi hodi kana mumbatuia batua ee, naupa ia numbabe pukarajaa anu niowumi ka ia. ¹⁰Wetu mbui ante komi, ane komi maupu mumbabe pura-pura anu niparenta ka komi, ulimo, ‘Kami ei hawo batua biaha anu hodi mahipato ratuia, kami hawo numbabe napa anu niparenta ka kami.’ ”

Yesus numpakabelohi hampulu tumata anu nadua bohe

¹¹Riara mpulumakoNa nalau ri ngata Yerusalem, Yesus nuliu ri olo nu tana Samaria ante Galilea. ¹²Tempo Ia nihua riara ngata, naratamo hampulu tumata anu nadua bohe numbatotorou Ia, hira nionggo nggawao, ¹³pade numparonde ante huara namangga, “Yesus! Guru! Putowemo kami!” ¹⁴Yesus nangole hira bu nanguli, “Koimo komi ka imam-imam bu pirapimo ante hira ala raparehara koromi.”

Nangepe ee, nalaumo hira. Ranja mpulumakora, nabelomo duara.^w

¹⁵Tempo hadua loko ri hira anu nadua bohe ee nangole korona nabelomo, nanjili mpanjilimo ia nuhirata ka Yesus bu numbatuia Alatala ante huara namangga, ¹⁶pade nutumbukotumo ia ri ngayo Yesus bu nuhukuru ka Alatala. Tumata ee, tu Samaria. ¹⁷Pade nanguli Yesus ka ia, “Wuwei naria hampulu tumata anu nipakabelohi. Umbamo hahiopa? ¹⁸Nanggia hawo hadua dodo anu nanjili nuhukuru ka Alatala? Bu ia mbui hodi tu Yahudi!” ¹⁹Pade nanguli Yesus ka tumata ee, “Pionggomo bu koimo. Nabelomo duamu habana komi numparahaya Yaku!”

Karata Pumparenta nu Alatala

²⁰Naria bara hanggia dua tu Farisi narata nikutana ka Yesus, “Mepia Alatala mpamula mumparenta ri dunia?” Nihabo Yesus, “Tempo Alatala marata mumparenta, hodi naria tanda-tanda anu mamala raole. ²¹Hodi ria tumata anu manguli, ‘Ole, eimo Pumparenta nu Alatala, atau Olemo: ememo Pumparenta nu Alatala!’ Habana Pumparenta nu Alatala nariamo ritotongomi, ri dunia ei.” ²²Naopu ee, nanguli Yesus ka anaguruNa, “Kana marata tempona komi madota

^w 17:14 Yesus nunia mumpakabelohi hira, jadi niowuNa hira lau mikipareha korora ante imam. Numbatintuni atura agama anu nipapola i nabi Musa, imam anu mahipato mumpareha koro nu tumata anu nadua bohe, ala mumpakatantu bara nabelomo, bara hodipa. Ole ri Imamat 13-14.

mangole karataKu, Yaku, Ana Manuhia, nau hawo haeo, tapi komi tamo mamala mangole Yaku. ²³Kana maria tumata manguli ka komi, ‘Olemo, ritu Ia!’ Bara manguli, ‘Olemo, ri hei Ia!’ Neemo komi mumbatintuni napa anu niulira. ²⁴Habana tempo Yaku, Ana Manuhia marata mpanjili ri dunia, karataKu kana raole ri njumaongu dunia ewa kila anu nuwende ri laerawa pade numbawanta njumaongu langi. ²⁵Tapi, taapa marata tempona etu, Yaku kana mumbahimbu pantidomakaKu, bu rapuara nu tumata anu natuwu tempo ei.


²⁶Tempo Yaku, Ana Manuhia marata, pukainggu nu manuhia kana mahimbai ewa pukainggu nu manuhia tempo i nabi Nuh nggaulu.

²⁷Tumata numbanai bu nanginu, nurongo bu numbipurongo; hira ewa ee njuu, hampe nabi Nuh nihua riara hakaya bohe. Pade lono bohe narata bu numbaongahi hira pura hampe namate. ²⁸Wetu mbui inggu nu tumata ri ngata bohe Sodom nggaulu tempo Lot da niari ri ngata ee. Hira numbanai bu nanginu, nubalu bu neoli, nutuda-tuda bu nuwangu bola. ²⁹Tapi, tempo Lot nalau loko ri ngata bohe Sodom, ri eo ee mbui Alatala numbarupanau watu ante apu loko ri langi ewa uda ntamba, numbaropuhi pura-pura tumata ri ngata bohe ee. ³⁰Ewa etumo pukainggu nu manuhia tempo Yaku, Ana Manuhia, marata mpanjili ri dunia ei. ³¹Ri eo ee, tumata anu nikatoko ri tampa pikatoko ri wonggo nu ata bolana,^x nee mihua riara bola bu mangala napa-napa riara bola. Wetu mbui tumata anu da ri tinaluna, neemo ia manjili ri bolana. ³²Toramo, napa anu najadi ante rongo banggele i Lot!^y ³³I hema anu hawo numbatintuni dotana mboto, ia hodi mumbarata katuwu anu hodi ria kaopuna. Tapi hema anu mumbawoi katuwuna ala mumbatintuni Yaku, iamo anu mumbarata katuwu anu hodi ria kaopuna. ³⁴Pariarantaikamo! Nggawengina ee tempo karataKu ane maria rudua tumata anu maturu ri hongu paturu, hadua rakeni ri huruga bu hadua maboli. ³⁵Naria rudua banggele numbai pae, hadua rakeni ri huruga bu hadua raboli. ³⁶[Ane maria rudua tumata mukarajaa ri tinalu, hadua rakeni hadua raboli.]

³⁷Pade nikutanamo anaguru Yesus, “Pue, riumba etu kana madupa?” Nihabo Yesus, “Ane komi mangole tonji kulaa mahiromu, natantumo ri hetu naria binata anu namate. Wetu mbui ante karataKu, natantumo manoto mbui ka komi, meopia bu riumba kajadina.”

^x 17:31 Ata bola nu tu Israel, nalimba bu nabiahia nipake nundodo.

^y 17:32 Tempo ee, rongo banggele Lot da neili ri puri, nangole nuapa anu nipalaihina ri ngata bohe Sodom. Etumo habana ia nihuku Pue najadi nono gara. Ole ri Kajadia 19:26.



Ata bola nu tu Yahudi (17:37)

Purapahi banggele natimbala ante tuputangara

18 ¹Naopu ee Yesus numpatuduhi anaguruNa ante hongu purapahi ala hira maharo muhambaya ante hodi mahau rara. ²Nanguli Yesus, “Ri hongu ngata bohe, naria hadua tuputangara anu hodi naeka ka Alatala, bu hodi mbui nipeilina himbai manuhia. ³Ri ngata bohe ee, naria mbui hadua banggele anu natimbalamo naharo narata ka tuputangara ee ala mirapi rahaliku. Nanguli ia, ‘Tulungi yaku mumbatingayohi baliku.’ ⁴Pamulana tuputangara ee hodi nadota mumbatulungi banggele ee. Tapi kaopuna ia numpikiri, ‘Naupa yaku hodi naeka ka Alatala bu hodi mbui numbaeili himbai manuhia, ⁵aginamo kutulungi banggele ei ala ia hodi mumbabago bu mumpakahuha yaku njuu.’ ”

⁶Pade nanguli Pue Yesus ka anaguruNa, “Epe mpakabelo napa anu niuli nu tuputangara anu natenggo rarana ee! ⁷Iapa tumata anu natenggo rarana nadota numbatulungi banggele anu natimbalamo, neemopa Alatala! Natantumo kana ratulungiNa tumata anu hodi napudu-pudu mirapi njuu eo bu nggawengina. Nee rapikirimi Alatala hawo nukalera mumbatulungi hira. ⁸Parahayamo! Kana mahahinta rahalikuNa hira. Tapi tempo Yaku, Ana Manuhia marata mpanjili ri

dunia ei, damariapa Kurata tumata anu mpuu-mpuu mumparahaya ka Yaku?"

Purapahi tu Farisi ante tupuhungara bahitee

⁹Yesus nuteha purapahi ei ka tumata anu numpikiri ane hiramo belona bu numgapandaente tumata ntanina. ¹⁰Nanguli Yesus, "Naria rudua tumata nalau muhambaya ri Bola Pue Alatala. Hadua tu Farisi, bu hadua tupuhungara bahitee. ¹¹Tu Farisi ee nionggo bu nuhambaya, niulina, 'Pue, yaku nuhukuru ka Komi habana yaku ei hodi nahimbai ewa tumata ntanina, anu nebagiu, anu nadaa rarana, bu nubualo. Yaku nuhukuru mbui habana yaku hodi ewa tupuhungara bahitee eme. ¹²Riarana haminggu rungani yaku napuaha, bu yaku mbui numbawoi ka Komi hampulu bagia loko ri pura-pura pumbarataku.' ¹³Tapi, tupuhungara bahitee ee nionggo nakawao loko ri tumata ntanina, pade hodi nabia nantingoa langi. Ia nanjoho rara bu numbahapa bumbarana pade nanguli, 'Pue, putowemo yaku habana yaku ei tumata nadoha.' ¹⁴Nanguli Yesus ka hira, "Kuuli ka komi, tempo hira rudua nanjili, tupuhungara bahitee etumo anu niampuni nu Alatala, tapi tu Farisi ee hodi niampuni. Habana, hema anu mumbaangga korona milabipa loko ri tumata ntanina ia kana raparintambe, pade hema anu mumparintambe korona katuwuna kana raore nu Alatala."

Yesus numbaganehi ngana-ngana

¹⁵Hanggani tempo, nadea tumata nanggeni ngana kodi ka Yesus, ala Ia mumbadika paleNa ka ngana-ngana ee bu mirapi Alatala mumbaganehi hira. Tapi, nangole ee anaguruNa numbagukarau tumata ee. ¹⁶Tapi, Yesus numbaronde ngana-ngana ee bu nanguli ka anaguruNa, "Palambakamo ngana-ngana etu marata ante Yaku, neemo ratagi hira, habana tumata anu ingguna ewa ngana-ngana etumo anu mahipato majadi tudeaNa riara Pumparenta nu Alatala. ¹⁷Pariarantaikamo! Hodi ria nau hadua tumata anu mamala majadi tudea nu Alatala riara pumparentaNa ane ia hodi matundu ka Alatala, nahimbai ewa inggu nu ngana-ngana kodi ei."

Tumata nahugi nahuha mihua riara Pumparenta nu Alatala

¹⁸Naria hadua kapala nu tu Yahudi nikutana ka Yesus, "Guru anu nabelo, nuapa anu kana kubabe ala yaku mumbarata katuwu anu hodi ria kaopuna?" ¹⁹Nihabo Yesus, "Nanggia niulimu Yaku nabelo?

Hawo Alatala anu nabelo, hodi ria anu ntanina. ²⁰Tantu ninjanimumo parenta-parenta nu Alatala anu nanguli, Nee mubualo, nee mipatehi, nee mangonggo, nee muhabi dawa, bu bilamo tina tuamamu."

²¹Nihabo tumata ee, "Pura-pura parenta etu nibabekumo loko ri kakabilahaku." ²²Nangepe ee, nangulimo Yesus ka ia, "Da maria hangayapa anu kana mubabe. Panjilimo bu pubalu pura kahugimu pade woimo doina ka tumata napakahilala iko mumbarata kahugilu huruga. Maupu etu, karatamo wime bu tintunimo Yaku!" ²³Nangepe panguli Yesus ee, nahuhamo rarana, habana ia tumata anu mpuu-mpuu nahugi. ²⁴Ninjani Yesus tumata ee nahuha rarana, jadi niuliNa ka ia, "Nahuha mpuu tumata anu nahugi majadi tudea nu Alatala riara PumparentaNa. ²⁵Nagampapa hambaa unta nihua ri bolo nu jaru, pade tumata anu nahugi mihua riara Pumparenta nu Alatala." ²⁶Tumata anu nangepe ee nikutana, "Ane wetu, hema anu mamala rapakahalama?" ²⁷Nihabo Yesus, "Napa anu hodi namala nibabe nu manuhia, namala nibabe Alatala." ²⁸Pade nanguli Petrus, "Pue, Olemo, Nipalaihika puramo napa-napa anu naria ante kami bu numbatintuni Komi." ²⁹Nanguli Yesus ka hira, "Ala ranjanimi, kakonona tumata anu numbagalaihi bolana, rongona, hampihuwuna, tina tuamana bu ana-anana habana numbatintuni Alatala, ³⁰kana milabi-labipa kadeana anu raratananu ri dunia ei loko ri napa anu nipalaihina ee. Pade ri eo purina ia kana mumbarata katuwu anu hodi ria kaopuna."

Katolu ngganina Yesus nuteha kamateNa

³¹Yesus numpahiromu hampulurudua anaguruNa pade nanguli ka hira, "Epemo! Tempo ei kita malau ri Yerusalem. Pade ri hememo, kana madupa pura-pura anu nitulihilu nu nabi-nabi nggaulu, etumo anu madupa ka Yaku, Ana Manuhia. ³²Yaku kana rawoi ka tumata anu hodi tu Yahudi,^z rapungeira, rahalaira bu ratuweluhira. ³³Yaku kana raduahi bu rapatehira, tapi ri katolu eona Yaku matuwu mpanjili." ³⁴Tapi pura-pura anu niteha Yesus ee, hodi nipaha nu anaguruNa. Habana batua nu tehaNa ee, da natiwunihi ka hira.

Yesus numpakabelohi hadua tumata naburo

³⁵Tempo Yesus maparamo marata ri ngata bohe Yeriko, naria hadua tumata naburo nikatoko bu nirapi-rapi ri wiwi dala. ³⁶Wetu niepena

^z ^{18:32} Yesus rawoika tu Roma ala rahuku mate, habana ri tempo ee, tu Yahudi ri tambe pumparenta nu tu Roma.

tumata dea nuliu, nikutanamo ia, "Napa anu najadi?" ³⁷Nanguli hira, "Yesus tu Nazaret nuliu." ³⁸Nangepe ee, nungaremo ia niulina, "Yesus muli nu Madika Daud, putowemo yaku!" ³⁹Tumata anu ri ngayo narau bu nangowu ia malino. Tapi tumata naburo ee tambai kamanggana nungare, "Yesus muli nu Madika Daud, putowemo yaku!" ⁴⁰Nangepe tumata naburo ee nungare, nitaamo Yesus pade niowuNa tumata ala manggeni tumata naburo ee ka Ia. Wetu tumata naburo ee narata, nikutanamo Yesus ka ia, ⁴¹"Nuapa anu mupodota Kubabe ka iko?" Nihabo tumata naburo ee, "Pue, yaku madota meole!" ⁴²Nanguli Yesus ka ia, "Ane wetu, olemo! Nabelomo matamu, habana iko numparahaya Yaku!" ⁴³Ri tempo ee mbui, tumata naburo ee haliu niole. Pade nalaumo ia numbatintuni Yesus bu numbatuia Alatala. Pura-pura tumata anu nangole kajadia ee, numbatuia Alatala.

Yesus ante Sakeus

19 ¹Riara mpulumako Yesus malau ri Yerusalem, Ia nuliu ri ngata bohe Yeriko ²Ri ngata bohe ee naria hadua kapala tupuhungara bahitee anu nahugi. Hangana Zakheus. ³Ia madota mangole Yesus, tapi tumata nadea gaga rihee bu korona naredes, etumo habana hampe ia hodi namala nangole Yesus. ⁴Pade nukumendomo ia numpariuluhi tumata dea ee, bu nimpone ri hampuu kai ala ia mamala mangole Yesus tempo muliu rihee. ⁵Wetu Yesus narata ripunanggai ee, nitingoanamo bu nanguli, "Zakheus, panaumo! Eo ei Yaku kana mahambengi ri bolamu." ⁶Pade nahalihamo Zakeus nanau bu numbaratima Yesus ri bolana ante kadombo nu rara.

⁷Tapi, pura-pura tumata anu nangole ee nanggambunta bu nanguli, "Ih! Nanggia Yesus mahambengi ri bola nu tumata anu nadoha?"

⁸Wetu Yesus ri bola Zakheus, nionggom i Zakheus bu nanguli, "Pue, hantanga loko ri kahugiku ei kuwoi ka tumata anu napakah. Hema-hema anu nibagiuku kana kupupanjili ka ia patanganipa kadeana." ⁹Pade nanguli Yesus, "Eo ei Alatala mumpakahalama komi hongu bola bu numbaroika komi katuwu anu nabou, habana komi mbui muli i Abraham. ¹⁰Habana Yaku, Ana Manuhia, marata ri dunia ei mangelo tumata anu nakawaomo loko ri Alatala, pade mumpakahalama ia loko ri pehuku nu doha."

Purapahi batua anu natundu ante anu hodi natundu

¹¹Ranjana tumata da nangepe Yesus nujarita, nitehaNa hongu purapahi. Tempo ee Ia maparamo ri Yerusalem bu tumata numbarumaka Alatala

kana mumparenta ewa hadua Madika ri dunia ei. ¹²Etumo habana Yesus nanguli iwei, "Naria hadua tumata anu nibila katuwuna kana malau ri ngata anu nakawao ala raonggotaka majadi Madika, naopu ee ia kana manjili mumparenta ri ngatana mboto. ¹³Tempo ia taapa nalau, nirondena hampulu batuana. Pade niwoina ka hira hadua-hadua hongu doi bulawa, niulina ka hira, 'Koimo komi mudaga ka yaku ante doi etu, tempona yaku malau ri ngata anu nakawao.' ¹⁴Tapi tumata anu ri ngata ee, hodi nipokonora ia. Jadi tempo ia nalaumo, hira nangowu hurora ala mumbatuntuni ia malau ri ngata anu nakawao ee ala manguli ka tumata anu madota mumbaonggotaka muli nu madika ee iwei, 'Kami hodi madota tumata ei majadi Madika ri ngataka.'

¹⁵Tapi tumata anu nibila ee raonggotaka majadi Madika. Naopu ee ia nanjilimo ri ngatana. Pade niowuna tumata mumbaronde batuana anu hampulu ee, ala ranjanina hanggiamo pumbaratara loko ri pudagara ee. ¹⁶Nanguli batua anu pamulana, 'Madika, hongu doi bulawa anu niwoimi ka yaku ni pakajadiku hampulomo.'

¹⁷Nanguli madika ee ka ia, 'Komi batuaku anu mpuu-mpuu nabelo habana riara pukarajaa anu nakodi komi namala niparahaya. Jadi yaku mumbawoi ka komi hampulu ngata anu raparentami.'

¹⁸Batua anu karuduana mbui nanguli, 'Madika, hongu doi bulawa anu niwoimi ka yaku, ni pakajadiku alima.'

¹⁹Nanguli madika ee ka batuana, 'Komi kuwoi ka alima ngata anu raparentami.'

²⁰Pade batua anu ntanina mbui nanguli, 'Madika, doi anu niwoimi ka yaku kupupanjili ka komi habana hawo niboliku bu nibungguku ri haputanga.'

²¹Yaku naeka ante komi habana komi tumata anu naharo numbaontika batuana anu nahondo. Komi nangala loko ri nuapa anu hodi nibolimi, pade komi numpupuhi loko ri nuapa anu hodi nitudami.'

²²Madika ee nanguli, 'Komi batuaku anu hodi nabelo. Nahimbai ewa napa anu niulimi etu, yaku kana mumbahuku komi. Ninjanimi yaku tumata anu nangala nuapa anu hodi niboliku, bu numpupuhi loko ri nuapa anu hodi ni tudaku. ²³Ane wetu, nanggia doi ee hodi niwoika tumata anu natau numpagoli doi ala maria anana? Jadi, tempona yaku manjili mamala ku ala doi ee ante anana.' ²⁴Pade madika ee nanguli ka tumata anu niongan rihee, 'Ala doi etu loko ante ia, pade woika batua anu numbarata hampulu doi bulawa ee wuwei.'

²⁵Tapi tumata dea ee nahera nanguli, 'Madika, batuami ee numboli hampulu doi bulawa ee.'

26 Nihabo madika ee, ‘Tora! Kuuli ka komi hema anu mamala raparahaya ante nuapa anu niwoika ia, kana ratambaika ia. Tapi hema anu hodi namala raparahaya, napa anu naria ante ia naupa hawo kokoi, kana raala loko ante ia. **27** Pade tempo ei, keni ri ngayoku pura-pura baliku anu hodi nadota nantarima yaku majadi madikara, patehimo hira pura-pura ri ngayoku hei.’”

Yesus nitomunaka ri Yerusalem ewa madika

28 Naopupa Yesus nanguli pura-pura ee ka hira, Ia numpapolahi pulumakoNa malau ri Yerusalem. Ia nulumako ri ngayona bu tumata ntanina numbatintuni Ia. **29** Tempo hira napara ri ngata Betfage bu Betania ri bulu anu nuhangaka bulu Zaitun, Ia nangowu rudua anaguruNa muriulu. **30** Nanguli Yesus, “Koimo ri ngata anu naria ringayota etu, ane komi mihua rihee komi kana mangole naria hambaa ana nu keledai anu nitataka. Keledai ee taapa ria nau hanggani ni pihawi nu tumata. Pawiamo keledai ee pade kenimo wime. **31** Ane maria tumata mikutana ante komi, ‘Nanggia nipawiami keledai etu?’, Ulimo ka hira, ‘Pue madota mihawi keledai ei.’” **32** Pade nalaumo anaguruNa ee, hira numbarata pura-pura ewa nuapa anu niuli Yesus ka hira.

33 Ranjana hira numbakakahi kaloro nu keledai ee, naratamo pue nu keledai bu nanguli, “Nanggia komi numbakakahi kaloro nu keledai etu?” **34** Nanguli anaguruNa, “Pue numparalu keledai ei.” **35** Pade nikenira ana nu keledai ee ka Yesus ni lampihira ante jubara. Pade hira mbatulungi Yesus mikatoko ri keledai ee. **36** Tempo Yesus nuliu rihee nihawi keledai, tumata dea numbalampihi dala ante jubara. **37** Tempo Yesus narapa ri ngata bohe Yerusalem, nulumako nutua loko ri bulu Zaitun, anaguruNa bu tumata anu numbatintuni Ia, mpamula nungare-ngare numbatua Alatala bu nuhukuru ka Ia ante pura-pura kabaraka anu niolera mboto. **38** Nanguli hira, “Raganehimo Madika anu narata riara hanga Pue, tuiamo Alatala bu kabelo nu katuwu riara huruga.” **39** Naria bara hanggia dua tu Farisi loko ri olo tumata dea nanguli ka Yesus, “Guru, owomo tuputintuniMi ei malino.” **40** Nihabo Yesus, “Parahayamo ane hira malino matantumo watu-watu ei kana mungare.”

Yesus numbatangihi ngata bohe Yerusalem

41 Wetu Yesus naparamo ri Yerusalem, nipetirohiNa ngata bohe ee, pade nitangihiNamo. **42** Nanguli Yesus, “Nangginahi mpuu komi anu niari ri ngata bohe ei. Nabelo mpuu ane eo ei ranjanimi napa anu mamala manggeni puwinggabelo ka komi, tapi pura-pura ee da



Yesus nihawi Keledai (19:40)

natiwunihi ka komi.” **43** Kana marata tempona ngatami rawala ntiku nu balimi, pade balimi mumbatiku komi hampe komi hodi mamala mihuwu. **44** Hira mumbagerohi ngatami, bu mumbapatehi komi pura-pura anu niari ri ngata bohe ee. Pade hodi rapalambara nau hongu watu maboli matihunju ri tampana. Habana eimo tempona Alatala narata mumpakahalama komi, tapi komi hodi nipariarantaikami.

Yesus nihua ri Bola Pue Alatala bu numpakagahaha

45 Pade nihuamo Yesus riarylou nu bola Pue Alatala, mpamulamo Ia numbatulai pura-pura tumata anu nugade rihee. **46** Nanguli Yesus ka hira, “Riara Buku Gaha nitulih, ‘BolaKu ei Bola anu nipake nu tumata muhambaya.’ Tapi nipajadimi bola puhintomu nu tupiago!” **47** Eo-eo Yesus numpaguru riara Bola Pue Alatala. Kapala nu imam-imam bu tupande ri atura Musa, ante tumata-tumata anu niangga ri Israel, nangelo akala ala hira mamala mumbapatehi Yesus. **48** Tapi hodi niratara dala ala hira mamala mumbapatehi Yesus, habana pura-pura tumata nadombo rarara nangepe Yesus nuteha.

Kapala tu Yahudi nikutana, loko riumba kuaha Yesus

20 ¹Ri hongu eo, Yesus numpaguru bu numpatulele Kareba Belo loko ri Alatala ka tumata riara Bola Pue Alatala. Naratamo kapala nu imam-imam bu tupande ri atura Musa ante tutua-tutua

tu Yahudi. ²Nanguli hira ka Yesus, “Uli ka kami ante kuaha hema nibabeMi pura-pura ei? Hema anu numbawoi kuaha ei ka Komi?”

³Nihabo Yesus ka hira, “Yaku mbui mikutana ka komi. Ulimo ka Yaku: ⁴Hema anu numbawoi kuaha ka Yohanis numbabaptis tumata? Kuaha ee loko ri Alatala atau loko ri manuhia?” ⁵Numpamulamo kapala-kapala tu Yahudi nuteha himbai hira niulira, “Tapi ane raulita kuaha Yohanis loko ri Alatala, matantumo Ia kana mikutana ka kita, ane wetu nanggia hodi niparayahami Yohanis? ⁶Tapi ane raulita kuaha loko ri manuhia, matantumo tumata dea mumbarompo kita ante watu, habana hira numparahaya ane Yohanis mpuu-mpuu Nabi.” ⁷Jadi nihabo hira, “Hodi ninjanika i hema numbawoi kuaha ka Yohanis ala mumbabaptis tumata.” ⁸Pade nanguli Yesus ka hira, “Ane wetu, hodi mbui Kuuli ka komi kuaha hema anu nipakeKu nubabe pura-pura ei.”

Purapahi tupukarajaa tinalu angguru

⁹Naopu ee, Yesus nuteha hongu purapahi ka hira, iwei, “Naria hadua tumata anu nutuda angguru ri tinaluna. Pade tinaluna ee niparhayanganaka bara hanggia dua tumata ala mumbakarajaana, pade pumbarata loko ritanalu ee rabagi. Pade ia malau ri ngata ntanina, bu miari mahae ri heme. ¹⁰Pade naratamo tempona hira numpupu wua nu angguru ee. Niowuna hadua batuana malau ante tupukarajaa ri tinaluna ala tupukarajaa ee mumbawoi habagia pumbaratara loko ri tinaluna. Tapi batua ee niboba nu tupukarajaa, pade ni owura nanjili ante hodi nanggeni nuapa-nuapa. ¹¹Naopu ee pue nu tinalu nangowu batua ntanina mbui, tapi batua ee ni bobara bu nipakaeara, pade ni owura nanjili ante hodi nanggeni nuapa-nuapa. ¹²Kapolana ia nangowu panjili batuana anu katuntoluna, tapi tumata ee ni bobara mbui hampe na baka pade nitendera ri hawuliku nu tinalu angguru ee. ¹³Kaopuna pue nu tinalu angguru ee nanguli, ‘Napapa anu kana kubabe? Ane wetu agina kuowu anaku anu niputoweku ei malau ka tupukarajaa ri tinalu angguru ee. Anu matantumo anaku ei rabilara.’ ¹⁴Tempo tupukarajaa ee nangole ana pue nu tinalu angguru narata ri rihee, nutehamo himbai hira, ‘Etumo ana nu pue tinalu angguru ei, ia eimo anu majadi tupuboli kahugi nu tuamana. Agina tapatehi ia ala tinalu angguru ei majadi bagiata.’

¹⁵Pade nikeniramo ana nu pue tinalu ee ri hawuliku nu tinalu bu nipatehira.” Pade nikutanamo Yesus ka tumata dea anu nangepe Ia nuteha ee, “Ane pue tinalu angguru ee manjili, nuapa anu kana rababena ka tupukarajaana ee? ¹⁶Matantumo pue nu tinalu ee marata

bu mumbapatehi tupukarajaana ee pade ragajina tupukarajaa anu ntanina mumbajagai tinaluna ee^a.” Nangepe ee, nangulimo tumata dea ka Yesus, “Neemo hampe etu anu madupa!” ¹⁷Yesus numpinotohi hira bu nanguli, “Ane wetu nuapa batuana anu nitulihii riara nu Buku Gaha?

Watu anu hodi niangga nuguna ka tupukarja bola^b,
ntono watu etumo anu pokona rapake mumbabe bola.

¹⁸Pura-pura tumata anu nanawu ri wonggo nu watu ee kana marogo, bu i hema anu rarunju nu watu ee kana mameme.”

Tumata nikutana pumbayari bahitee

¹⁹Tupande ri atura Musa bu kapala nu imam-imam ninjanira ane purapahi ee nipake Yesus mumbatuhala hira. Etumo habana hira madota mumbahoko Yesus tempo ee mbui, tapi hira naeka ante tumata dea rihee. ²⁰Jadi, nielora loga anu mabelo ala mumbahoko Ia. Nibayarira bara hanggia dua tumata anu nitibelo ala mikutana ka Yesus. Tumata ee mangelo kahala Yesus ala mamala rapangadura ri ngayo nu Gubernur Roma. ²¹Tumata anu ni owura ee nikutana ka Yesus, “Guru, ninjanika pura-pura anu niuliMi bu nuapa anu nipatuduhiMi etu nakono bu birumba tumata kana matuwu mumbatintuni parenta Alatala. Komi hodi naeka ka pumbarata nu tumata ntanina. ²²Jadi ulimo ka kami mumbatintuni atura agama nabi Musa, mamala atau hodi kami mumbayari bahitee ka Kaisar, madika nu tu Roma?” ²³Tapi ninjani Yesus patuju pumpikutanara ee hodi nabelo. Etumo habana Ia nanguli ka hira, ²⁴“Pupuole ka Yaku hongu doi pera etu. Putulihii bu gambara hema anu naria rihee?” Nihabo hira, “Kaisar.” ²⁵Nanguli Yesus ka hira, “Ane wetu, woimo ka Kaisar nuapa anu majadi bagiana, bu woikamo ka Alatala, nuapa anu majadi bagia nu Alatala.” ²⁶Kaopuna, ri ngayo nu tumata dea ee hodi naria niratara nau hongu kahala Yesus. Hira hawo nukumaa bu nalino nangepe pihabo Yesus.

Tu Saduki nikutana tumata anu natuwu mpanjili

²⁷Naopu ee, naria bara hanggia dua tu Saduki narata ante Yesus. (Tu Saduki ee tumata anu hodi niparayahana ane tumata namate

^a 20:16 Riara nu purapahi ei, Alatala nirapahika pue nu tinalu angguru, kapala-kapala tu Yahudi nirapahika tupukarajaa tinalu angguru, nabi-nabi nirapahika batua anu niowu nu pue nu tinalu, Pue Yesus nirapahika ana pue nu tinalu.

^b 20:17 Watu anu hodi niangga nuguna ka tupukarja bola: Etumo Pue Yesus anu nipuara bu nipatehi nu kapala-kapala tu Yahudi. Tapi Alatala numpakatuwu Ia mpanjili. Etumo habana Alatala numpajadi Ia watu anu nuguna ka tudea nu Alatala anu nabou.

mamala rapakatuwu mpanjili.) Nikutanamo hira ka Yesus, ²⁸“Guru, nabi Musa nutulih iatura ei ka kita ala tatintuni. Ane maria hadua langgai murongo bu mamate, pade ia hodi naria anana, hampihuwuna mboto kana murongo ante rongona anu natimbalamo ee. Ia kana mumbabe ewa ee, ala mumbawoi mulika hampihuwuna anu namatemo ee. ²⁹Nggaulu naria papitu langgai nu hampihuwu. Ana ulumbua nurongomo, tapi taapa naria anara, namatemo ia. ³⁰Pade toina karuduana nurongo ante rongo nu tuakana anu natimbala ee, tapi taapa ria anara, namate mbuimo ia. ³¹Iwetu mbui anu najadi ante hampihuwuna katontoluna bu ante hampihuwuna anu ntanina, hampe ante hampihuwuna anu kapapituna. ³²Kaopuna banggele ee namate mbuimo. ³³Jadi, ane pura-pura tumata anu namate kana rapakatuwu mpanjili, hema kakonona anu najadi rongo nu banggele ei? Habana kapapitu tumata anu nu hampihuwu ee, pura-pura numbapuronge banggele ee.” ³⁴Nihabo Yesus ka hira, “Tumata anu natuwu ri dunia ei, nurongo bu rapupurongo. ³⁵Tapi riara dunia anu nabou ri eo purina, hodi ewa ee. Alatala kana mumpakatuwu mpanjili tumata anu raangga mahipato, pade hira hodi murongo bu hodi rapupurongo. ³⁶Habana katuwura kana mahimba ewa malaeka nu Alatala anu hodi mamala mamate. Hira majadi ana-ana nu Alatala, habana hira nipakatuwu mpanjilimo loko ri kamatera. ³⁷Kana kupupuole ka komi teha anu naria ri Buku Gaha birumba manuhia nipakatuwu mpanjili loko rikamatena. Riara buku Musa, nioleta tehana birumba Alatala nulolita ka Musa loko riwala nggarui anu niwoya. Alatala nanguli ka Musa, ‘Yaku eimo Alatala anu njuu-njuu niparahaya Abraham, Ishak, ante Yakub.’ ³⁸Alatala nanguli iwee habana Iamo Pue Alatala nu tumata anu natuwu hodi Pue Alatala nu tumata anu namate. Habana ri pangole nu Alatala pura-pura tumata natuwu.” ³⁹Naopupa Yesus nanguli iwe, naria bara hanggia dua tupande ri atura Musa rihee nanguli ka Ia, “Guru, nabelo mpuu pihaboMi etu.” ⁴⁰Etumo habana hira tamo nabia nikutana nuapa ante Yesus.

Madika Tupumpakahalama iamo muli Daud

⁴¹Nikutanamo Yesus ka hira, “Birumba hampe namala rauli ane Madika Tupumpakahalama ee muli Daud? ⁴²Habana Daud mboto anu numpakatantu Madika Tupumpakahalama ee Iamo Pue anu niparahayana. Ewa anu nitulih iagara Buku Mazmur:

Alatala nulolita ka Pue anu niparahayaku, niuliNa,
‘Pikatokomo ri hambira pangganaKu,

⁴³hampe Kubabe bali-baliMu matundu ka Komi.”*

⁴⁴Jadi ane Daud nanguli Madika Tupumpakahalama ee Pue, birumba Ia hampe rauli muli Daud?”

Yesus numpupatora nee muinggu ewa guru-guru agama

⁴⁵Tempo tumata dea nangepe Yesus nuteha, nanguli Ia ka tuputintuniNa, ⁴⁶“Maingamo komi ante tupande ri atura Musa habana nipokonora nulumako-mako numpake juba bu nipokonora mbui nibila ri putomu. Hira mbui nipokonora nikatoko ri tampa anu nibila riara bola mpiPue bu ri tampa puhuha. ⁴⁷Pade hira numbabagiu banggele-banggele anu natimbalamo, bu numbaagohi bolara. Pade pukainggura anu hodi nabelo ee niwunihira ante puhambayara anu nantele bu nandoe. Jadi pehuku ka hira mpuu-mpuu nantomo.”

Pumbawoi nu hadua banggele anu natimbala bu napakah

21 ¹Tempo Yesus ri Bola Pue, nioleNa tumata nahugi numbahuaraka doira ri peti puhuaraka doi. ²NioleNa mbui hadua banggele natimbala bu mpuu-mpuu napakah numbahuaraka rumpeka doi pera. ³Nangole ee, nanguli Yesus ka hira, “Kakonona, nadeapa pumbawoi nu timbala napakah ei, pade pumbawoi nu tumata ntanina. ⁴Hira numbabawoi loko ri pilabi nu kahugira, tapi timbala ei numbabawoi pura-pura doi anu naria ante ia, anu niparaluuna mboto ka katuwuna.”

Yesus nuteha kagero nu Bola Alatala

⁵Naria bara hanggia dua tumata nuteha ka Yesus, birumba Bola Pue Alatala anu nipakaramba ante watu-watu anu mpuu-mpuu nagaya bu ante mpingaya pumbawoi nu tumata ka Alatala. Nanguli Yesus ka hira, ⁶“Maria tempona, pura-pura anu niolemei ei kana rapakagero pura; hampe hodi ria nau hongu watu anu rapalamba mumbihunju.”

Tumata anu numbatintuni Yesus kana maharo mumbarata kahuha

⁷Pade nikutanamo hira ka Yesus, “Guru, meopia etu kana madupa bu nuapa tandana ane anu niuliMi etu maparamo tempona?” ⁸Nihabo Yesus, “Maingamo komi! Neemo komi hampe rapanawu. Habana madea tumata kana marata mumpake hangaKu bu manguli, ‘Yaku eimo madika tupumpakahalama’, bu manguli mbui hira, maratamo

* 20:43 Mzm. 110:1

kaopu nu dunia! Nee ntoto komi mumbatintuni hira. ⁹Nee mbui komi mawiora ane mangepe kareba tumata mumbiewa, tumata mumbipatehi. Etu pura kana madupa ntani. Tapi etu hodipa tandana kaopu nu dunia.”

¹⁰Naopu ee, Yesus numpapolahi tehaNa, “Tumata ri hangatana mumbiewa ante tuhangatana bu madika-madika mumbiewa ante madika-madika ntanina. ¹¹Riumba-umba kana maria linu bohe, kaliwaha, bu dua mpundai. Pade ri langi kana majadi tanda-tanda anu mumpakaeka tumata. ¹²Tapi, taapa madupa pura-pura etu, komi kana rahoko bu raduahi. Komi kana ratangara ri bolabola mpiPue nu tu Yahudi, bu rahuaraka riara ntarunggu. Komi rakeni mbui ri ngayo nu madika-madika bu gubernur habana komi numbatintuni Yaku. ¹³Tempo ee, kana majadi loga belo ka komi muhabi bu mumpahampeka ka hira birumba pumparahayami ka Yaku. ¹⁴Pakaliongu rarami ala neemo makini rarami mumpikirika nuapa anu kana raulimi bara birumba pihabomi mumbahaliku koromi. ¹⁵Habana Yaku mboto anu kana mumbawoi ka komi jarita-jarita bu pumpikiri anu nanoto hampe hodi ria nau hadua balimi anu mumpakule mumbadagi komi bara mumbabalih tehami. ¹⁶Tempo ee, tina ante tuamami, hampihuwu, hararami bu roami kana mumbapubalu komi ka balimi. Maria hanu komi rapatehira, ¹⁷komi rapuwulumata nu tudea habana komi numbatintuni Yaku. ¹⁸Tapi nau hanggai wulua ribalenggamu hodi ria malipo. ¹⁹Ane komi bate-batena mumparahaya Yaku, komi kana mumbarata katuwu anu hodi ria kaopuna.”

Yesus nuteha kagero nu ngata bohe Yerusalem

²⁰“Ane raolemi ngata Yerusalem nitikuhi nu huradadu-huradadu balimi, natantumo ranjanimi tamo mahae ngata etu kana ragerohi. ²¹Ritempona ee, mabelopa ane tumata ri Yudea malai ri bulu bu tumata anu riara ngata Yerusalem mihuwu loko riara ngata, pade mabelopa tumata anu rihawalikuna nee mihua riara ngata. ²²Habana etumo tempona Alatala mumbahuku tu Yerusalem ala madupa pura-pura anu nitulih i riara Buku Gaha. ²³Mangginahi mpuu banggele anu natiana bu banggele anu da numpahuhu anana ri tempo ee, habana hira hantanga mate mukumendo. Tumata ri ngata ei mpuu mpuu mahuha habana Alatala kana mumbahuku ngata ei. ²⁴Hanu tu Yerusalem rapatehi ante tono, hanu rahoko pade rataha nu balira ringata-ngata ntumata ntanina. Pade ngata bohe Yerusalem kana

radagi bu raparenta nu tumata anu hodi tu Yahudi, hampe magana tempona anu nipakatantu nu Alatala ka hira.”

Karata mpanjili Ana Manuhia

²⁵“Pade kana maria tanda-tanda mumpakahera anu raolemi ri mata nu eo, ri wula ante ri bitue-bitue. Pura-pura tumata ri dunia ei kana maeka bu maingu rarara mangole balumba bohe bu mangepe pogu nu balumba ri tahi. ²⁶Ri tempo ee manuhia kana malimpu haba kaeka nu rara mangole napa anu madupa ri dunia ei, habana pura-pura anu nakuaha ri langi^c kana ragoya. ²⁷Maupu ee, raoleramo Yaku, Ana Manuhia marata riara nu gawu ante pura-pura kakuahaKu bu karemeKu. ²⁸Ri tempo pura-pura etu madupa, pakahadia koromu, pioggio pakaroho bu tingoamo langi, habana tamo mahae komi rapakahalama nu Alatala.”

Purapahi hanggai kai ara

²⁹Naopu ee, Yesus nuteha hongu purapahi ka anaguruNa iwei, “Olemo kai ara bu kai ntanina. ³⁰Ane raolemi kai muroyamo, matantumo ranjanimi maparamo tempona mapane. ³¹Wetu mbui ane komi mangole pura-pura kajadia anu niuliKu wuwei, ranjanimi tamo mahae Pumparenta nu Alatala maratamo. ³²Pariarantaikamo anu niuliKu ei! Kakonona taapa mamate pura tumata anu natuwu ri tempo ei, pura-pura kajadia anu niuliKu ei madupamo. ³³Langi bu tana kana malanya tapi lolitaKu bate-batena hampe ri kahae-haena.”

Kita kana mahadia mumpupea karata Pue Alatala

³⁴Pade nanguli Yesus, “Komi kana mainga, neemo hampe komi maheha ka puhuha bu panginu anu numpakalangu, bara hawo mumpikirika napa anu niparaluumi eo-eo. Ane komi mumpikirika ewa etu, komi hodi mahadia mumbatarima eo karata Ana Manuhia anu hodi ranjani-njani. ³⁵Habana eo ee marata ka pura-pura tumata ri dunia ei, ante hodi ranjani-njani. ³⁶Jadi, komi kana mainga njuu. Nee mapudu-pudu muhambaya ala rapakulemi mumbatingayohi pura-pura anu madupa bu rapakulemi mioggio ri ngayoku Yaku Ana Manuhia.”

³⁷Ri eona Yesus numpaguru ri Bola Pue Alatala, pade nggawengina nalau naturu ri Bulu Zaitun. ³⁸Hampadondo-hampadondona nadea tumata narata ri Bola Pue Alatala nangepe Yesus numpaguru.

^c 21:26 pura-pura anu nakuaha ri langi: Mamala rabatuahi eo, wula ante bitue-bitue.

Kapala-kapala tu Yahudi nunia mumbapatehi Yesus

22 ¹Maparamo tempona eo puhuha nu tu Yahudi anu niuli Puhuha Roti Hodu Nuragi. Puhuha ee niuli mbui puhuha Paskah. ²Kapala nu imam-imam ante tupande ri atura Musa mangelo hala Yesus ala hira mumpilino mamala mumbapatehi Yesus, habana hira naeka ka tumata dea.

Yudas nahituju mumbapubalu Yesus


³Tempo ee Yudas anu niuli mbui Iskariot, hadua loko ri hampulurudua anaguru Yesus, nipiuhahi Madika nu Heta. ⁴Naopu ee nalaumo ia nuhirata ka kapala nu imam-imam ante kapala-kapala tupujagai ri Bola Pue Alatala, muteha birumba ia mamala mumbapubalu Yesus ka hira. ⁵Nangepe ee, nahana mpuumo rarara, pade hira nujanji mumbawoi doi ka Yudas. ⁶Nahitujumo Yudas pade ia mangelo loga belo ala mumbapubalu Yesus ka hira ri tempo anu hodi ranjani nu tumata.

Anaguru Yesus numpahadia Puhuha Paskah

⁷Naratamo eo matana Puhuha Roti hodi nuragi, ewa ada agama tu Yahudi, hambaa bimba kana rahambale ri eo ee ala hira mumbanai ri Puhuha Paskah. ⁸Etumo habana hampe Yesus nangowu Petrus ante Yohanis, niuliNa, “Koimo, pakahadia pumbanai Paskah ka kita.” ⁹Nikutanamo hira rudua, “Pue, riumba rapudotaMi ala kami mumpahadia pumbanai Paskah etu?” ¹⁰Nihabo Yesus, “Tempo komi mihua riara ngata bohe Yerusalem, komi kana muhirata ka hadua langgai anu nanggeni gumba nuihi ue. Tintunimo ia malau ri bola anu rapehuana. ¹¹Pade uli ka pue bola iwei, ‘Guru nikutana: riumba tampa anu mamala Kupake mumbanai Paskah muhinggani ante anaguruKu?’ ¹²Pade pue bola ee mumbatinuduhi ka komi hongu tampa naluo riara njou riwonggonan anu nagana puramo parewana. Rihetumo komi mumpahadia pumbanai Paskah ka kita.” ¹³Jadi nalaumo Petrus ante Yohanis nihua riara ngata bohe. Ri ngata bohe ee, niratara mpuumo, nahimbai ewa anu niuli Yesus ka hira. Pade nipahadiaramo pumbanai Paskah.

**Yesus nangowu anaguruNa mumbanai roti bu
manginu angguru ala mumbatora Ia**

¹⁴Naratamo tempona hira mumbanai ri Puhuha Paskah. Yesus nikatoko nuhinggani ante anaguruNa ri Puhuha ee. ¹⁵Nangulimo Yesus



Pumbanai Paskah (22:13)

ka hira, “Nabohe mpuu raraKu mumbanai muhinggani ante komi pura ri Puhuha Paskah ei, kambana Yaku taapa mantidomaka. ¹⁶Kuuli ka komi pura-pura, tamo Yaku mumbanai ri Puhuha Paskah ei hampe marata tempona batua nu Puhuha Paskah anu kakonona rapakadupa. Etu kana majadi tempo Alatala marata mumparenta manuhia ri dunia ei.” ¹⁷Naopu ee Yesus nangala hongu cangkiri nuihi ue angguru. Ia nuhukuru ka Alatala pade nanguli Ia ka anaguruNa, “Alamo angguru ei pade inumo komi hadua-hadua. ¹⁸Kuuli ka komi: mpamula loko ri tempo ei, tamo Yaku manginu ue angguru ei hampe Pumparenta nu Alatala madupa ri dunia ei.” ¹⁹Naopu ee niala Yesus mbui roti. Naopu Ia nuhukuru ka Alatala, nitubi-tubiNa roti ee bu nibagiNa ka anaguruNa pade nanguli Ia, “Eimo koroKu, anu Kuwoi ala mumbatolohi komi pura. Babemo ada ei ala komi mumbatora Yaku.” ²⁰Naopu ee, niala Yesus mbui hongu cangkiri anu nuihi ue angguru pade nanguli Ia, “Panginu ei, batuana pujanji Alatala anu nabou anu numpahiromu Alatala ante manuhia. Pujanji ei nipakaroho ante raaKu anu natiti ka komi. ²¹Tapi olemo! Tumata anu kana mumbapubalu Yaku naria nikatoko numbanai nuhinggani-nggani ante Yaku ri hei. ²²Yaku, Ana Manuhia kana mamate ewa anu nipakatantumo nu Alatala, tapi mahilakamo tumata anu mumbapubalu Yaku.” ²³Nangepe ee numpipikutanamo himbai anaguru Yesus, “Hema loko ante kita ei anu kana mumbapubalu Yesus?”

Anaguru Yesus numbibili hema anu nabohepa katuwuna

²⁴Pade niumbamo pumbibili ritotongo anaguru Yesus, hemapa loko ri hira anu nabohepa katuwuna. ²⁵Nangepe ee, nanguli Yesus ka hira, “Madika-madika anu hodi nuhinjani ante Alatala numbapatundu

tudeana, bu tumata anu nalanga panggana nipokonora rauli tupehaliku. ²⁶Tapi komi pura neemo ewa etu. Kakonona loko ri komi pura ei, tumata anu nabohela katuwuna kana majadi tumata anu hodi niangga, bu hemu anu madota majadi kapala, ia kana majadi batua. ²⁷Hema anu nilabipa rabila, tumata anu nikatoko mumbanai, atau tumata anu nanggeni pumbanai? Natantumo tumata anu nikatoko. Tapi Yaku, naria ri olomi ala najadi hadua batua. ²⁸Komimo anu muhinggani-nggani ante Yaku, ri tempona Yaku mumbatingayohi kahuhaKu. ²⁹Jadi, Kuwoika kuaha ka komi mumparenta, nahimbai ewa TuamaKu anu numbawoi kuaha ka Yaku mumparenta tudeaNa. ³⁰Jadi komi mbui kana madombo mumbanai bu manginu ante Yaku riara PumparentaKu. Pade komi mbui kana mikatoko ri hampulu rongu pikatoko, ala mumparenta hampulu rongu muli nu tu Israel.”

Yesus nuteha pihapu Petrus

³¹Pade nanguli Yesus ka Simon Petrus, “Simon, Simon, epe mpakabelo! Madika nu Heta niwoika Alatala loga ala mumpehori komi pura. Nahimbai ewa tupuwaro pae, ia kana mumbagaal pae anu nuihi lako ri pae anu hodi nuihi ³²Tapi, nuhambayamo Yaku ka iko Simon, ala pumparayahamu hodi moura. Jadi, maopupa iko rapehori pade mumbatintuni Yaku mpanjili, iko kana mumpakaroho pumparayahaya nu hampihuwu-hampihuwu.” ³³Nihabo Petrus, “Pue, hodi kupalahi Komi naupa yaku ratarunggu bu mamate muhinggani-nggani ante Komi!” ³⁴Tapi, nihabo Yesus, “Toromo Petrus, taapa mutotoroo manu bubayana, tolunganimo iko mumbahapu Yaku!”

Anaguru Yesus kana mainga

³⁵Naopu ee Yesus nanguli ka anaguruNa, “Nggaulu, tempo Yaku nangowu komi lau numbapatulele Kareba Belo, pade hodi niwoiKu komi nanggeni doi, batutu, bara hapatu, naria anu nakura ante komi?” Nihabo hira, “Hodi ria” ³⁶Pade nanguli Yesus, “Tapi, ri tempo ei hema anu naria doina, bara batutuna, kana rakenina. Hema anu hodi naria tonona, ia kana mubalu pakeana bu rapangolina tono. ³⁷Habana naria nitulihii riara Buku Gaha,

‘Madika Tupumpakahalamu kana raangga tumata nadaa.’

Anu nitulihii etu, mpuu-mpuu madupa ri koroKu.

Habana anu nitulihii riara Buku Gaha etu, numbateha Yaku, bu etu nipakadupamo ri tempo ei.” ³⁸Pade nanguli anaguruNa, “Pue, eimo rumata tono.” Nihabo Yesus, “Naganamo.”

Yesus nuhambaya ri bulu Zaitun

³⁹Naopu ee Yesus nihuwu loko riara ngata, pade ewa kabiahNa, nalaumo Ia nintende ri bulu Zaitun. AnaguruNa numbatintuni Ia mbui. ⁴⁰Karatana ri heme, nanguli Ia ka anaguruNa, “Komi kana muhambaya, ala komi hodi mambela pehori.” ⁴¹Naopu ee, nalaumo Ia nakawao kukoi loko ri hira, kakawaona nitahere hampupalua watu. Nutumbukotumo Ia bu nuhambaya. ⁴²NiuliNa, “Alatala TuamaKu, ane rapudotaMi, pakakawao kahuha ei loko ante Yaku, tapi nee dotaKu anu majadi, hawo dotaMi anu majadi.” ⁴³Naopu ee, naratamo hadua malaeka lako ri huruga ala numpakaroo raraNa. ⁴⁴Nahuha mpuu raraNa hampe Ia mpuu-mpuu nuhambaya hampe iniNa ewa raa natiti ri tana. ⁴⁵Naopu nuhambaya, nionggomo Yesus nalau ka anaguruNa. NirataNa hira naleta puramo habana nawuku mpuu rarara. ⁴⁶Nanguli Ia ka anaguruNa, “Nee maleta, Pimbangumo bu puhambayamo ala komi nee rapehori.”

Yesus nihoko

⁴⁷Tempo Yesus da nujarita, naratamo bara hanggia mpulu tumata anu nikeni Yudas. Yudas ei hadua loko ri hampulurudua anaguru Yesus. Wetu hira narata rihee nalaumo Yudas ka Yesus pade nitabena ante pieki. ⁴⁸Tapi nanguli Yesus, “Yudas bontono ante piekimu etumo iko numbapubalu Yaku, Ana Manuhia ka baliKu.” ⁴⁹Wetu anaguru Yesus anu naria rihee nangole napa anu najadi, nangulimo hira, “Pue, ka timbe ante tonomo hira?” ⁵⁰Pade hadua loko ri anaguru Yesus, numbatimbe batua nu imam bohe hampe napudu talinga pangganana. ⁵¹Tapi Yesus numbatagi hira, “Wetumo!” Pade nituiNa talinga nu tumata ee bu nipakabeloNa. ⁵²Pade nanguli Yesus ka kapala nu imam-imam, bu kapala-kapala tupujagai ri Bola Pue Alatala, ante tutua-tutua tu Yahudi anu narata mumbahoko Ia, “Nuapa! Tupangae Yaku ei hampe komi nanggeni tono ante pato narata mumbahoko Yaku?” ⁵³Eo-eo Yaku nuhinggani ante komi ri Bola Pue Alatala. Nanggia hodi nihokomi Yaku rihee? Tapi Eimo kalogami mumbahoko Yaku, tempo kuaha Madika nu Heta nukaraja!”

Petrus numbahapu Yesus

⁵⁴Nihokoramo Yesus pade nikenira ri bola nu imam bohe, pade Petrus netintuni nggawao. ⁵⁵Riara luo nu bola ee, bara hanggia dua tumata numbapadumpu apu ala rapanderu. Naratamo Petrus nanderu nuhinggani-nggani ante hira.

⁵⁶Naria hadua batua banggele numbapenotohi Petrus nikatoko namonju riapu, pade manguli, “Tumata ei mbui tuputintuni Yesus!” ⁵⁷Tapi Petrus nehapu, nanguli ia, “Hodi nakono, hodi ninjaniku Ia!” ⁵⁸Taapa nahae, naria mbui tumata anu nangole ia bu nanguli, “Iko mbui hadua tuputintuniNa?” Tapi nihabo Petrus, “Hodi! Hodu yaku.” ⁵⁹Maria hajaa olona loko ri ee, naria mbuipa tumata nanguli, “Ia ei mpuumo tuputintuni Yesus, habana ia mbui tu Galilea!” ⁶⁰Tapi nihabo Petrus, “Hodi! Hodu ninjaniku nuapa niulimu etu.”

Da nujarita Petrus, nutotoroomo manu. ⁶¹Pade ningalimo Pue nangole Petrus. Nitora Petrusmo nuapa anu niuli Yesus ka ia wuwei, “Taapa mutotoroo manu bubayana, tolu ngganimo iko mumbahapu Yaku.” ⁶²Pade nihuwumo Petrus rihawalikuna bu nutumangi nanjiduka.

Yesus ni pungeika bu niboba

⁶³Pade bara hanggia dua tumata anu numbajagai Yesus numbaungeika bu numbaboba Ia. ⁶⁴Niramura mata Yesus bu nipikutanara, “He, Nabi! Towa, hema anu numbaboba Iko?” ⁶⁵Bu nadeapa pihalai anu niulira ka Yesus.

Yesus nitangara ri ngayo nu Pulibu Bohe Agama Yahudi

⁶⁶Naeo mpadondo nuiromumo tumata ri pulibu bohe agama Yahudi. Tutua-tutua tu Yahudi, kapala nu imam-imam, bu tupande ri atura Musa. Pade nikeniramo Yesus ri ngayo nu tupulibu ee. ⁶⁷Nanguli hira ka Yesus, “Uli ka kami, Komi eimo Madika Tupumpakahalama?” Nihabo Yesus, “Nau Kuuli ka komi, kana hodi raparahayami mbui.” ⁶⁸Bu ane Kupikutana mbui komi, hodi rahabomi. ⁶⁹Mpamula loko ri tempo ei, Yaku, Ana Manuhia mikatoko ri hambira panggana nu Alatala anu nilabipa kuahaNa loko ri pura-pura anu nauaha.” ⁷⁰Pade nikutanamo hira, “Jadi, Komi eimo tono Ana i Alatala?” Nihabo Yesus, “Komi mboto nangulina, Yaku eimo Ana i Alatala.” ⁷¹Pade numbilikamo hira, “Tamo kita mangelo habi ntanina, habana niepetamo halaNa, loko ri putehaNa mboto.”

Yesus ri ngayo Pilatus

23 ¹Naopu ee, pura-pura kapala tu Yahudi anu nutangara ee nionggo pade nikenira Yesus ri ngayo gubernur Yudea anu nuhangaka Pilatus. ²Pade numpamulamo hira numbarai Yesus nanguli hira, “Tumata ei nirataka numbapanawu tudea pade numbapakeni tumata ala mangewa pamarenta, numbatagi tumata

ala neemo mumbayari bahitee ka kaisar bu nanguli ane Iamo Madika Tupumpakahalama.” ³Pade nikutanamo Pilatus ka Yesus, “Nakono Iko etu Madika nu tu Yahudi?” Nihabo Yesus, “Komi mbotomo nangulina.” ⁴Pade nanguli Pilatus ka kapala nu imam-imam bu tumata dea rihee, “Nau hongu kahala nu tumata ei hodi naria nirataku ala yaku mamala mumbahuku Ia.” ⁵Tapi hira kana numpahimbuku nanguli, “Ante pangajariNa Ia numbapakeni pura-pura tumata ala mumbaewa pamarenta ri pura-pura tana Yudea, mpamula loko ri Galilea hampe narata ri hei mbui.” ⁶Nangepe ee Pilatus nikutana ka hira, “Tumata ei tu Galilea?” ⁷Wetu ninjanina ane Yesus loko ri ngata anu ri tambe Pumparenta Herodes, Pilatus nangowu hira ala manggeni Yesus ka Herodes. Tempo ee Herodes naria ri ngata Jerusalem.

Yesus ri ngayo Herodes

⁸Iwetu Herodes nangole Yesus, nahana mpuu rarana, habana naheemo ia nangepe kareba Yesus bu madota mangole Ia. Herodes mbui numbarumaka ala mamala mangole kabaraka anu rababe Yesus. ⁹Etumo habana nadea mpuu pumpikutana Herodes ka Yesus, tapi hodi naria nau hongu anu nihabo Yesus. ¹⁰Tapi kapala nu imam-imam bu tupande ri atura Musa nionggo ri ngayona bu ante huara namangga numpahimbuku numbarai Yesus. ¹¹Pade Herodes bu huradaduna numpungei bu numbalalai Yesus. Tempo ee, hira numpahuaka pakea madika ka Ia. Naopupa ee, nikenira mpanjilimo Yesus ka Pilatus. ¹²Nggaulu Herodes bu Pilatus hodi nuhinggabelo, tapi ri eo ee mbui hira nuhimpuroa mpanjilimo.

Yesus nihuku mate

¹³Pade nipahiromu Pilatus pura kapala nu imam-imam bu kapala-kapala ntanina ante tudea anu ri ngata ee. ¹⁴Nanguli Pilatus ka hira, “Komi nanggeni tumata ei ka yaku bu niraimi ane Ia numpakeni tudea numbaewa pamarenta. Niparehakumo Ia tapi nau hongu kahalaNa anu niraimi ka Ia, hodi ria nirataku.” ¹⁵Wetu mbui ante Herodes, hodi naria niratana kahala nu tumata ei, etumo habana hampe ia nanggeni mpanjili tumata ei ka kita. Niolemi mbotomo nau hongu hodi naria kahala anu nibabeNa ala Ia mahipato mumbatarima pehuku mate. ¹⁶Etumo habana yaku nangowu huradaduku ala mumbaduahi Ia ante cambu, naopupa ee ku pawiamo Ia.”

[¹⁷Pilatus nanguli ewa ee habana mpae-mpae ri Eo Puhuha Paskah, ia kana mumbahuwuraka hadua tumata anu nitarunggu.] ¹⁸Tapi

tumata anu nahiromu rihee nuhinggani-nggani nungare nanguli hira, "Patehi Ia, huwuraka i Barabas ka kami!" ¹⁹Tempo ee Barabas nitarunggu habana ia numbaewa pamarenta bu numbapatehi tumata. ²⁰Tapi Pilatus madota mumbapawia Yesus, etumo habana hangganipa ia nanguli etu ka pura-pura tumata rihee ante huara namangga. ²¹Tapi hira nungare njuu, "Salibmo Ia! Salibmo Ia!" ²²Pade katolu ngganina Pilatus nanguli ka hira, niulina, "Kahala napa ntoto kakonona anu nibabeNa ei? Hodi naria nau hongu kahala anu nirataku nibabeNa hampe Ia mahipato rahuku mate. Etumo habana yaku nangowu huradaduku ala mumbaduahi Ia ante cambu, naopu ee ku pawiamo Ia." ²³Tapi ante huara namangga hira numbadoho Pilatus nanguli hira, "Salibmo Ia! Paku Ia ri kai parika!" Kaopuna Pilatus numbaturuhi pumpirapira. ²⁴Naopu ee Pilatus numbawate pehuku mate ka Yesus ewa nuapa anu nipodota tumata dea. ²⁵Pade Pilatus numbaturuhi pumpirapi nu tumata dea ala mumbahuuraka i Barabas anu nitarunggu habana numbaewa pamarenta bu numbapatehi tumata. Tempo ee mbui ewa dota nu tudea, Pilatus numbawoi Yesus ka huradadu Roma ala rasalib.

Yesus nipaku ri kai parika

²⁶Naopu ee Yesus nikeni nu huradadu Roma. Riara mpulumakora, hira nuhintomu ante hadua tu Kirene anu nuhangaka Simon, anu dako narata ri ngata Yerusalem. Nihokora Simon pade nipadahora ala mumbahimbu kai parika ri puri Yesus.

²⁷Tempo ee nadea mpuu tumata numbatintuni Yesus. Naria mbui bara hanggia dua banggele anu numbatintuni hira. Banggele ee nantete bu numbatangghi Yesus. ²⁸Tapi Yesus ningali bu nanguli ka hira, "Banggele-banggele tu Yerusalem, neemo komi mumbatangghi Yaku tapi tangihimo koromi mboto bu ana-anami. ²⁹Habana kana marata tempo kahuha bu tumata kana manguli, 'Mahana mpuu banggele-banggele anu hodi naria nau hanggani natiana ante anu hodi nuana bu hodi naria numpahuhu ngana.' ³⁰Tempona kahuha ee marata, tumata kana manguli ka bulu-bulu, 'Kaduyumo bu runjumo kami' bu tumata mirapi ka tana kabuntina, 'Iwumo kami.' ³¹Habana ante kai da namata^d hira numbabe ewa ei, matantumo milabipa kadaara ante kai anu nabangimo." ³²Tempo ee mbui hira

^d **23:31 kai da namata:** Anu nirapahika kai da namata etumo Pue Yesus anu hodi nadoha. Anu nirapahika kai bangi, etumo tumata-tumata anu nadoha.

nanggeni rudua tupangae anu rahuku mate muhinggani-nggani ante Yesus. ³³Iwetu hira narata ri tampa anu nuhangaka bulu Tengkorak, huradadu Roma ee numbapaku Yesus ri kai parika. Rudua tupangae ee ni salib mbui namonju ante Yesus, hadua ri hambira panggana bu hadua ri hambira panggei. ³⁴Pade nuhambayamo Yesus, nanguli Ia, "Alatala Tuamaku, ampunimo hira habana hodi ninjanira nuapa anu nibabera." Pade huradadu-huradadu ee nutende nomoro ala mumpakatantu i hema rakamalana juba Yesus. ³⁵Tumata dea anu niongan rihee nangole pura-pura kajadia ee, bu kapala-kapala tu Yahudi numbahalai Yesus nanguli hira, "Tumata ntanina nipakahalamana, tapi korona mboto hodi. Ane Ia mpuu-mpuu Madika Tupumpakahalamana anu nipitolohi Alatala, woikamo tempo ei kita mangole Ia mumpakahalamana koroNa mboto." ³⁶Pade huradadu-huradadu mbui numbahalai Yesus, hira narata bu numbahoi angguru anu napodi ka Ia ³⁷bu nanguli hira ka Ia, "Ane komi madika nu tu Yahudi pakahalamamo koroMu mboto." ³⁸Ri kai parika, ri wonggo nu balengga Yesus nitulih iwei, "Eimo madika tu Yahudi." ³⁹Pade hadua loko ri tupangae ee numbahalai Yesus, nanguli ia, "Komimo Madika Tupumpakahalamana? Ane wetu, pakahalamamo koroMu mboto pade pakahalamama mbui kami." ⁴⁰Tapi tupangae ntanina numbaontika roana ee nanguli ia, "Kakonona komi kana maeka ka Alatala, kita rudua nuhinggani nihuku mate ante Ia. ⁴¹Kita rudua mahipato mumbatarima pehuku ei habana pukaingguta nadas, tapi Ia hodi ntoto naria kahalaNa nau hawo kukoi." ⁴²Pade nangulipa ia, "Yesus toramo yaku ri tempona Komi marata majadi Madika" ⁴³Nanguli Yesus ka ia, "Parahayamo, kakonona eo ei mbui komi muhingganimo ante Yaku riara Firdaus^e."


Kamate Yesus

⁴⁴Tempo ee, nitahere tinti hampulu rongu tongo eo, hampigoli pura-pura ngata nalalondo hampe tinti tolongu ngguwiana, ⁴⁵habana mata nu eo nitaa newanta. Pade kae tabe^f anu ri Bola Pue Alatala naheka ntongo. ⁴⁶Nungaremo Yesus ante huara namangga, "Alatala TuamaKu, Kuwoi nyohaKu riara mpaleMi!" Naopu nanguli iwee, nakabumo

^e **23:43 Firdaus:** Ri hei batuana nahimbai ante "huruga" tampa piari tudea nu Alatala tempo hira mamatembo bu rapakatuwu mpanjili.

^f **23:45kae tabe:** Kae pulawa anu nakumba bu nipataka ri wombong kamara anu nagaha ntoto riara Bola Pue Alatala. Iwetu kae pulawa ee naheka ntongo, batuana tamo naria anu mumbalawa manuhia muhintomu ante Pue Alatala. (Kel. 26:31-33); (Ibrani 9:1-8).

nyohaNa. ⁴⁷Tempo kapala huradadu nangole kajadia ee, nituianamo Alatala, nanguli ia, "Nakono mpuu, tumata ei hodi naria kahalaNa." ⁴⁸Wetu tumata dea anu naria rihee nangole pura-pura kajadia, hira nanjili numbahapa bumbarara tanda panjoho nu rarara. ⁴⁹Pura-pura roa Yesus ante banggele-banggele anu nuhinggani-nggani ante Ia loko ri Galilea, nionggo loko ri kakawaona nangole pura-pura kajadia ee.



Kae tabe ri Bola Pue Alatala (23:49)

Pumpatana Yesus

⁵⁰Tempo ee, naria hadua langgai anu nuhangaka Yusuf. Ia tumata anu nanoa rarana bu nabelo pukaingga, Yusuf iamo hadua kapala agama anu numbatintuni pulibu bohe agama Yahudi, ⁵¹tapi ia hodi nahituju ante kapala agama tu Yahudi ntanina anu naria ri pulibu bohe ee. Ia tumata lako ri Arimatea ri tana Yudea, pade ia numpuhea tempo Alatala mpamula mumparenta ewa Madika. ⁵²Yusuf numbatotorou Pilatus bu mirapi ala mboa Yesus rawoika ia. ⁵³Iwetu niturakana mboa Yesus loko ri kai parika, nibungguna ante kae hompu, naopupa ee niontuna riara dayo ri bulu watu anu nipaa. Dayo

ee taapa naria ni pudayo. ⁵⁴Eo ee iamo eo mumpahadia, habana meilena Eo Mpinonto. Ewa ada tu Yahudi, mpamula nggawengina ee tamo mamala mukarajaa. ⁵⁵Banggele-banggele anu nuhinggani narata ante Yesus loko ri Galilea, hira numbatintuni Yusuf bu nangole dayo ee. Hira mbui nangole birumba mboa Yesus niontu ri dayo. ⁵⁶Naopu ee nanjilimo hira numpakahadia rampa-rampa bu lana wongi anu nahuli olina anu kana radikara ri mboa Yesus. Ri eo hunjuna, etumo Eo Mpinonto. Numbaturuhi atura Agama Yahudi, ri Eo Mpinonto, hira hodi mamala mukarajaa.

Yesus natuwu mpanjili

24 ¹Eo Minggu padondo rikana, banggele-banggele ee nalau ri dayo nanggeni rampa-rampa anu ni pakahadiara ka mboa Yesus. ²Iwetu hira narata ri dayo, niratara watu anu numbatutu dayo Yesus natihoromo. ³Pade nihuamo hira riara dayo tapi tamo naria mboa Yesus niratara rihee. ⁴Tempo hira da naingu rarara numpikirika kajadia ee, hampigoli nionggomo ri ginjoira rudua malaeka nu Alatala nupakea nenggila. ⁵Hira mpuu-mpuu naeka pade nutumbukotu bu nutungga hampe ri tana. Nanguli malaeka ee ka hira, "Nanggia komi nangelo tumata anu natuwumo ri tampa nu tumate? ⁶Ia tamo naria ri hei. Ia natuwu mpanjilimo! Toramo nuapa anu nitehana ka komi tempo Ia da ri Galilea. ⁷Yaku, Ana Manuhia, kana rawoi ka tumata anu nadoha, rasalib, tapi ri katolu eona Yaku kana matuwu mpanjili."

⁸Pade nitorara pura-pura nuapa anu niuli Yesus ee. ⁹Iwetu hira nanjili lako ri dayo, nitehara puramo kajadia ee ka anaguru Yesus anu hampulu bu hadua, bu ka pura-pura tuputintuni anu ntanina. ¹⁰Banggele-banggele anu nuteha kajadia ee ka tuputintuni Yesus, etumo Maria Magdala, Yohana, bu Maria tina Yakobus, ante banggele-banggele ntanina anu nuhinggani ante hira. ¹¹Tapi anaguru Yesus hodi niparahayara nuapa anu niteha nu banggele-banggele ee. Panjarumakara nuapa anu niteha nu banggele-banggele ee hawo anu nibabe-babera. ¹²Naopupa ee, nionggomo Petrus pade nukumendo nalau ri dayo. Ante nutungga ia nangole riara nu dayo, niolena hawo kae hompu anu naria rihee. Nahera mpuumo ia, nanjilimo ia ante nadea pikutana riabantainya numpikirika kajadia ee.

Yesus numpupuole koroNa ri dala malau ri Emaus

¹³Eo ee mbui naria rudua tuputintuni Yesus nulumako malau ri hongu ngata anu nuhangaka Emaus, nitahere hampulu hongu kilo

kakawaona loko ri Yerusalem. ¹⁴Riara mpulumakora, hira nuteha pura-pura kajadia anu najadi ee. ¹⁵Tempo hira da nuteha-teha bu numbihula pumpikiri, hampigoli Yesus mboto narata bu nulumako nuhinggani ante hira. ¹⁶Hira nangole Yesus tapi ewa naria anu numbalawa piolera hampe hodi ninjanira hema Ia ee. ¹⁷Nanguli Yesus ka hira, “Nuapa anu nitehami riara mpulumakomi ei?” Hira nitaa ante lenje nahuha. ¹⁸Pade hadua loko ri hira anu nuhangaka Kleopas nanguli ka Yesus, “Loko ri pura-pura tumata anu ri ngata Yerusalem, bara hawo Komi haduami etu anu hodi numbanjani kajadia nuapa anu najadi bara hanggia eo anu naliu ei.” ¹⁹Nikutana Yesus, “Kajadia nuapa?”

Nihabo hira, “Kajadia anu najadi ante Yesus tu Nasaret. Ia hadua nabi anu nakuaha riara mpukarajaa bu pujaritaNa ri ngayo Alatala bu ri ngayo nu pura-pura tumata ri ngataka. ²⁰Tapi kapala nu imam-imam bu kapala-kapala anu ntanina numbawoi Ia ka pamarenta Roma ala Ia rahuku mate bu rasalib. ²¹Kakonona Iamo anu niharumakaka kana mumbapawia tu Israel loko ri balira, tapi ei katolumbenginamo Ia namate. ²²Tapi bara hanggia dua roaka banggele numpakatikaja kami. Mpadondo rikana hira nalau ri dayo, ²³tapi tamo niratara mboa Yesus rihee. Pade nanjilimo hira bu nanguli ane hira nangole malaeka anu nanguli ane Yesus natuwu mpanjilimo. ²⁴Bara hanggia dua roaka nalau ri dayo, bu niratara ewa nuapa anu niteha nu banggele-banggele ee iwee mpuu, tapi hodi naria mboa Yesus niolera rihee.”

²⁵Pade nanguli Yesus ka hira, “Hee komi tudoyo! Nakumba mpuu pumpikirimi, hampe komi hodi namala numparahaya nuapa anu niuli nu nabi nggaulu. ²⁶Kakonona kana ranjanimi ane Madika Tupumpakahalama mantidomaka ntanilu pade rabila bu mantarima kuaha pade mumparenta muhinggani-nggani ante Alatala.” ²⁷Naopu ee, Yesus numbatentei ka hira, pura-pura anu nitulihii ri Buku Gaha anu nuteha ka koroNa mboto, mpamula loko ri buku Musa hampe ri buku nabi-nabi ntanina.

²⁸Tempo hira narapamo ri ngata anu rakalaura ee, Yesus ewa madota mumpapolahi pulumakoNa. ²⁹Tapi hira nirapi ntoto ante Yesus ala miari ante hira niulira, “Pihai ntanimo muhinggani ante kami habana tamo mahae malalondomo eo mpamula maholomo.” Pade nihamo Ia nuhinggani ante hira.

³⁰Tempo Yesus nikatoko numbanai nuhinggani ante hira, nialaNa roti bu nuhukuru ka Alatala, pade nitubi-tubiNa bu niwoiNa ka hira. ³¹Tempo ee mbui ninjaniramo ane Ia ee Yesus, tapi Ia haliu nalipo

loko ripangolera. ³²Pade numbiulikamo himbai hira, “Mahipato nahana mpuu rarata tempo Ia nuteha ka kita riara mpulumakota bu numbatentei ihi nu Buku Gaha ka kita.”

³³Tempo ee mbui nionggomo hira pade manjili malau ri Yerusalem. Rihee niratara kahampulu hadua anaguru Yesus nuhiromu nuhinggani ante tumata ntanina. ³⁴Nanguli anaguruNa ka rudua tumata ee, “Nakono mpuu ane Pue natuwu mpanjilimo! Ia numpupuole koroNa mboto ka Simon.” ³⁵Rudua tuputintuni Yesus anu dako narata ee, nuteha nuapa anu najadi ante hira riara mpulumakora, birumba ninjanira Pue tempo Ia numbatubi-tubi roti.

Yesus numpupuole koroNa ka anaguruNa

³⁶Tempo hira da nuteha ka nuapa anu najadi ee, hampigoli Yesus nionggomo ri tutongora bu nanguli ka hira, “Kabelo nu katuwu ka komi.”

³⁷Hira natikaja bu naeka mpuu habana niharumakaka hira nangole alimbayo. ³⁸Tapi nanguli Yesus ka hira, “Nee maeka bu mabata rarami. ³⁹Olemo pale bu kadaKu ala ranjanimi Yakumo ei. Tuimo bu ole mpakabelo, habana alimbayo hodi naria ihi ante wukuna ewa anu niolemni ante Yaku.”

⁴⁰Tempo Yesus nanguli iwee, Ia numpupuole pale bu kadaNa ka hira. ⁴¹Tapi hira taapa niparahayara habana nahana mpuu rarara bu nahera nangole Yesus. Nangole ee nanguli Yesus ka hira, “Naria pumbanaimi ri hei?” ⁴²Pade hira numbawoi hampua bau anu nitunu ka Ia. ⁴³Yesus nangala bau ee, pade numbanai ri ngayora.

⁴⁴Naopu ee, nanguli Yesus ka hira, “Tempo Yaku da nuhinggani-nggani ante komi, niuliKumo ane pura-pura atura Pue anu nitulihii i Musa anu numbatentei Yaku, riara buku nabi-nabi bu Masmur, etu kana madupa.”

⁴⁵Pade nipakanoto Yesus pumpikirira ala rapahara nuapa patuju ihi nu Buku Gaha. ⁴⁶Pade niuliNa ka hira, “Riara Buku Gaha nitulihii ane Madika Tupumpakahalama kana mantidomaka bu rapatehi, pade ri katolu eona Ia kana matuwu mpanjili. ⁴⁷Buku Gaha mbui nanguli ane tuputintuni Yesus kana mumpatulele Kareba Belo ante kuaha loko ri Madika Tupumpakahalama, mpamula loko ri Yerusalem hampe ri pura-pura ngata ri dunia. Kareba etu kana rapatulele ala manuhia majea loko ri doha-dohara ala Madika Tupumpakahalama mumbaampuni pura-pura dohara.” ⁴⁸Nanguli Yesus ka hira, “Komimo habiKu loko ri pura-pura anu najadi ante Yaku.

49 Pariarantaikamo! Kana Kupupanau ka komi Nyoha Gaha anu nijanji nu TuamaKu Alatala. Jadi pupeamo ri hei ri ngata Yerusalem ei hampe kuaha nu Alatala manau ka komi.”

Yesus natiore ri huruga

50 Naopu ee, Yesus nanggeni hira nalau ri hawaliku nu ngata Yerusalem narapa ri ngata Betania. Rihee Ia nangonggotaka PaleNa ala mumbaganehi hira. **51** Tempo Yesus numbaganehi hira, natioremo Ia ri huruga bu nugaamo Ia loko ante hira. **52** Nangole ee, nutumbukotumo anaguruNa bu numbatuia Ia pade nanjilimo hira ri Yerusalem ante rara anu mpuu-mpuu nahana. **53** Ri Yerusalem, eo-eona hira numbatuia Alatala ri Bola Pue Alatala.



Puhiromu nu kata ante batuana

Abraham (*Abraham*) Ia ei tumata anu loko ri ngata bohe Ur-Kasdim ri Mesopotamia, etumo ngata anu najadi bagia ndate nu Irak. Alatala nangowu Abraham numbapalaihi ngatana ee, pade nalau ri tana Kanaan. Alatala nujanji mumbawoi muli anu nadea ka Abraham ala hira majadi pue nu ngata Kanaan ee. Abraham eimo tuama Ishak bu pue Yakub. Hira tuntolu eimo najadi tutua nu tu Israel. Ole ri Kej. 12:25. Riara nu Buku Gaha Pujanji Bou, ia mbui niuli tuama nu pura-pura tumata anu numparahaya ka Alatala (Rm. 4:11).

Ana Daud (*Anak Daud*) Eimo hongu pangga ka Yesus anu nipakatantu ane Iamo Madika anu nijanji Pue Alatala. Daud etu iamo madika tu Israel anu natuwu ri tempo Pujanji hae ri pae hampulu hongu tempo Yesus taapa nipuanaka (SM). Pue nujanji ka Daud ane muli Daud ee, kana mumparenta hampe ri kahae-haena. Ole ri 2Sam. 7:16. Tu Yahudi numpake pangga “Ana Daud” manguli ane Tumpupakahalama etumo Madika anu nijanji bu niganehi ala mumbabe pukarajaa bohe. Pangga “Ana Daud” ei batuana ane Yesus ee hodi ana ote Daud, tapi hawo mulina.

Ana Manuhia (*Anak Manusia*) Riara nu Buku Daniel 7:13, jarita ei nipake ka hadua Tupumpakahalama anu kana marata. Pue numbawoi ka Ia kuaha bu puparenta anu hodi ria kaopuna. Yesus naharo numpake hanga “Ana Manuhia” nanguli ka koroNa mboto. Pangga ei batuana ane Yesus:

1. Ia narata loko ri Alatala, bu kakonona Ia etu mbotomo Alatala.
2. Ia mpuu-mpuu hadua manuhia.
3. Naria kuaha nu Alatala ante Ia ri dunia bu ri huruga.

Ana Pue Alatala (*Anak Allah*) Tempona Yesus niulika Ana Pue Alatala numbikai ante hangaNa Madika Tupumpakahalama (anu niuli Mesias) Ia niwoi Alatala mumpakahalama tudeaNa, pade mumparenta hira ewa anu nijanji Alatala ka Madika Daud.

Angguru (*Anggur*) Tuda-tuda anu nipokono nu tu Yahudi. Angguru, namala mbui ninai wuana, niala uena ala rainu. Etumo habana angguru naharo nipake Yesus najadi purapahi. Yesus nirapahika ewa koro nu angguru, pade tumata anu nipaguruNa, nirapahika ranggana. Ole ri Yoh. 15:1-18.

Atura i Musa (Hukum Taurat) Tempona Musa nanggeni tu Israel nihuwu loko ri Mesir, Pue Alatala numbawoi atura nuliu Musa. Atura etu, iamo alima buku anu mpamulana riara nu Pujanji Hae anu najadi patua nu agama Yahudi.

Baptis (Baptis) Riara baha Yunani batuana nekahulo, atau nantopohi riara ue. Riara buku Pujanji Nabou, "baptis" naharo nibabe riara agama bu naria batuana. Yohanis tupubaptis numbabaptis tumata ri binangga Yordan, etu najadi tanda ane tumata ee najeamo, ala i Alatala mumbaampuni dohara (Luk. 3:3). Panggawia Yohanis etu, manguli ka tudea karata i Pue Yesus. Tu Kristee nibaptis najadi tanda ane hira numparahaya Pue Yesusmo bu majadi tuputintuniNa. Numbatintuni pumbarata i Paulus, Nibaptis batuana kita nipakahongu bu nuhinggani-nggani ante Pue Yesus, belo riara nu kamateNa, bu riarana Ia nipakatuwu mpanjili, hampe kita mumbarata katuwu anu nabou (Rm. 6:3-4).

Batua (Hamba) Kabiaha nu tu Yahudi ante tu Yunani, hadua batua kana matundu ka tumata anu ni pukarajaana bu mumbabe pura-pura pukarajaana ante hodi minggi ratuia bu rabayari.

Bimba (Domba) Hambaa binata anu korona ewa tuwau, bu nabiaha mbui nipatuwu nu tu Israel. Bimba namala niala wuluna ala rapubabe kae anu nabiaha niuli wol. Bimba tuamana nutondu, bu tonduna namala nipumboli lana (1Sam. 16:1). Bimba mbui namala ninai ihina. Riara Buku Gaha, bimba naharo nirapahika manuhia, habana naharo nalipo bu paraluu rapakeni ante rapuewuka. Ole ri Yes. 53:6, ante Msm. 23:1-4.

Bola mpiPue (Rumah Ibadat) Etumo Bola tampa nu tu Yahudi miPue. Bola mpiPue ei, naria mbui rihawaliku nu ngata Yerusalem riumba tu Yahudi naria. Tapi, ane Bola Pue Alatala hawo naria ri Yerusalem. Ri eo hatu etumo eo mpinonto, atau eo nu tu Yahudi miPue. Hira nuhiromu ri Bola mpiPue ee bu numbahaa Buku Gaha. Bola mpiPue ee, nipakera mbui tampa puhiromu ante tampa puhirola. Yesus biahana numpaguru riara nu Bola mpiPue ee. Ole ri Mat. 4:23; Mrk. 1:21; Luk. 4:16; Yoh. 4:20. Wetu mbui huro Pue anu nuhangaka Paulus, ante huro-huro ntanina naharo numpaguru ri Bola mpiPue ee. Ole ri Kis. 13:5; 14:15; 14:1; 19:8.

Bola Pue Alatala (Bait Suci) Etumo Bola mpiPue nu tu Yahudi anu hawo naria ri Yerusalem. Numbatintuni atura agamara, binata anu rawoika Alatala, hodi mamala rakeni ri tampa ntanina. Pura-pura binata anu rawoi ka Alatala kana rakeni ri Bola Pue Alatala ri Yerusalem ee. Tudea

hawo mamala mihua hampe riara luo nu Bola Pue Alatala. Hawo Imam anu mamala mihua riara nu Bola Pue Alatala ee. Bola Pue Alatala anu mpamulana nipupiongg i madika Salomo ri pae hioatu onompulu (960) tempo Yesus taapa nipuanaka. Pade Bola ee nigerohi nu hurudadu loko ri Babel ri pae limatu walumpulu ono (586) tempo Yesus taapa nipuanaka. Serubabel numpupiongg i mpanjili Bola ee ri pae Limatu hampulu alima (515) Tempo Yesus taapa nipuanaka, pade Herodes mpamula numpupiongg Bola Pue Alatala bouna, ri pae Hampulu hahio (19) Tempo Yesus taapa nipuanaka. (Yoh. 2:20). Yesus nuteha berimba kapongga nu Bola Pue Alatala ee (Mrk. 13:1-2) pade Bola ee mpuu-mpuu nipakapongga ri pae Pitumpulu (70).

Bulu Saitun (Bukit Saitun) Bulu ei naria ri hambira mpandake nu ngata bohe Yerusalem. Ri hei nadea puna nu kai Saitun bu Taman Getsemani, tampa Yesus nabiaha nalau nuhambaya. Yesus nabiaha nahambengi ri Bulu Saitun ee tempo Ia naopu numpaguru ri Bola mpiPue.

Doha (Dosa) Etumo panggawia-panggawia anu hodi nipudota Pue Alatala. Rapana hodi numbaturuhi parenta anu nitulihii riara buku Atura Pue anu nitulihii Musa, ante buku gaha ntanina. Hodi numbaturuhi parenta Pue Alatala, etu mbui hangana doha. Doha mamala rababe hadua, mamala mbui ante roa-roa ntanina. Doha numbagerohi puhinggabelo ante Pue Alatala, bu ante tumata ntanina. Tumata nadoha hodi mamala mumpakahalama korona mboto loko ri kuaha nu doha. Riara buku Pujanji Bou, Pue Yesus narata ala numpakahalama manuhia loko ri doha-dohara.

Doi Pera (Uang Dinar) Doi ri tempo nggaulu anu nibabe loko ri pera, anu niuli Dinar. Hewa nu tupukarajaa haeo ri tempo ee iamo hongu dinar.

Elia (Elia) Hadua nabi riara buku Pujanji Hae anu natuwu ri tempo hadua madika anu nuhangaka Ahab numparenta tu Israel. Ia numpahampeka patetehi loko ri Pue Alatala, bu nadea kabaraka anu nibabena. Elia hodi namate, tapi ia da natuwu haliu niore i Pue Alatala ri huruga. Ole ri 2Raj. 2:11. Numbatintuni nuapa anu niuli nabi Maleaki. Ole ri Mal. 4:5-6. Tempo Yesus danaria ri dunia, tu Yahudi numparahaya ane Elia marata mpanjili mumbapariuluhi Madika Tupumpakahalama. Tempo Yesus nituia ri wonggo bulu, Elia naria nuhinggani ante Musa bu nujarita ante Yesus.

Eo Mpinonto (Hari Sabat) Etumo eo mpiPue nu tu Yahudi anu tempo ei niuli eo Hatu. Kabiaha nu tu Yahudi eo mpinonto mpamula loko kaholo nu eo ri eo jumaa hampe kaholo nu eo ri eo hatu. Riara atura Pue anu nituluhi

Musa tu Yahudi hodi namala mukarajaa ri Eo Mpinonto ee. Ri eo ee, hira miPue ka Alatala. Ole ri Kej. 2:2-3; Kel. 20:8-11; 31:12-17. Etumo habana riara baha nu tu Yahudi, Sabat batuana “Eo Mpinonto” Ole ri Roma 14:5-6; Kol. 2:16-17.

Eo Puhuha Paskah (*Hari Raya Paskah*) Eo Puhuha Bohe Paskah ei nibabe ala mumbatora birumba tu Israel nihuwu loko ri tana Mesir tampa riumba hira nipubatua. Tempo ee pura-pura ngata Israel numbahambale bimba bu numbadika raana ri wombo-wombo bolara ala ritempo malaeka tumpupatehi mangole raa ee, ia hawo noliu.

Eo Puhuha Roti hodi nuragi (*Hari Raya roti tidak beragi*) Tu Yahudi numbabe puhuha ei pitu eo kahaena kaliuna loko ripuhuha Bohe Paskah. Ri pitu eo ee hira numbanai roti anu hodi nuragi, ala mumbatora birumba tu Israel nihuwu loko ri ngata Mesir tampa hira nipubatua. Ole ri Kel. 12:4-20; Mat. 26:17. Roti ee nanipi, habana hodi nidika ragi.

Galilea (*Galilea*) Hanga nu hongu ngata anu naria ri hambira nu ngata anu niapiari nu tu Israel. Riara nu ngata ei, naria hongu rano anu nuhangaka rano Galilea.

Gandum (*Gandum*) Eimo tuda-tuda anu ewa pae bu hampe eo ei nituda nu tu Israel bu nadea mbui nituda ri tampa ntanina. Hira numbagili gandum ei hampe naoya bu nipubabe roti, pade etumo anu ninai nu tu Israel.

Huro Pue (*Rasul Allah*) Tumata anu niowu numpahampeka patetehi. Yesus mbui niuli huro Alatala. Ole ri Ibr. 3:1. Anaguru Yesus etumo huro Pue anu mpamulana. (Mat. 10:1-4). Paulus mbui najadi huro i Yesus (1Kor. 9:5).

Imam (*Imam*) Hira anu numpupulumako ada mpiPue riara Bola Pue Alatala ri Yerusalem, rapana ada mumbawoi binata anu rahambale ri Bola Pue Alatala, ante muhammaya mirapi ka Alatala ala mumbaganehi tumata.

Imam Bohe (*Imam Besar*) Tumata anu nabohe ntoto panggana riolo nu imam-imam ntanina ri Israel. Riarana hampae, hanggani hira nihua riara tampa anu nagaha ntoto ri Bola Pue. Ri heme hira nanggeni raa pumbawoi, ala mumpakagaha doha nu tu Israel. Pura-pura Imam Bohe, etumo muli i Harun, Imam Bohe anu mpamulana.

Kaisar (*Kaisar*) Pangga nu madika anu numparenta ri Roma, ia najadi tupumparenta bohe ri pura-pura ngata anu naria ri tambe mparenta nu Roma wetu mbui Yudea ante Galilea.

Kapala nu Imam (*Imam Kepala*) Eimo Imam anu niparaluu ntoto. Hira ei ri tambe mparenta nu Imam Bohe. Hira nipitolohi nu Imam Bohe ala manggeni puhiromu-puhiromu nu Imam mukarajaa ri Bola Pue Alatala. Hira mbui najadi tutua ngata nu tu Yahudi.

Katuwu anu hodi ria kaopuna (*Hidup kekal*) Katuwu anu raratata riara huruga ane kita mpuu-mpuu nuparhaya ka Yesus Kristus.

Keledai (*Keledai*) Hambaa binata ewa jara, tapi nakodi korona.

Kristus (*Kristus*) Madika anu nijanji i Pue Alatala mumbapawia ante mumpakahalamu manuhia.

Malaeka (*Malaikat*) Hira anu niari ri huruga, nukarajaa ka Pue Alatala pade nubabe nuapa anu nipodota i Pue.

Nagaha (*Kudus*) Pue Alatala nagaha, batuana, ia nuhinjalea ante nuapa-nuapa anu nibabeNa riara dunia ei.

Najea (*Bertobat*) Metaamo mubabe doha bu manjili ri dala anu nakono, etumo matundu ka parenta Pue Alatala. Tumata anu ratarima bu raampuni i Pue Alatala, kana majea loko ri doha-dohana.

Nyoha Gaha (*Roh Kudus*) Pue Alatala, etumo Tuama, Ana, Nyoha. Nyoha Alatala niuli mbui Nyoha Gaha (Kis. 16:7). Nyoha gaha numbatulungi ante numbowoi kuaha ka tumata anu numparahaya Pue Alatala.

Putangara Bohe Agama Yahudi (*Mahkamah Agama*) Eimo hongu pulibu riara agama Yahudi anu riwonggona ntoto. Tumata riara nu pulibu ei pitumpulu kadeana, etumo Kapala-kapala nu Imam, Tupande ri atura Musa, bu Tutua-tutua tu Yahudi, anu ri tambe mparenta nu Imam Bohe. Pulibu ei, hodi hawo mumbaaturu puminggu nu tu Yahudi, hira mbui numbatangara tumata. Hira hawo namala numbatangara, tapi hodi mamala mumbawate pehuku mate ane pamarenta Roma hodi mahitju.

Samaria (*Samaria*) Ngata anu naria ri olo nu Yudea ante Galilea. Tumata anu niari ri heme, nuhigalomo ante tumata ntanina, kaopuna agamara nuhigalo mbuimo. Etumo habana hira nipuwulumata nu turi Yahudi.

Tu Farisi (*Farisi*) Hira eimo guru-guru agama nu tu Yahudi anu mpuu-mpuu numbatintuni atura nu agama, tapi nadea atura anu nitambaira mboto. Ole ri Mrk. 7:3-4; Luk. 11:37-46. Hira mbui numparahaya karia

nu malaeka, bu hira mbui numparahaya tumate rapatuwu mpanjili ri eo purina. Ole ri Kis. 23:6-8. Tu Farisi hodi numpangaku Yesus, tapi wetu Yesus natuwu mpanjili loko ri olo nu tumate, nadeamo hira najadi numparahaya. Ole ri Kis. 15:5; Pil. 3:5.

Tu Samaria (Orang Samaria) Ole Samaria.

Tupande ri Atura Musa (Ahli Taurat) Tumata anu napande ri atura Musa.

Hira mbui namala numbabatuahi buku gaha tu Yahudi, anu tempo ei ninjanita alima buku mpamulana riPujanji Hae. Tupande ri atura Musa ei namala mbui niuli guru-guru agama Yahudi. Hira ei hantanga tu Farisi ante hantanga tu Saduki.

Tupuewu (Gembala) Etumo tumata anu numpatuwu bimba atau tuwau.

Tupuewu kana mumbairi bimbana ri tampa anu nadea kawoko ala bimba-bimba ee mamala mangguku. Ia mbui numbabajagai bimbana loko ri tupangonggo bu binata-binata ntanina anu nahodo, eo bu nggawengina. Ane maria hambaa bimba anu malipo, tupuewu kana mangelo bimba ee hampe raratana pade rakenina mpanjili ri roana. Riara kabiaha nu tu Yahudi, tupuewu ei pukarajaa anu hodi niangga. Tapi riara Buku Gaha, Pue Alatala naharo nirapahika ewa tupuewu anu numbabuewuka tudeaNa tu Israel. Ole ri Mzm 23; Yes. 40:11; Yeh. 34.

Turi Lewi (Lewi) Hanga nu hongu suku ri Israel. Tumata ri suku ei nubago numbatulungi Imam mumpahadia binata anu rawoi ka Alatala, bu mumpakagaha Bola Pue Alatala.

Yohanis Tupubaptis (Yohanis Pembaptis) Nipuanaka Elisabet rongo imam Sakaria tempo hira natuamo. Ole ri Luk. 1. Pukarajaa Yohanis Tupubaptis ei ala mumpahadia tumata ri tempo karata Yesus majadi Madika Tupumpakahalama. Yohanis numbabaptis tumata ala majadi tanda ane tumata ee mpuu-mpuu majeamo loko ri dohana.